

HOROLOGIVM
ASCETICVM.

HOROLOGIVM

AB ET LIB

HO

A

Modu

obe

tion

que

A Don

gregat

nis C

S. Be

nali)

Opus

BB. E

Apud L

CV M

HOROLOGIUM ASCETICVM,

INDICANS

Modum ritè , & cum fructu
obeundi Christianas exercita-
tiones , quæ singulis , certis-
que diebus occurrunt.

[A Domno JOHANNE BONA, Con-
gregationis Reformatæ S. Bernardi Ordi-
nis Cisterciensis Abbate , (postea Titul.
S. Bernardi ad Thermas S. R. E. Cardi-
nali) concinnatum.

Opus Posthumum, quod nunc primum
prodit in lucem.

P. P. Eremitæ Carmati. Inscriptio Vigrensis.

PARISIIS,


Apud LUDOVICUM BILLAINE,

M. DC. LXXVI.

CVM PRIVILEGIO REGIS.

3

Bibl. B. VII. 11



CLARISSIMO VIRO
JOHANNI GUALTERO
SLVSIO

BREVIUM SECRETORUM
SVMMI PONTIFICIS
Secretario & Prælato Domestico.

Hæc

PIISSIMI ET DOCTISSIMI
CARDINALIS

OPERVM PRIMITIAS
POST EJUS OBITUM
Typis nunc primùm mandatas,
PIENTISS. ET DOCTISS. EJVVS AMICO

Offert

Addictiss. servus LV D. BILLAINE,
Typogr. Paris.
ã ij

JOHANNES QUARTUS

DEI GRATIA

ROMANUS PONTIFEX

ET TERRARUM

SEMPER PARVULUS

ET TERRARUM

SEMPER PARVULUS

ROMANUS PONTIFEX

ET TERRARUM

SEMPER PARVULUS

ROMANUS PONTIFEX

ET TERRARUM


SEMPER PARVULUS

ROMANUS PONTIFEX


ET TERRARUM

SEMPER PARVULUS

ROMANUS PONTIFEX



PRÆFATIO AUCTORIS
AD LECTOREM.



Hoc Horologium mihi ipsi concinnaveram, (Benignissime Lector) ut affulgente desuper Sole justitiæ, opportunum tempus indiceret perfectè obeundi quidquid singulis certisque diebus faciendum occurrit. Sed cum aliquot amicos & familiares in secretum meum admisissim, quidquid abditum erat perlustrantes in hoc etiam horarium inciderunt; quod cum attentè & curiosè perspexissent, primum laudare laborem meum,

AD LECTOREM.

tum me reprehendere cœperunt, quòd rem multis profuturam, publici juris fieri nollem, & mihi soli absconditam servarem. Id tandem verbis ac suasionibus effecerunt, ut hoc scriptum, qualecumque illud sit, permiserim evulgari, quod certè nunquam futurum putavi, dum hoc ipsum mihi soli elucubrarer.

Prodit igitur in lucem sciothericum Horologium, rudi quidem penicillo sine ullo ornamento delineatum; sed quod nemini obesse, prodesse autem plurimis poterit. Lucem habebit ab æterno Sole, cujus radiis illustratum diu noctuque his, qui verè filii lucis sunt, clarissimè collucebit.

Præmonendus est autem quicumque cupit ad præscriptura

AD LECTOREM.

hujus Horarii horas suas distribuere ; quidquid hîc præscribitur voluntarium esse , & eatenus assumendum , quatenus discretio suggesserit , aut charitas , aut obedientia , ne fortè militet contra virtutem , quod pro virtute institutum est. Quasdam orationes ex sententiis sacræ Scripturæ , alias ex verbis Sanctorum Patrum , aliorumque priorum Scriptorum contexui , ipsa quoque exercitia & alia documenta , ex omnigena Asceticorum Doctorum defloratione excerpta sunt.

Si quæ preces prolixiores videntur , ut pote in exemplum dilatandi affectus , pluribus verbis expressæ , facilè in breviorrem formam redigi , & sapienter dispositæ , brevissimo tempore percurri poterunt. *In co-*

AD LECTOREM.

dice ita legitur : Facile poterunt in breviorē formam redigi ; quamvis sapienter dispositæ , brevissimo tempore percurri poterunt.


De Usu Sacramentorum Pœnitentiæ & Eucharistiæ , seorsum egi in Tractatu Ascetico de Sacrificio Missæ typis evulgato , ex quo petenda quæ hîc desunt.

Cæterum hæc rudimenta incipientium sunt , & prima quodammodo elementa pietatis , quibus anima ferventer & perseveranter Deo aspirante incumbens ad altiora sensim elevabitur , donec occulta divinæ sapientiæ penetrans & degustans potioribus gratiæ donis perfruatur. Usū & praxim hujus libelli sequens elenchus indicabit. Perfectos autem sublimiores nobisque igno-

AD LECTOREM.

ros exercitationum modos un-
ctio Spiritus Sancti edocebit.
Cujus utinam gratia & mihi
& omnibus legentibus uberi-
mè adspirer.





I N D E X.

C A P U T P R I M U M. D E I N I T I O D I E I.

- | | |
|---|----|
| §. 1. <i>Surrectio Matutina,</i> | I |
| §. 2. <i>Oratio prolixior manè recitanda,</i> | 6 |
| §. 3. <i>Alia Oratio brevior,</i> | 26 |
| §. 4. <i>Tertia Oratio brevissima,</i> | 31 |
| §. 5. <i>Aspirationes pro initio diei,</i> | 34 |

C A P . I I .

De his , quæ quotidie occurrunt.

- | | |
|--|----|
| §. 1. <i>De singularum actionum perfectione,</i> | 39 |
| §. 2. <i>De lectione spirituali,</i> | 45 |
| §. 3. <i>De studio litterarum,</i> | 49 |
| §. 4. <i>De corporali Resectione,</i> | 52 |
| §. 5. <i>De externa conversatione,</i> | 55 |

I N D E X.

- §. 6. *Praxis divinæ præsentia*, 59
 §. 7. *Praxis rectæ intentionis*, 66
 §. 8. *De quotidiana virtutum exercitatione*, 73
 §. 9. *Protestationes ad Deum sæpius renovandæ*, 78
 §. 10. *De crebra spiritus renovatione*, 84
 §. 11. *De Oratione mentali*, 91
 §. 12. *Aspirationes pro quotidianis exercitationibus*, 115

C A P. I I I.

De Officii divini recitatione.

- §. 1. *De præparatione ante Officium*, 118
 §. 2. *Oratio ante Officium*, 123
 §. 3. *Praxis Attentionis*, 129
 §. 4. *Vnde eliciantur devotionis affectus*, 132
 §. 5. *De privata Officii recitatione*, 134
 §. 6. *De fine cujusque Officii*, 135

INDEX.

§. 7. *Oratio post Officium,* 137

C A P. I V.

De fine diei.

- §. 1. *De examine conscientiae,* 139
§. 2. *De examine particulari,* 146
§. 3. *Exercitium vespertinum,* 154
§. 4. *Aliud exercitium sive oratio
vespertina,* 163
§. 5. *Quid noctu servare oporteat,* 167

C A P. V.

Miscella diversarum exercita- tionum.


- §. 1. *De generali examine sui ipsius,* 173
§. 2. *Modus visitandi quotidie Au-
gustissimum Sacramentum,* 178
§. 3. *Oratio ante Sanctissimum Sa-
cramentum,* 183
§. 4. *Modus orandi in ingressu Tem-
pli,* 188

I N D E X.

- §. 5. *Quomodo quisque se gerat cum
in aliquod peccatum lapsus est*, 190
- §. 6. *De generali quadam Confessio-
ne spiritualiter peragenda*, 193
- §. 7. *Paraphrasis anagogica Domi-
nicæ Orationis*, 207
- §. 8. *Oratio ad Sanctissimam Tri-
nitatem*, 213
- §. 9. *Pia exercitatio erga Christum
Crucifixum*, 217
- §. 10. *Paraphrasis Angelicæ Salu-
tationis*, 221
- §. 11. *Quomodo colendus quilibet
Sanctus præsertim in ejus Festi-
vitate*, 225
- §. 12. *Exercitium internæ conversa-
tionis cum Sanctis*, 230
- §. 13. *Protestatio, & postulatio aman-
tis animæ*, 232
- §. 14. *Exercitium spiritualis mendi-
catis*, 234
- §. 15. *Exercitatio patientiæ, cum
aliquid adversi occurrit*, 236
- §. 16. *Exercitium perfectæ Resigna-
tionis*, 239

INDEX.

- §. 17. *De Corona B. Virginis*, 242
 §. 18. *De Rosario B. Virginis*, 246
 §. 19. *De Corona Domini*, 251
 §. 20. *Affectus Animæ amantis
Deum*, 254
 §. 21. *Actus, & exercitia Humili-
tatis*, 257
 §. 22. *Exercitium somni spiritualis*,
265
 §. 23. *Exercitium in ariditate*, 267
 §. 24. *Oratio ad quinque vulnera
Christi*, 269
 §. 25. *De Communione spirituali*, 272
 §. 26. *Pia exercitatio pro his, qui
Missæ interfunt*, 274
 §. 27. *Fasciculus Aspirationum, &
aliquot brevium orationum*, 288




HOROLOGIVM ASCETICVM,

INDICANS MODVM
*ritè & cum fructu obeundi Chri-
stianas exercitationes, quæ singulis
certisque diebus occurrunt.*

CAPUT I. DE INITIO DIEI.

§. I.

Surrectio Matutina.

I.  U M mane evigilaveris;
sit prima vox tua, quæ
postrema futura est. **JESVS**
MARIA. Tum mentem
ad Deum eleva, ne ad va-
na, & curiosa volvenda distrahatur.
Considera ipsum esse primum princi-

A

pium, & ultimum finem tuum, & piis affectibus ad eundem aspira, ne pondere corruptionis depressa voluntas ad amorem creaturarum labatur. Sicut oculi corporis summo mane luci sensibili aperiuntur; ita oculi animæ luci spirituali, & divinæ aperiendi sunt. Tum etiam cavendum, ne prius corpus, quam anima evigilet: multi enim sunt quorum anima vigilante corpore adhuc dormit, qui videlicet multa negotia terrena perregerunt antequam cor ad Deum erigant. Homo siquidem expergefactus eo se statim duci sinit, quò magis inclinatur. Qui mundum, & creaturas magis diligit, quam Deum, statim mundi cogitationibus repletur; qui verò Deum præ omnibus diligit, ad illum protinus convertitur, & de illo cogitat.

2. Intuere quasi cælum apertum, & magna animi alacritate psalle cum Cælestibus Spiritibus sacrum Trisagion dicens: *Sanctus, Sanctus, Sanctus, Dominus Deus Sabaoth. Pleni sunt Cæli, & terra gloria tua. Benedicta sit sancta Trinitas, atque indivisa Vnitas. Confitebimur ei, quia fecit nobiscum misericordiam suam. Anima mea desideravit te in nocte, sed*

& spiritus meo in precordiis meis de mane vigilavi ad te, Deus meus, spes mea, amor meus & omnia, humiliter p. tens, ut tua multiformi gratia penetralia cordis mei perfundas, & igne tui amoris vehementer accendas.

3. Hæc & similia dicens surge velociter, ac si ignis cubili injectus esset. Magni momenti est propera, diligensque surrectio, è qua ferè dependet divina visitatio, totiusque diei fervor & alacritas. Postquam verò surrexeris, signa te signo Crucis tanquam potenti panoplia adversus insidias inimici. Deinde humi procumbens Deum adora dicens: *Laudo, glorifico, & adoro te Sancta Trinitas unus Deus, & nihilum meum agnoscens, infra omnes creaturas me prorsus abjicio, & offero ad omne beneplacitum tuum in tempore, & in aternitate.* Mox terram osculare, ut coram Deo profitearis te terram esse, & citò in terram reversurum.

4. Dum indueris cogita vestium originem ex peccato esse, & dum lectum componis, dulcia cum Deo misce colloquia variis actibus fidei, spei, & charitatis, quorum formulam reperies infra

§. 5. Postea præsentior tibi factus propone hunc diem transigere tanquam postremum vitæ tuæ, Exurge è veterno torvitiorem, & propera in via virtutum; donec hodie cognominatur, ut ait Apostolus, Firmiter statue non peccare amplius à solitis imperfectiõibus abstinere, omnem Crucem, quam Deus immiserit, patienter ferre; humanis rationibus non moveri, solam aternitatem præ oculis habere.

5. Quicquid per diem acturus es, prævide, & offer Deo purissima intentione. Præpara & premuni te ad omnia, quæ probabiliter conjicis posse tibi evenire; locis, negotiis, sociis, & occasionebus ritè perpenſis: cumque futura peccandi pericula prævideris, accuratè disquire, quibus remediis te possis ab omni labe immunem custodire. Præordina actiones tuas, & modum in iis servandum: quid facies, quid vitabis; quibus verbis utaris, qua modestia converſaberis. Reſerva vota tua, & bona proposita olim accepta, actusque virtutis illius elice, præ cæteris maxime indiges.

His peractis unam ex subjectis
bus devotè, & reverenter reci-

tabis, five prolixiorē, si nullis occupationibus impēdis: five breviorē si pro ratione tui status curis, & negotiis implicaris. Continent singulæ septem actus. Primus est adoratio, quæ consistit in veneratione, & recognitione divinæ, Majestatis, & in protestatione nostræ dependentiæ ab ipso, & submissionis sub ejus supremo dominio. 2. Gratiarum actio pro omnibus beneficiis generalibus, & particularibus, præsertim verò pro custodia transactæ noctis. 3. Contritio de peccatis cum proposito emendationis. 4. Petitio ut eadē te Deus custodiat, & beneplacitum suum in te perficiat. 5. Oblatio tui ipsius, omniumque actionum, verborum, affectuum, cogitationum, motuum, cum recta intentione, & unione tuæ voluntatis cum divina. 6. Invocatio Deiparæ, omniumque Angelorum, & Sanctorum, præcipuè tutelarium. 7. Postulatio pro omni statu hominum, pro vivis, & defunctis.



§. II.

Oratio prolixior manè recitanda.

Adoratio.

OMnipotens æterne Deus, Rex cœli & terræ, & Creator universorum, ego indignissima creatura tua in centro nihilitatis meæ ante Majestatem tuam humillimè pròvolutus, terræ adherens, ex qua plasmasti me, & in quam reversurus sum, omni majori affectu, attentione, & reverentia, quibus scio, & possum, Adoro te. In quo autem deficio, quia non novi te, nec sufficiens est affectus meus ad infinitatem tuam, ut par est, recognoscendam, suppleas tu ô Trinitas individua. Si enim te cognoscerem, & comprehenderem aliqua ex parte altitudinem divitiarum sapientiæ, & scientiæ tuæ: tunc perfectiùs te adorarem, & cum omni militia cœlestis exercitus hymnum canerem gloriæ tuæ. Sed tabescit in me anima mea, quia incolatus meus de die in diem prolongatur, & jam tœdet animam meam vitæ meæ, dum dico mihi quotidie, Ubi est

Deus meus? Nam quis sum ego vermiculus terræ, & opprobrium hominum, ut audeam faciem meam levare ad te, & aspicere altitudinem cœli? Gaudeo tamen quod sine te nihil sum, nihil possum: nec vellem aliquid esse, aut posse, nisi dependenter à te. Et ideo omni momento peregrinationis meæ cum infima mentis, & corporis demissione intendo te adorare, tibi que offero in supplementum imperfectionis meæ omnes adorationes Domini mei Jesu Christi, B. Virginis, omniumque Angelorum. & electorum tuorum, atque eorum affectu, & veneratione Adoro te. Utinam omnis lingua viventium quasi calamus scribæ velociter scribentis semper & ubique lætanter exprimeret, & omne cor tibi eructaret verba hæc dulciora super mel, & favum, Adoro te.

Gratiarum actio.

Tibi laus, tibi gratiarum actio, Domine Deus, quia ab initio, & ante sæcula, nullis meis præcedentibus meritis, prædestinasti me conformem fieri imagini filii tui, atque ut salutem consequer, media necessaria sapientissimè

8. HOROLOGIVM

præordinasti. Licet enim ignorem, utrum amore, vel odio dignus sim, sed omnia in futurum reseruentur incerta; spero tamen in infinita tua bonitate me futurum vas misericordiae per merita Jesu Christi Domini mei. Benedico te Pater Domine cæli, & terræ, quia cum placuit tibi ex nihilo cuncta creasti, ut notam faceres potentiam tuam. Me verò tempore præfinito ex Christianis parentibus nasci voluisti, quorum cura, & diligentia recta fide, bonisque moribus imbutus fui. Sed & Angelos tuos spiritus fecisti propter me, ut custodirent me in omnibus viis meis, & ab innumeris malis, & periculis præservarent. Omnia autem quæ fecisti continua quadam creatione conservas, quoniam tua sunt omnia, & custodis me omni momento in fulciulo viventium. Sicut enim occidente sole lux desinit esse, ita te subtrahente concursu universa hæc machina dissolveretur. Quia verò propter peccatum patris hærētis totum genus humanum miserabiliter perierat, cum perditio homines in æternum damnare potuisset, misericordiam præstare miseris maluisti; & qualem misericordiam?

Ut servum redimeres Filium tradidisti. Gratias itaque ago omni qua vales virtute infinita pietati tuæ pro copiosa redemptione, qua nobis perditis subvenire dignatus es per eundem Filium tuum, qui mortuus est propter delicta nostra, & resurrexit propter justificationem nostram, & nunc sedens ad dexteram tuam interpellat pro nobis constitutus à te iudex vivorum, & mortuorum. Magna autem sunt beneficia, quæ in assumpta humanitate præstitit nobis: Sacramenta enim instituit, quibus lavamur, mundamur, roboramur, nutrimur, & ad vitam æternam præparamur: exemplis quoque, & doctrina instruxit nos, ut simus sancti, & immaculati in conspectu ejus. Non tamen omnibus prodest, Justissime Deus, efficacissima Christi redemptio: nam multi sunt infideles inimici tui, qui Filii tui Evangelium vel ignorant, vel contemnunt. Me verò nasci fecisti in Ecclesia tua, extra quam non est salus nec vita: & spectabilem me fecisti in domo tua, ut ascenderem ad altare tuum, & offerrem tibi sacrificium in odorem suavitatis. Cumque claudicarem in duas partes, intonuisti de cœlo, & voce tua

10 HOROLOGIVM

commovisti cor meum , ut sequerer te
per semitas justitiæ , per viam Monasti-
cæ disciplinæ. Corpus insuper aptasti
mihi aptum ad animæ functiones , &
fortitus sum te largiente animam bonā.
Impulsus sæpe fui , ut caderem , & tu
me suscepisti. Circumdederunt me ma-
la , quorum non est numerus , & tu me
liberasti. Absconderunt laqueum mihi
inimici mei , & tu eo contrito eripuisti
me. Nullus erit finis , si cuncta bona re-
censere voluero quæ fecisti mihi , quo-
rum multa occulta sunt quæque quoti-
die multiplicantur , donec perveniam ad
cumulum omnium bonorum , ad gloriam ,
quam præparasti diligentibus te. Pro his
omnibus gratias ago tibi , præsertim
quod hanc noctem tranquillam , & in-
columem concesseris : & pro omnibus
item donis , quæ singulis creaturis con-
tulisti , quia ut tibi totus servirem , om-
nia quæcumque fecisti meæ commodi-
rati , & saluti prodesse voluisti. Sit no-
men tuum benedictum in secula , & tibi
pro me gratias agant omnes Angeli , &
sancti tui , teque exaltent quantum pos-
sunt , quia major es omni laude.

Contritio.

Sed vae misero, quia tot beneficiis tuis
Ingratus non cessavi peccare, & of-
fendere te. Non enim feci voluntatem
tuam, sed omnem iustitiam tuam præ-
varicatus sum, & legem tuam non cu-
stodivi. Cecidit super me infelicitas
Cain, vagus enim, & profugus erravi
longè à te currens sine fine per creatu-
ras, quarum species decepit me. Et nunc
recolo vias meas nequissimas in amari-
tudine animæ meæ, & confiteor dede-
cora mea in laude tua. Doleo ex toto cor-
de quod offenderim te, quem amo su-
per omnia, & statuo firmiter non pec-
care amplius, atque omnia potius tor-
menta perpeti, quàm quidpiam scien-
ter perpetrare, quod tuæ displiceat Ma-
iestati. Confirma Domine hanc volun-
tatem, & qui mihi dedisti cognoscere
flagitia mea, da ea ex toto corde dete-
stari, & perfice dolorem meum, sana
languores meos medicamento pœniten-
tiæ, & fac me dignè pro transactis cul-
pis satisfacere. Quia verò non est suf-
ficiens quicquid passus fuero ad prome-
rendam delictorum veniam, quibus te

offendi Deum meum, cujus magnitudinis non est finis : ideo acerbissimam passionem Filii tui offero tibi, merita quoque B. Virginis, & omnium Sanctorum; & cum his omnia opera mea, & gemitus meos, quos ipse nosti. Ignosce Domine, placare Domine, attende, & fac. In tua siquidem bonitate confido quod per merita pretiosi Sanguinis Salvatoris mei Jesu Christi remissurus sis mihi omnia delicta mea, & gratiam uberem largiturus, qua vitam sanctè instituere, tibi que perfectè usque in finem servire valeam.

Petitio.

I Nclina aurem tuam ad preces meas Domine Deus refugium meum, & custodi me hodie à rugientibus præparatis ad escam, ab incurfu, & dæmonio meridiano. Notam fac mihi viam, in qua ambulem, & doce me facere voluntatem tuam. Da cordi meo te desiderare, desiderando quærere, quærendo invenire, inveniando perfectè amare. Expelle à me spiritum elationis, & extingue desideria carnis. Pone custodiam ori meo, ut non delinquam in lingua

mea. Da patientiam in adversis, continentiam in prosperis, terrena despiciere, & amare cælestia. Vilescant mihi omnia transitoria, nec aliquid cupiam extra te. Augere in me fidem, spem, charitatem, & dulcesurum humilitatis tuæ. Ad illum scientiæ gradum fac me pertingere, quo pervenit Apostolus tuus, cum dicebat se nihil scire, nisi Christum, & hunc Crucifixum. Deduc me in semita mandatorum tuorum, & quod à me requiris as faciam, tribue ut sciam. Tu scis Domine quid à te petere debeam, id tu mihi largire, qui solus omnia potes. In te animi confido, & scio quia non confundar.

Oblatio.

TImor, & tremor veniunt super me, cum recogito dies meos, quibus perdite vixi bibens aquam Ægypti, qua sitis non sedatur, & avolans à te, quasi columba seducta non habens cor. Verum nunc ego loquar ad te, cum sim puerilis, & cæcus, & effundam in conspectu tuo querimonias meas afflicti cordis in interpretes, & nuntias ardentissimi desiderii, quo concupisco re-

dire ad te, & meipsum tibi in holocaustum offerre in unione illius sacrificii, quod pro me in Cruce litatum est. Hæc est spes mea multarum, in qua singulariter constitutus non erubescam surgere de pulvere, & excussio mundi jugo accedere ad te, & dicere : *Suscipe me Domine secundum eloquium tuum, & vivam, & non confundas me ab expectatione mea.* Multæ quidem sunt iniquitates meæ, quibus iram merui, sed multo major est misericordia tua, cuius non est finis : Et si ego indignus sum gratia tua, respice in faciem Christi tui pro me pendentis in Cruce : nam ipse veniam postulat pro me gemitibus inenarrabilibus. In ipso, & per ipsum offero tibi omnia peccata mea, ut ea comburas igne ardentissimo charitatis ejus, meque dealbes in sanguine ipsius. Offero etiam tibi post scelera mea, quæ verè sunt mea, omnia bona quæ sūt in me quæ verè sūt tua. Tu enim dedisti mihi & velle, & perficere præveniens me in benedictionibus tuis, & omnis sufficientia mea ex te est. Trado igitur tibi animam meam, omnia viscera mea, sensus meos, & ossa mea, ut possideas me totum tan-

quam rem tuam, & adimpleas me lætitia cum vultu tuo. Suscipe me in bonum cum omnibus verbis, actionibus, affectibus, motibus, cogitationibus, & respirationibus meis, in unione illius oblationis, qua dilectus Filius tuus se & sua obtulit tibi. Et quia particeps ego sum omnium timentium te, offero tibi omnia bona, quæ hodie fiunt in militanti Ecclesia, ut ea suscipere digneris in supplementum imperfectionis meæ. Quicquid dixerò, quicquid fecerò, & cogitavero, totum opto ut tuum sit & ad maiorem tui gloriam, cum omni pura, & simplici ac Deiformi intentione, quam unquam habuit B. Virgo, & omnes Sancti, & ipse Sanctus Sanctorum Redemptor noster Jesus Christus. Et nunc Domine sacrifico tibi quicquid in me & extra me est, renovans vota mea, ut totus tuus sim, nec aliqua creatura in me habeat quicquam. Tu es enim susceptor animæ meæ, & posuisti signum in faciem meam, ut nullum præter te amatorem admittam. Trado ergo me tibi tanquam lutum in manu figuli, & sive me constituas vas ad ignominiam, sive ad honorem, satis superque

gloriosum mihi est in manibus tuis esse,
& per eas quocumque modo contrectari.
Fiat voluntas tua in me, per me, &
de me, in tempore, & in æternitate.

Invocatio Deiparae & Sanctorum.

Dulcissima Virgo Maria, Mater Dei,
& Domini Nostri Jesu Christi, re-
fugium peccatorum, & Mater miseri-
cordia, me hodie, & semper in tuam
singularem custodiam humillima devo-
tione commendo. Statue me juxta te, &
protege ab omnibus inimicis visibilibus
& invisibilibus. Dic animæ meæ salus
tua ego sum. Dirige me servum tuum
in omnibus viis, & actionibus meis,
consolare in omnibus ærumnis, & an-
gustiis; tuere & præserva à cunctis ma-
lis, & periculis. Converte faciem tuam
ad me, cum finis advenerit vitæ meæ,
& in hora illa tremenda consolatio tua
latificet spiritum meum. Omnia potes
quæcumque vis in celo, & in terra, nec
est qui potuit resistere voluntati tuæ.
Omnia enim quæ petis, obtines ab
Omnipotente. Exaudi ergo, & suscipe
preces meas, & noli me aspernari de
tua pietate confidentem. Ecce procido
coram

coram te benignissima Virgo , procido
& adoro in te Filium tuum, tuaque suffra-
gia imploro , ut obtineas deleri peccata
mea, ut concilies cordi meo cor Filii tui,
ut possideat me , & faciat me hominem
secundum cor suum.

Adeste mihi Angeli sancti , signacula
divinae similitudinis , pleni sapientia, &
perfecti decore ; adeste , & defendite me
ab incursu malignorum spirituum , ab
hostium fraudibus , & insidiis. Succen-
dite me illo igne , quem Dominus misit
in terram , & voluit vehementer accen-
di. Vos septem Spiritus , qui astatis an-
te Dominum , ad nutum ejus semper pa-
rati, succurrite peregrinati in hac valle
lacrymarum ; purgate me ab omni for-
de , & infundite menti meae Sancto-
rum splendorem , ut absorpta omni
materia divino amore totus ardeam , &
unus cum Deo spiritus efficiar in ater-
num. Tu S. Michael caelestis militiae
Princeps gloriosissime , adjutor populi
Dei , & electarum animarum susceptor,
qui pugnasti cum Dracone , ejusque vi-
ctor exitisti, veni in adjutorium meum
in hoc anticipati praelio , quod mihi iner-
mi , & fragili cum eodem potentissimo

hoste quotidie gerendum est, ut ei fortiter resistere possim, nunc & in hora mortis meæ. Occurre animæ meæ è corporis ergastulo exeunti, & perduc eam tecum in Paradisum.

Et tu Angele mi Custos, qui semper videns faciem Patris, semper assistis mihi, plenus gratia, & fortitudine, protege me ab incurssione diaboli vigilantem, dormientem, ac ubicumque fuero. Gratias ago tibi pro custodia, & pro dilectione, quam mihi indigno exhibes, tibi que commendo hodie, & quotidie animam meam, & corpus meum. Excita me torpentem, consolare mœrentem, confirma labentem, subleua oppressum, adjuva periclitantem. Sicut mandatum dedit tibi Pater sic fac, & custodi me in omnibus viis meis, ne unquam offendam ad lapidem pedem meum. Ne deferas me in extremo agone versantem, & esto morienti singulare solatium, qui es viventi salutare præsidium.

Salvete Sancti & amici Dei, regni cælestis incolæ felicissimi, vitæ nostræ duces, & defensores. Salvete, & gaudete, quia transacto mortalitatis pelago ad

beatæ tranquillitatis portum jam securi
 pervenistis. Memores estote fratrum
 vestrorum, qui adhuc navigant hoc
 mare magnum, & spatiosum, in quo sunt
 horribilia monstra hianti ore parata ad
 prædam. Eripite nos de aquis multis,
 & de limo profundi, fusis precibus ad
 eum, qui dominatur potestati maris, ut
 statuatur procellam ejus in auram, & si-
 leant fluctus ejus. Mihi autem primi-
 tius adeste gloriosissimi Protectores &
 Tutelares mei, ad vos enim præcipue di-
 rigitur oratio mea, ut me ab omni ma-
 lo vestra tuitione liberetis. Tu sanctis-
 sime Confessor Domini, Monachorum
 Pater, & Dux Benedicte, cujus regulæ
 suavissimo jugo collum subjeci ab ado-
 lescentia mea: Tu qui hoc mense vet-
 anno defensor es vitæ meæ. Vos reli-
 qui Sancti, & Sanctæ Dei N. N. quo-
 rum me patrocinio jam pridem commi-
 si, & quorum hodie festivitas celebra-
 tur, subvenite mihi misero peccatori se-
 denti in tenebris, & umbra mortis, sol-
 vite vincula captivitatis meæ, ut semper
 sim memor mandatorum Dei ad facien-
 dum ea. Misere mini mei saltem vos
 amici mei, Filii matris meæ, quæ sur-

sum est. & liberate me à tumultuantium affectionum turba, ut discam mihi ipsi mori, & illi soli vivere, qui est vera vita, & salus animæ meæ, & merces mea magna nimis.

Postulatio pro vivis, & defunctis.

IXaudi orationem servi tui, Domine Deus noster, misericors, & clemens, & ostende faciem tuam super Ecclesiam tuam, quam ædificasti tibi in fortitudine tua, & in magnitudine brachii tui. Percute dorsa inimicorum ejus, & qui oderunt eam non consurgant. Conserva eam quietam, & tranquillam usque ad mundi consumationem, & portæ inferi non prævaleant adversus eam. Ne despicias populum tuum, quem redemisti tibi pretioso sanguine Filii tui, permaneat in sanctificatione Ecclesia tua, & ne claudas ora canentium te, ut omnes gentes agnoscant, quia tu es Deus, & non est alius præter te. Auge in nobis puritatem fidei, & munditiam sanctitatis. Converte omnes infideles, errores omnes extirpa, ut fiat unum ovile, & unus pastor. Misere-

Romani Pontificis, quem Ecclesiæ tuæ præesse voluisti, ut verbo, & exemplo cunctis præluceat. Da illi iucunditatem cordis, fieri pacem in diebus suis, amplificare gloriam tuam, & populum tuum corroborare. Sit gregi sibi commissæ forma iustitiæ, sanctimonix speculum, pietatis exemplar. Da Cardinalibus Romanæ Ecclesiæ, ut sint sal terræ, & lux mundi, & quasi sol refulgeant in domo tua. Da famulis tuis, quos Archiepiscopos, & Episcopos elegisti, fungi sacerdotio sine reprehensione, & habere laudem in nomine tuo. Concede ut prædicando & exercendo quæ recti sunt exemplum bonorum operum cunctis fidelibus præbeant. Ad esto Parochis, Presbyteris, & omni Clero, ut & ipsi potentes sint opere, & sermone, nulli præbeant scandali occasionem, diligant puritatem, & ea instanter sequantur quæ pacis sunt. Esto propitius omnibus Religiosis, quos separasti tibi in hereditatem de universis populis, ut per angustam viam sequerentur Christum. Da illis nudam pauperatatem, purissimam castitatem, & perfectissimam obedientiam. Fac ut omnes in sua vocatio-

ne optimè vivant, votaue sua, & regulas exactissimè observent: Prælati verò sollicitè vigilent super gregem sibi commissum in omni doctrina, & patientia. Præcipuè verò pro hac Congregatione, ad quam me vocare dignatus es, preces effundo in conspectu Majestatis tuæ, ut spiritualibus proficiat institutis, & temporalibus non destituatur auxiliis. Mitte nobis auxilium de sancto, & de Sion tuere nos, & da nobis veram charitatem, & concordiam, quæ tibi sit placita. Recordare omnium qui laborant in vinea tua, ut palmites ejus extendant usque ad mare, & per universam terram propagines ejus. Effunde miserationes tuas in omnes Reges, & Catholicos Principes, junge eos pace tua, & dita eos observantia mandatorum tuorum. Fac eos diligere justitiam, & facere judicium in omni tempore. Præmiis bonos, & malos pœnis afficiant, tuæque protectione muniti de hostibus sanctæ Crucis lætam victoriam obtineant. Tuum etiam auxilium cunctis Magistratibus præbe, ut pacata gubernatione subjectos regant, teque semper timeant in judiciis suis, & tibi jugi-

ASCETICVM. 23

ter placere contendant. Memento piissime Pater Parentum meorum, omniumque affinium, & consanguineorum, illorumque omnium, qui me corporaliter, & spiritualiter educarunt, quorum curam, & singula, quæ erga me egerunt, sanctissimis operibus filii tui unio, ac tibi offero ad laudem tuam, & eorum salutem sempiternam. Fac eos Domine sic transire per bona temporalia, ut non amittant æterna. Tu qui in misericordia disponis omnia exaudi me clementiam tuam implorantem pro universis, qui in carcere, & captivitate sunt, pro ægrotis, tentatis, tribulatis, desolatis, & afflictis; pro his qui in peccato mortali obdurati sunt, & computrescunt in sordibus suis: Pro his qui persecutionem patiuntur, pro constitutis in agone mortis, aut in aliqua gravi necessitate, ut ex tua largitate libertatem, salutem, consolationem, victoriam, gratiam, donum contritionis, felicem mortem, suarumque necessitatum remedium consequantur. Supplex item oro te, benignissime Deus pro omnibus inimicis meis, quos intime diligo: pro iis qui pravo affectu, & mala voluntate

erga me sunt, vel aliquid contra me
moliuntur, quos ego unquam offendi,
aut scandalizavi, & ad peccatum indu-
xi, vel qui me factis, aut verbis offen-
derunt, vel ad peccatum induxerunt;
ut eis in omnibus beneficias, & pro
infamia, qua me affecerunt honorem,
pro detractionibus bonam famam, pro
odio in me sanctissimum amorem tuum,
& pro omnibus malis adversum me irro-
gatis bona temporalia saluti eorum uti-
lia, & æternam vitam retribuas. Illos
verò, quos ego offendi, aut scandaliza-
vi, protege, & defende ab omni malo,
& gratiam tuam eis infunde, ut per ve-
ram emendationem, & confessionem
omnium delictorum veniam consequan-
tur. Miserere omnium hominum, quos
creasti, Deus omnium, & ostende uni-
versis populis lucem miserationum tua-
rum. Immi te timorem tuum super bar-
baras nationes, ut cognoscant, quia non
est Deus, nisi tu, & enarrent magnalia
tua. Illumina omnes gentes à fide alic-
nas, Turcas, Ethnicos, Judæos, Hære-
ticos, atque Schismaticos: aufer vela-
men à cordibus eorum, & in domum
Ecclesie tue cos intrare compeile. Lu-

geo coram te, Domine hos fratres meos,
qui te non noverunt : & si possem om-
nium istorum intellectibus in te crede-
rem, omnium voluntatibus te amarem,
omnium viribus tibi servirem. Adesto
omnibus qui se commendaverunt indi-
gnis orationibus meis, vel quibus qua-
cumque ex causa debitor sum : omnibus
item amicis, familiaribus, benefactori-
bus, confessoribus, & superioribus meis:
omnibus illis, quorum confessiones au-
divi, & qui se meo patrocinio, curæ ac
tutelæ commendaverunt; Exue illos à
peccatis præteritis, custodi ab immi-
nentibus, præserva à futuris. Vincat te,
pietas tua Rex æternæ, cui omnia vi-
vunt, & propitiare animabus omnium
fidelium defunctorum, parentum meo-
rum, consanguineorum, affinium, ami-
corum, & benefactorum, super quas
invocatum est nomen tuum. Ostende
illis faciem tuam, & pone in conspectu
tuo preces Ecclesiæ tuæ sponsæ tuæ, quæ
pro illis clamat ad te die, ac nocte. Li-
bera eas de ore Leonis, ut cantare in-
cipiant canticum novum, misericordias
tuas fideles, teque collaudent cum ca-
teris sanctis tuis gloriosum, & beno-

26 HOROLOGIVM
dictum in secula seculorum. Amen.

§. III.

Alia Oratio brevior.

AD te à quo sum , & per quem vi-
vo, sentio, & intelligo: ad te sum-
mum bonum meum , qui es principium
meum , & finis ultimus : ad te levo ma-
nus meas, & cor meum, Sancta Trini-
tas unus Deus, teque omnium creatu-
rarum possibili affectu laudo, glorifico,
& adoro toto corde, & corpore prostra-
tus, atque in centrum terræ, meique ni-
hili infra omnes creaturas me prorsus
abdo, ac demitto. Dignus es Domine
omni honore, & gloria, & gratiarum
actione, quia cum non essem, creasti me
ad imaginem, & similitudinem tuam:
& cum perditus essem, pretioso Filii tui
sanguine redemisti me, & Sancti Spiri-
tus gratia sanctificasti me: à multis ma-
lis me præservasti, peccantem tolerasti,
& ad pœnitentiam expectasti. Insuper
me indignissimum servum tuum specta-
bilem fecisti in domo tua, ut offerrem
tibi quotidie sacrificium Corporis, &
Sanguinis Domini mei Jesu Christi. Pro

his, & aliis innumeris beneficiis, quæ mihi misericorditer præstitisti, præsertim quod hanc noctem tranquillam, & incolumem concesseris, gratias ago tibi rogans humiliter, ut delicta mea multa, & magna dimittas mihi; ea enim agnosco, & confiteor cum vero proposito emendationis. Utinam te infinito amore dignissimum semper perfectè amassem, & nunquam tot peccatis, & negligentis offendissem. Doleo de his omnibus, & singulis ex totis præcordiis meis purè propter te Deum meum summe amabilem. Ignosce mihi Domine, & infunde timorem tuum sanctum, fidem vivam, firmam spem, ardentem charitatem, & omnes virtutes, quibus indigeo. Custodi me hac die ab omni malo, & doce me facere voluntatem tuam. Dirige omnia verba, cogitationes, & opera mea ad maiorem tui gloriam, & salutem animæ meæ, & fac me ita creaturis uti, ne me separent ab amore tuo. portas sensuum meorum ita custodi, ne quis eas intret nisi missus à te. Propter te Deus meus, conabor hodie omnia peccata, & defectus cavere, præsertim loquacitatem: & proficere in virtutibus, præ-

cipue in humilitate. Datu quod jubes, & jube quod vis. Credo, Domine, quicquid per Ecclesiam tuam Catholicam credendum proposuisti. Omnem spem meam in tua bonitate, meritisque Domini mei Jesu Christi repono. Diligo te totis viribus, tota mente, tota virtute. Tuæ legi obediens ero usque ad mortem, quam pro tuo amore, & honore lubens subire paratus sum quacunque hora tibi placuerit. Adversa omnia de manu tua libenter accepto, omnes amicos, & inimicos propter te, & in te diligere volo; si aliter fecero, errantem revoca, & meam etiam rebellem ad te compelle propitius voluntatem. Renovo vota mea, quæ distinxerunt labia mea, eaque tibi offero, & cum illis quicquid habeo, quicquid sum, quicquid possum. Offero tibi filii tui ardentissimum in te amorem, Beatæ Virginis sanctitatem, puritatem Angelorum, Patriarcharum fidem, Prophetarum constantiam, labores Apostolorum, pœnas Martyrum, Confessorum patientiam, castimoniam Virginum, omniumque Justorum virtutes; ut ipsi, qui tibi placent, pro me intercedant & meam supplicant

imperfectionem. Quod si mihi tot vitæ forent, quot stellæ in Cælo: si omnia regna, & divitias mundi possiderem, cuncta libenter Majestatis tuæ obsequio impenderem. Confirma Domine hanc voluntatem, & exaudi orationem servi tui. Tu quoque post Deum tota ratio spei meæ, Beatissima Virgo Maria, Domina & Patrona mea benignissima, adesto mihi miserrimo peccatori. Gratiarum ago tibi quod tuis meritis, & patrociniis usque ad hanc horam perveni. Ego me hodie, & quotidie tuæ Fidei, & tuitioni committo. Suscipe me Mater amabilissima in servum, & filium tuum indignissimum, & præserva ab omni malo animam meam, nec me deseras in hora mortis. Impetra mihi omnium peccatorum remissionem, impetra perfectam mortificationem, & introversionem, ut sim homo secundum cor Dei.

Et tu Angele Sancte, potentissime, & fidelissime Custos animæ meæ, defende me ab omnibus insidiis malignorum spirituum, omnes peccandi occasiones amove, sanctas cogitationes inspira, dirige verba, & opera mea secundum Dei voluntatem; tuere me in ultimo vitæ

agone, & pro me semper intercede. Gratias tibi ago pro custodia, quam indigno clienti tuo hac nocte impendisti; omnesque tecum beatissimos Spiritus imploro, ut in omnibus necessitatibus, & angustiis meis adsistant mihi.

Vos item invoco Sancti, & Electi Dei omnes, vos præsertim Patroni mei suavissimi, & quandoquidem de vestra salute securi estis, de mea solliciti esse dignemini. Laudate, benedicite, & superexaltate Dominum mecum, & pro me; mihi que gratiam obtinete illum perfectè cognoscendi, & amandi in via, ut demum in patria eo perfruar vobiscum in æternum.

Sed nunc iterum coram te effundo deprecationem meam Domine Deus meus, tibi que omnes hodie commendo, pro quibus orare teneor, ut in cunctis necessitatibus suis opem tuam sibi sentiant adesse. Respice Ecclesiam tuam, eamque pacificare, & coadunare digneris unà cum Papa nostro N. cunctisque Episcopis, & Pastoribus, omnique Clero: fac eos in tuo servitio ferventes, ut cum grege sibi commisso ad vitam perveniant sempiternam. Respice Reges, &

Principes, omnemque Magistratum: da illis sapientiam, & concordiam zelumque iustitiæ, & Religionis. Commendo tibi omnes domesticos, & familiares, consanguineos, & affines, benefactores, & adversarios; concede omnibus, & singulis quod scis eis expedire ad salutem mentis, & corporis. Da afflictis consolationem, infirmis sanitatem, peccatoribus veniam, iustis perseverantiam, vivis pacem, & requiem defunctis. Amen.

§. IV.

Tertia Oratio brevissima.

ANte thronum gloriæ tuæ, mente, & corpore procumbens, ô Beatissima Trinitas, Pater, Filius, & Spiritus Sanctus, Deus meus & omnia tanquam figmentum manuum tuarum à te in omnibus, & per omnia dependens, omni qua possum humilitate, & devotione adoro te: atque ex intimis visceribus tibi gratias ago pro creatione, redemptione, conservatione, Sanctissimis Sacramentis, vocatione ad statum religiosum, & pro aliis innumeris benefi-

ciis mihi, & toti mundo concessis; præsertim verò quia ad initium hujus diei me incolumen perduxisti: Millia millium caelestium agminum ministrantium tibi, & decies millies centena millia assistentium tibi, te ex me glorificent: atque omnes creaturae collaudent, & nomen tuum gloriosum superexaltent in secula. Mihi verò Domine, rubor confusionis est, neque audeo oculos meos levare ad te, quia peccavi tibi, & omnem justitiam tuam prævaricatus sum. Ignosce confitenti, Pater misericordiarum, & vide dolorem meum. Detestor omnia peccata mea, abominor ingratitude meam, & malo incurrere omnem pœnam quàm deinceps te offendere. Si lapsus fuero, operi manuum tuarum porrige dexteram, & dirige gressus meos in semitis tuis. Aufer à me quicquid tibi displicet, & da quicquid tibi placet. Posside me jugiter secundum beneplacitum tuum, & perfectionem in spiritu monastico tribue, ut gaudium meum sit plenum. Da ut hodie, & semper tibi soli vivam, te solum quæram, & universa despiciam. Perfunde me spiritali jucunditate, ut te in omnibus, & ubi-

que inveniam, ac tandem per felicem mortem ex amore, & in amore tuo ad te merear pervenire. Tibi me totum, æterne Deus, omnesque animæ, & corporis vires, quicquid intra me & extra me est, offero, & immolo. Omnes cogitationes, omnia verba, & opera hujus diei, ac totius vitæ meæ suscipe obsecro unita operibus, verbis, & cogitationibus Filii tui ad majorem tui gloriam, & proximorum salutem. Tibi enim sincerè servire decerno propter te solum, Deus meus, quia ex te, in te, & pro te sunt omnia, qui es summum bonum meum, & ultimus finis. Ostende mihi & omnibus pro quibus orare debeo viam in qua ambulemus, libera nos ab omni malo, & da fidelibus defunctis requiem sempiternam. Adeste & vos beatarum agmina mentium, tuque in primis Beatissima Virgo Maria, unica post Deum spes, & protectio mea: tu Angele mi custos cum omni Angelorum exercitu; vos sancti mei tutelares, vos omnes electi Dei inopem juvate, jacentem erigite, & peregrinanti in hoc exilio, atque in tenebris sedenti lumen, opem, & perseverantiam impetrate. Pax

& benedictio Domini mei Jesu Christi,
 & virtus sacratissimæ passionis ejus ; si-
 gnum sanctæ Crucis , & titulus trium-
 phalis Jesus Nazareus Rex Judæorum ;
 integritas purissimæ Virginis Mariæ , cu-
 stodia sanctorum Angelorum , & suffra-
 gia omnium Sanctorum sint inter me , &
 omnes inimicos meos visibiles , & invi-
 sibles , hodie , & semper , & in hora
 mortis meæ. Amen.

§. V.

Aspirationes pro initio diei.

D*Vm indueris.* Indue Domine ani-
 mam meam veste nuptiali charita-
 tis , quæ operiat multitudinem peccato-
 rum meorum , & immensis monilibus
 virtutum exorna me.

Largire animæ meæ vestes , & orna-
 menta , quæ eam maximè deceant ne
 appareat coram te , & sanctis Angelis
 tuis deformitas mea.

Præcinge lumbos meos , purissime Je-
 su , cingulo castitatis , & pudicitia , ut
 viam mandatorum tuorum expedite cur-
 rere possim.

Actus Fidei. Scio Domine scriptum

esse, quod iustus ex Fide vivit; ideo propono secundum principia Fidei hac die vivere. Adjuva me gratia tua, ut sicut credo, ita vivam.

Confirma, & adauge Fidem meam, quia sine Fide impossibile est placere tibi: Quicquid autem acciderit mihi Fide roboratus securus, & immobilis ero, & nomen tuum glorificabo.

Offero tibi Deus meus, vitam, & sanguinem meum pro Fidei assertionem, & testificationem. Verissima sunt omnia quæ revelasti, idque constantissimè per gladios, & ignes, te adjuvante profitebor.

Actus Spei. In te Domine speravi, non confundar in æternum. Tu adiutor meus, & protector vitæ meæ. In te hodie eripiar ab omni periculo, & tentatione, & in Deo meo transgrediar murum.

Dixisti Domine, & ita est: Sine me nihil potestis facere. Ideo in me nihil confido, quia nihil sum: in te autem tota fiducia mea est, quia tu salus mea es, refugium meum, & firmamentum meum.

Quicquid molestum mihi evenire permiseris, benignissime Pater, semper in

te sperabo ; certus sum enim quia si in inferno demersus fuero , inde me liberabis.

Actus Charitatis. O dulcedo cordis mei , & vita animæ meæ , Domine Deus meus , sciote infinitè amabilem esse , & infinito amore dignissimum. Utinam tanto te prosequi possim , quantum meritis : Gaudeo tam magno te amare te ipsum , ipsiunique amorem tuum offero tibi.

Fecisti nos Domine ad te , & inquietum est cor nostrum , donec requiescat in te. Vana sunt omnia extra te , & ideo abduci cupio ab amore omnium creaturarum , & te solum diligere tota mente , toto corde , totis viribus : in te vivere , & pro te mori. Fac me voti compotem , qui solus potes , Deus amor meus , & centrum cordis mei.

Quando me totum in te rapies suavissime Jesu ! Quando me totum illo igne succendes , quem misisti in terram ! Te desidero , ad te suspiro , tolle à me quicquid impedit amorem tuum. Valida vis amoris tui omnium rerum terrenarum pondus à me excutiat. Sola voluntas tua , Deus meus , & purus amor tuus absor-

beant voluntatem meam, & omnes potentias, & sensus meos, ita ut omnia opera, verba, & cogitationes meæ fiant, & sint secundum voluntatem tuam, & propter purum amorem tuum.

In æternum id volo, quod tu ab æterno de me decrevisti. Vivat semper & regnet super me æternum tuum beneplacitum. Domine verte me quo vis, gira, & regira, fac de me quod tibi placet: & si repugnabit infirmitas mea, non audiat bonitas tua.

Oderit me, Deus, omnis creatura, omnis homo me conculcet, & despiciat. Tu solus me diligas, te solum omnes diligant, qui solus amore dignus es. Fiat hic de me justitia, & iudicium, ut illic reservetur mihi misericordia tua.

Amor meus, Deus meus, utinam nihilum meum in immenso, & infinito oceano essentiaæ tuæ tanquam guttula in mari submersum, & dispersum nullibi reperiat extra te.

Exeam Domine à mundo, ejusque concupiscentiis, exeam à me ipso, ut in te solo subsistam. Quis me liberabit de corpore mortis hujus? Quando veniam, & apparebo ante faciem tuam?

Trahe me post te , Deus meus , quia nemo potest venire ad te , nisi tu traxeris eum. Trahe me magna , & efficaci gratia tua , & curram ad te.

Pater meus es tu Domine , & ego filius tuus. Da mihi portionem substantiæ quæ me contingit. Sed portio mea tu es , Deus meus : aliam non quero , nec admitto. Illabere cordi meo , & omnibus potentiis meis , Deus vita mea , & amor meus , ut intimè tibi unitus tua semper tuitione protegar ab impetu inimicorum meorum.

Domine Jesu , qui pro me ludibrio haberi , pati , & mori voluisti ; etsi possem divitiis abundare , nolo , quia tu pauper fuisti : si possem ab omnibus honorari , nolo , quia tu sperni voluisti : Quicquid mundus avidè amplectitur , detestor , & abominor propter te , qui Crucis ignominiam pro me amplexus es. Moriar hodie mihi ipsi , ut in te vivam Deus meus ; sit vita mea cum Christo abscondita in te : sintque omnes affectus mei cum Christo in te sepulti.

Do tibi Domine , & offero cor meum , ut illud impleas amore tuo , & sapientia tua , ut secundum te vivam & in te , & tu solus regnes in me.

Omnia jura libertatis meæ in manibus tuis fideliter resigno, ut ea utaris secundum beneplacitum tuum in tempore, & in eternitate. Sive me velis abundare, sive penuriam pati; sive vivere, sive mori; fiat voluntas tua.

Amo te Deus meus, quantum possum: quantum gratiâ tuâ mihi largiris, & gaudeo quod infinitè amabilis es.

CAPUT II.

DE HIS QUÆ QUOTIDIE occurrunt.

§. I.

De singularum actionum perfectiōe.

IN hoc sita est potissima ratio profectus tui, si ea quæ quotidie occurrunt justè, & sanctè peragas. Vita enim spiritualis nihil aliud est, quàm series quædam, & catena bonarum exercitationum à mane usque ad vespertam, & à vespere usque ad mane. Facit ad hanc rem Scriptura dicens: *Mandatum hoc quod*

ego precipio tibi hodie non supra te est, neque procul positum, nec in cælo situm, ut possis dicere. Quis nostrum valet ad cælum ascendere, ut deferat illud ad nos, & audiamus, atque opere compleamus? Sed juxta te est sermo valde in ore tuo, & corde tuo, ut facias illum. Non ergo consistit perfectio in multiplicatione operum sublimium, & extraneorum, sed in his quæ quotidie agis optimè, & secundum virtutem exercendis. *Iuste quod iustum est persequeris.*

Ad hoc autem ut opera tua plena, & perfecta coram Deo inveniantur, juvabunt hæc documenta.

Primò distribuendum est tempus, & singulæ actiones ita ordinandæ sunt, ut quantum fieri potest, omnia suis horis peragantur. Cave ne multitudine, aut nimia frequentia exercitiorum te obruas, sed exempla Sanctorum imitare, quorum semita ut lux splendens paulatim crescebat, usque ad perfectam diem. Sint apta statui, ætati, & profectui tuo, & quæ semel elegisti, ne facilè mutes. Dedecet inconstantiam, & nocet crebra mutatio.

II. Omnia propter Deum recta, & simplici intentione agenda sunt, omni
alio

alio fine excluso, ne fiant hostes tui in capite, & à prava intentione totum opus polluat. Difficile est omnem gloriæ cupiditatem, omnes humanos respectus, omnem sui quæstionem excludere, & Deo tantum iudice contentum esse: ideo ante quodlibet opus subsiste paulisper, nec ab uno ad aliud transi sine prævia aliqua consideratione, qua ipsum opus ad Deum referas, & ad solam gloriam ejus.

III. Cave ne in progressu operis impuritas aliqua subrepat, ne tristitia, vel impatientia ob laborem, ne delectatio, vel propria satisfactio permisceatur, & voluptatis gratia expleas, quod propter Deum incæpisti. Quapropter miscendæ frequenter aspirationes, sive orationes jaculatoriæ, quibus anima elevetur ad Deum.

IV. Permagni interest omnia facere coram Deo presente, & vidente, ejusque auxilium jugiter implorare. Nihil enim à te ipso potes, & ab eo pendet, velut radius à sole, & malleus ab artifice. Ipse est qui operatur omnia in omnibus, ipse vires agenti subministrat.

V. Monet sapiens, ut in omnibus ope-

ribus tuis præcellens sis. Id assequeris si omnia feceris cum debita omnium virium mentis, & corporis applicatione, serio conatu, & omni meliori modo, quo fieri possunt: si nihil obiter, nihil perfunctoriè aggrediaris, nec ullam quantumvis minimam actionem negligas, nihil enim minimum est quo ingentem Deo gloriam reddere, & magnas tibi divitias comparare potes: si denique attentus sis non solum ad opus, sed ad omnes ejus circumstantias, quia bonum est ex integra causa; malum ex quocumque defectu.

VI. Cum pretium actionum externarum potissimum pendeat ex actibus internis intellectus & voluntatis, in omni prorsus actione præcipua eorum ratio habenda est! Ex parte intellectus prærequiritur circumspectio, & præconsideratio, qua prævideas, in quo perfectio cujusque actionis consistat, quis sit ejus finis, quis modus, qui defectus in ea committi soleant, quomodo præcaveri possint. Ex parte voluntatis exigitur vehementius desiderium propositum opus perficiendi, promptitudo in operando, magnanimitas in removendis difficulta-

tibus, constans deliberatio evitandi omnem defectum, & ad executionem seria omnium facultatum applicatio.

VII. Circa exteriora ita occupari par est, ne devotionis internæ spiritus extinguatur. Imò cum operibus externis semper conjungere oportet actus internos diversarum virtutum, atque sic efficere, ut materialiter, & formaliter bona sint, & conformia operibus electorum Dei, quorum omnis pulcritudo ab intus.

VIII. Cum aliquid agendum est, illi duntaxat operi corpore, & mente incumbere, quod præ manibus habes, omni vel minima de ceteris cogitatione, vel cura posthabita; nam omnia tempus habent, & sufficit diei malitia sua. Astus diaboli est injicere de futuro opere solitudinem ut sic præsens male fiat. Accedit quod naturaliter actio futura trahit attentionem, & majorem facit in mente impressionem, nisi solerter tibi ipsi attendas. Age quod agis tranquillè, nece præcipites in opere, ut ad aliud festines. Operare modestè, cum hilaritate, sine strepitu, & perturbatione, ac si nihil aliud restaret agendum.

ix. Semper ante oculos versari debet ultimus dies, atque ita unumquodque opus perficiendum, ac si illud postremum foret. Considera an sic ageres, si statim mori deberes. Tibi semper æternitas in mente sit, cui laboras, ad quam pergis. Operibus tuis vel januam tibi à pœnis felicissimæ æternitatis, vel quibusdam quasi seris, & vectibus claudis.

x. Cave ne in fine operis boni venenum ei dæmon inspergat, qui observat calcaneum tuum. Gratias Deo age, à quo omne bonum procedit, ipsique non tibi gloriam adscribe, ne dicas cum impiis: *Manus nostra excelsa, & non Dominus fecit hæc omnia.* Agnosce te servum inutilem esse, & cum intimo humilitatis sensu veniam de commissis defectibus deprecare.

xi. Opere peracto ne de aliorum iudicio sollicitus sis, nec turberis si res minus prosperè successit. Deus enim non tam spectat quid factum sit, quam quomodo, & qua intentione. Gaude potius de confusione tui, si qua fuit, & culpam detestare cum proposito emendationis.

xii. Te ipsum denique, & omnia ope-

ra tua offeras Deo in unione illius oblationis qua Christus Dominus seipsum obtulit Patri, dum nobiscum in terris viveret. Tuas orationes ejus orationibus, tua jejunia ejus jejuniis, tuas afflictiones ejus passioni, atque omnes prorsus operationes tuas operibus ejus adjunges, considerans jam hæc omnia ab ipso Christo unà cum suis operibus Deo Patri oblata fuisse: & ideo cum ejus oblatione tuam etiam concludes ex utraque unam faciens, quia ipse est viam per quam itur ad Patrem.

§. II.

De lectione spirituali.

I. **S**icut vita corporalis absque cibo materiali & corruptibili produci nequit, & conservari, ita proxima mortis est anima, quæ cibo suo, lectione scilicet spirituali destituta est. Non in solo pane vivit homo, ut Christus docet, sed in omni verbo quod procedit de ore Dei. Et Apostolus, Omnis scriptura, inquit, divinitus inspirata utilis est ad docendum, ad arguendum, ad corripiendum, ad erudiendum in justitia, ut per-

fectus sit homo Dei, ad omne opus bonum instructus. Sunt enim libri spirituales mystica illa mensa, quam divina sapientia proposuit in domo, quam sibi ædificavit, abundans pane, & vino; doctrina scilicet, & affectibus, quibus anima nutritur, crescit, & roboratur.

II. Delectus librorum habendus est in tanta eorum multitudine: nec enim sufficit pios, & bonos legere, sed debent præterea tuo instituto, genio, spiritui, & capacitati esse conformes; ita omnia, quæ leguntur, ad propriam vivendi normam dirigantur.

III. Certa hora diei huic lectioni assignanda, quam præterire nefas sit. Differri quidem aliquando poterit, si quidpiam necessarium hora lectioni destinata omnino peragendum supervenerit, nunquam tamen omitti debet. Seligenda autem erit hora aliqua matutina, quæ utilior, & commodior erit, & aliis occupationibus minus obnoxia.

IV. Ante lectionem brevi oratione præpara animam tuam, ut Deus, & Dominus noster adaperiat aures cordis tui, quatenus possis discere quæ recta sunt, & ea opere complere. Tum eam aggre-

dere pura intentione Deum clariùs cognoscendi, ardentius amandi, studiosius illi serviendi in omni sanctitate, & iustitia. Anhela ad illam magno sensu pietatis, & fervoris, tanquam ad epistolam divinæ voluntatis interpretem tibi exuli è patria cœlesti missam parato animo ad ejus jussa & consilia exequenda.

v. Eo spiritu legendi sunt libri sancti, quo sunt conscripti, spiritu nimirum charitatis, pietatis, & utilitatis, non ut doctior, sed ut melior evadas. Ad hunc finem eos sancti viri divinitus inspirati composuerunt, ut sint tibi quasi speculum, in quod respiciens anima seipsam agnoscat & emendet.

vi. Non multos libros perfunctoriè, sed paucos legito accuratè, cum debita mora, tractim, & quietè, ut divinæ illustrationi, & inspirationi locus relinquatur.

vii. Fortuita lectio in tristitia, tentatione, dubietate sæpe opportuna fuit. Sic sanctus Augustinus aperiendo librum in aptum sibi locum incidit: *Non in commensationibus, & ebrietatibus, non in cubilibus, & impudiciis, &c.* Verùm extra similem occasionem vitanda est,

quia dissipat, & non ædificat. Inchoandus autem ab initio est liber, nec dimittendus donec ex integro per ordinem absolvatur.

VIII. Inter legendum divinis inspirationibus aditus pateat, ut solidarum virtutum desideria concipias. Idcirco sæpe hauriendus de lectionis serie affectus, & formanda ex lectione oratio, crebræque ad Deum & sanctos inferendæ aspirationes, quæ lectionem interrumpant, & non tam impediunt interrumpendo, quàm puriorem continuo animum ad intelligentiam sectionis restituant.

XI. Semper aliquid de lectione notatū dignum excerpe, & libello ad hoc parato excipe, quod memoriæ fideliter mandetur, crebrius ruminetur, ignem devotionis interdiu foveat, & detineat animam ne aliena cogitet. Ipsam verò lectionem brevi gratiarum actione concludes, Deique auxilium implora ad id rectè obeundum, quod propositum, & constitutum est.

§. III.

De studio literarum.

INter adiaphoras Religiosorum occupationes vix aliqua laudabilior reperitur, quàm studia literarum. *Dum enim secularibus literis instruimur*, ait Gregorius Magnus, *in spiritualibus adjuvamus*. Et Oseas Propheta, *Conticuit populus meus, eo quod non habuerit scientiam: & quia tu scientiam repulisti, repellam te, ne sacerdotio fungaris mihi.*

1. Ut autem studiis tam humanarum, quam divinarum scientiarum optimè utaris, scito in primis id tibi cavendum esse, ne ingenio, & doctrina abutaris ad superbiam, arrogantiam, contemptum aliorum, vanitatem, curiositatem, & neglectum pietatis ac disciplinæ. Perversum est studium, quod officit orationi, ad quam omnis scientia dirigi debet. Religio non schola literarum est, sed præcipuè, ac ferè unius virtutis. Sancti Viri, qui doctrina maxime claruerunt, ita studio incumbabant, ut tamen scienter plus sibi esse ab oratione luminis, & sapientiæ expectandum. Memor ita-

que finis, & scopi studiorum tuorum omnino tibi persuade spiritum cum literis, & virtutem cum scientia non solum conjungendam, sed longe esse præferendam: ideoque res spirituales exactè primo loco quærendas, tempusque optimum illis tribuendum: nam scientia, quæ pro virtute despicitur, per virtutem postmodum melius comparatur.

11. Purè propter Deum studere debes, ut ipsum magis amare discas, & proximo prodesse possis; præcisa omni sinistra intentione propriæ æstimationis, delectationis, curiositatis, naturalis propensionis, aut commodi alicujus temporalis.

111. An pura intentione feraris ad studia, his indiciis dignosces. Si non intempestivè, non nimis fervidè, sed devotè, & cum magna mentis tranquillitate ea aggrediaris: Si nullam propter ipsa orationem omittas, nullam tui instituti regulam negligas: si inter studendum sæpe ad lumen æternum confugas; Deum, Angelos & sanctos invoces, & consulas, atque ad Deum à creaturis ascendas: si post studia oratio, & colloquia de Deo sapiant: si humiliter de te

loquaris totum Deo tribuens , nec te de ingenio , facilitate , & plausu jactes.

IV. Media efficacissimæ proficiendi in scientiis hæc sunt. Indefessum studium majoris puritatis , & tranquillitatis conscientiæ , & solidioris perfectionis. Assiduum exercitium mentalis , & vocalis orationis. Usus mortificationis in tædio vincendo , qui in studiis occurrere solet in superanda repugnantia se humiliandi in coercenda nimia curiositate , & auiditate sciendi : in frenando appetitu laudis , & ostentandæ eruditionis. Seria denique applicatio , & accurata observatio ordinis , & distributionis temporis , atque modi studendi.

V. Cum magna dissidentia tui , & confidentia in Deo cujus amore studes gratiam proficiendi in literis secundum ejus beneplacitum obnixè pete per merita Christi , & Sanctorum internis suspiriis , & aspirationibus , aut brevi aliqua oratione vocali.

VI. Cave duo extrema , nimiam scilicet propensionem ad studia , & inordinatum excellendi desiderium cum dispendio devotionis , humilitatis , & valetudinis : & nimiam è contrà atque in-

discretam propensionem ad pietatem cum studiorum detrimento. Suum utrique exercitationi tempus tribuendum est, exemplo Sanctorum, qui utrumque studium eximio cum profectu semper continuarunt.

§. IV.

De corporali Refectione.

i. **S**emel in die cum jejunamus, bis ceteris diebus corporalem sumimus refectionem. Sic autem sumi debet, ut dum reficitur corpus, mens quoque reficiatur. Et primo quidem cum signum refectionis datur, eam esse vocem estimam Domini Jesu vocantis te, & invitantis ad prandium: cui respondebis, *Ecce venio*, Domine, gratias tibi agens quia me dignatus es ad tuas epulas invitare. Tunc tuis benigne pascis, qui nec bucellam quidem panis mereor. O! immensam vim benignitatis tuae qua vilissimum servum paenis duntaxat dignum tot bonis cumulare non cessas! O quanti pauperes fame pereunt, cum mihi indignissimo nihil desit! Da mihi Domine operari non cibum qui perit.

sed qui permanet in vita æternam.

II. Ducat te ad mensam necessitas, non concupiscentia, ne similis sis jumentis insipientibus. Excita compunctionem, considerando fel, & acetum Christi, & Sanctorum mortificationem: Excita timorem, quia in medio laqueorum es, laqueos manducas, & bibis: Excita gratitudinem, & amorem erga Deum ob cibum tibi præstitum in tempore opportuno:

III. Aspira ad Deum & dic: O si tam devotè, temperanter, modestè vires corporis reficere possem, ô bone Iesu, sicut tu olim in terris! D si lerò id ardentè & purè ad majus tuum obsequium, & beneplacitum, meumque & proximorum emolumentum impensius procurandum: Tu qui nosti fragilitatem meam in reprimenda gula concupiscentia, adjuva me, & perfice desiderium meum. Da mihi veram temperantiæ virtutem, tu qui felles & aceto potatus fuisti, & quia corpus, quod circumspicitur corruptibili cibo sustentari præcipis, da sic ei necessaria dare, ut nec improbè insole scat ex vitiosa superfluitate, nec deficiat in servitio tuo ex indiscreta parcitate. Inspira con-

34 HOROLOGIVM

gruum moderamen, ne, cū terra de terrenis sustentatur, Dominus terra, à terra sua provocetur ad iram. Da corporis vires ita reparare, ut tam mentis, quàm corporis castitas nullum patiatur detrimentum.

IV. Inter edendum leges modestiæ, & temperantiæ serva. Quantum cibi sumendum sit ànimo libero ante mensam præfinias, & si te gula tentaverit ex statuta mensura aliquid subducito. Omnia fercula, ac si tibi de cœlo missa sint, accipe sine murmuratione. Omnes buccellas sanguine lateris Christi intinge; & si quid contingat insuave, felle Christi condi. Cum bibis, suspira ad Deum, sicut cervus ad fontes aquarum.

V. Dum corpus edendo reficis, animo quoque suum præbe alimentum vel piis colloquiis, vel lectione spiritali, cui diligenter attendes, selectiora observans, & congruos ex ea affectus eliciens.

VI. Tuæ refectioni semper aliquem actum mortificationis intermisce, cujusmodi sunt: aliquid sēper ex appositis in quæ immoderatiùs fertur appetitus, quantumvis modicum sensualitati sub-

A S C E T I C V M.

33

trahere, & Christo relinquere: stricte sensus custodire, oculos ab evagatione, linguam à jocis, & verbis otiosis, vultum à risu, totum corpus ab omni motu inordinato. Semper à mensa cum aliqua fame recede, ita ut post refectionem legere, vel orare possis sine gravi incommodo, & difficultate.

VII. Initio mensæ consuetam benedictionem, & in fine gratiarum actionem graviter & devotè persolve. Et quia raro debita mensura servatur, nec ullus est adeo accuratus, qui non rapiatur aliquantulum extra metas necessitatis; de hoc aliisque defectibus discussa breviter conscientia, veniam pete, & propone deinceps solidam emendationem.

§. V.

De externa conversatione.

QUoniam vix fieri potest, quin sæpe per diem cum hominibus converseris, satagendum est, ut talis sit conversatio tua, quæ omnibus profit, nemini obsit: sicut scriptum est: *In omni conversatione vestra sancti sitis.*

Prima autem ejus conditio est moder-

stia, quæ decorum servat in motibus, gestibus, & exteriori compositione. Ad hanc magnopere conducit timor quidam, & laudabilis pudor, qui te in officio contineat, & semper revocet ab omni impudentia, procacitate, effusione, & libertate. Ejus actus sunt vestes mundas habere, quietas manus, faciem hilarem, frontem serenam, demissos oculos, gravem incessum, sermonem placidum, risum discretum, mores ingenuos, totumque corpus ita compositum, ut nihil appareat in te, quod possit offendere intuentes. Atqui hoc mirabile est videri, & prodesse, soloque aspectu allicere videntes ad pietatem. Porro vera modestia ex interna morum gravitate procedit.

Secunda conditio est suavitas, sive benignitas. Nihil enim tam facile illabitur humanis sensibus, animosque conciliat, quam comitas, affabilitasque sermonis, honor verborum, & morum facilitas. Quicquid honoris, & reverentiæ sibi invicem exhibent seculares in externa vitæ consuetudine, id tibi etiam usurpandum, sed longè dispari ratione. Nam apud illos nihil aliud hæc sunt, quam

verborum lenocinia , & formulæ quædam urbanitatis , & politici obsequii : apud te actus erunt virtutis , & charitatis. Quàm sancta , & innocenti observantia sancti Patres Antonius Magnus, & Paulus primus Eremita adinvicem contendebant in partitione panis , cùm alter alterum honore prævenire , & neuter cedere vellet ! Hoc fomentum fraternæ charitatis est, & conscientię bonæ ac animi illustris evidentissimum testimonium deferre aliis honorem , & mutuis officiis decertare. Superiores itaque tanquam Christum alloquere , æquales sicut fratres carissimos , inferiores ut filios. Sit conversatio tua suavis, hilaris, seria, pura, tranquilla, serena, quæ nec aulicissimum redoleat, nec rusticitatem. Sit gravis sine severitate, læta sine dissolutione, humilis sine abjectione, plena candoris, & gratiarum, expers insolentię & levitatis. Hac autem lege prohiberis evitare nugas, jocos, assentationes, & quicquid religiosæ gravitati detrimentum afferre potest.

Tertia est prudentia, quæ lucebit in conversatione tua, si apta, & proportionata fueris iis, cum quibus versaris ;

aliter enim cum potentibus aliter cum humilibus agendum est : aliter cum viris, aliter cum mulieribus : aliter cum doctis, aliter cum ignaris. Si conveniet ætati, statui, conditioni, & capacitati tuæ : nam quedam juvenem decent quæ seni dedecori forent : quedam secularibus licent, quæ Religiosis infamix notam inurent. Nosce etiam, & conserva tempus. Sit sermo suavis, brevis, & pondere plenus. Disceptatio, si necessaria fuerit, sine ira sit, monitio sine asperitate, hortatio sine offensione. Denique imitare Apostolum, qui omnia omnibus factus est, ut omnes salvos faceret.

Quarta demùm est utilitas. *Vena vitæ os / uili*, ait Sapiens. Et vir quidam eximius dicebat, Tales esse oportere Religiosos, ut ab illis abirent homines percutientes pectora sua, & dicentes, *Verè filii Dei sunt isti*. Veteres sane Philosophi profitebantur suo se consortio homines facere meliores. Ita & tu, si verè Religiosus es, optimi servi Dei partibus fungere. Trahe ad Dominum quoscunque potes, sit omnis narratio tua in præceptis Altissimi, nec permittas quempiam à te discere sine aliquo spirituali.

emolumento. Patiens esto ad omnes: & si quis te spernat, si quis contradicat, si quis verba proferat acerba, inepta, puerilia, si acerbis moribus sit præditus, & ingenio refractario, cave ne eum contristes, sed te suaviter omnibus accommoda, ut omnes lucreris. Omnium dicta, & facta in meliorem partem interpretare, quantum licet, aliorum infirmitati condescende. Animum non prorsus effundas, sed collige interdum, & piis affectibus ad Deum eleva, quem semper præsentem mentis oculo intueri debes.

§. VI.

Praxis divinæ præsentiae.

INstrumentum efficacissimum ad assequendam omnem perfectionem, & quasi fundamentum vitæ spiritualis, est Deum jugiter præsentem mentis oculis contemplari. Nullum exercitium hoc præstantius, nullum utilius. Purgat, & retrahit à peccatis, contemptum parit rerum humanarum, sensus corrigit, mentem sanctificat; & est quædam in terris representatio cœlestis beatitudinis, in qua Beati perpetua Dei visione

perfruuntur. Sicut nullum est momentum, quo non utaris, vel fruaris Dei bonitate, & misericordia, ita nullum oportet esse, quo eum præsentem non habeas: nec tam sæpe respirare debes, quàm Dei meminisse.

i. Triplex autem est modus, quo Deum potes præsentem concipere in omni loco, quorum primus dicitur imaginarius, alter intellectualis, tertius affectivus. Primus imperfectus est, fitque vi imaginationis, cujus maxima fingendi potestas est. Hoc modo contemplare potes, & præsentem semper habere Christum Dominum in assumpta humanitate, sive jacentem in præsepio, sive spinis coronatum, sive crucifixum, vel resurgentem, aut ascendentem in cælum, qui ante te ambulet, te videat & consideret, omnes actus, sermones, & cogitationes observet. Cavenda sunt tamen pericula quæ in hoc præsentia modo occurrere possunt, ne videlicet corpus lædas, dum vim nimiam adhibes in his imaginibus efformandis, & contrariis distractionibus repellendis, aut periculum incurras illusionum, dæmone efficiente, ut te credas realiter videre; quod

imaginaris. Adde quod huic modo non tantum insistere non debes, ut fias inhabilis ad alios meliores & magis spirituales.

II. Secundus modus perfectior fit per intellectum concipiendo Deum ubique presentem per essentiam, presentiam, & potentiam. Cælum enim & terram implet sua immensitate, & verè ubique est sanctissima Trinitas, adeo ut si lumen gloriæ adesset, hic beatus esses: omnia nuda, & aperta sunt oculis ejus; tuumque cor, & renes scrutatur: omnia movet, sustentat, & regit in pondere, numero, & mensura, modo, specie, & ordine, substantia, virtutè, & operatione; origine, decursu, & termino; & omnia in omnibus operetur. Et quomodo non timebis, & amabis eum, cum omnia opera sint velut sol in conspectu ejus? Quæcumque facis, ille melius videt, quàm tu qui facis.

III. Tertius modus perfectissimus est per actus ferventissimos amoris, per intimam cum ipso unionem, ratione cujus intra teipsum Deum respicis existentem cum omnibus suis attributis, perfectionibus, gloria, majestate;

omnipotentia, idque magis intimè quàm sit anima tua in corpore tuo. *An nescitis*, inquit Apostolus, *quoniam membra vestra templum sunt Spiritus sancti, qui in vobis est?* Adorna igitur animam tuam, & fac eam idoneam Dei omnipotentis habitationem: ibi decenter, & familiariter cum eo age. Quid vagaris extra te ipsum ad bona apparentia creaturarum, cum in te sit fons indeficiens omnium bonorum? Quid dies expendis quærendo Deum tanquam abientem, cum ipsum præsentem habeas? Quære cum intra te ipsum, tutius enim est, quàm cum quærere in creaturis, quarum externa species sæpe te allicere, & impedire potest, ne ad Creatorem, qui est intra illas, ingrediaris.

VI. Si nondum mentem purgasti ab affectu rerum caducarum: aut si ratione officii variis occupationibus distraheris, faciliùs erit, tibi Deum præsentem venerari in omnibus rebus in conversando, ambulando, aspiciendo, audiendo, gustando, cogitando, & in omni actione tua; in singulis hominibus, in superioribus, inferioribus, æqualibus; in herbis, floribus, arboribus; in bestiis terræ, &

volucris cœli; in fontibus, & fluminibus, in montibus, & collibus, in aëre, & igne; in sole, luna, & stellis: nam revera in omnibus est Deus dans unicuique esse, vivere, & moveri. Quidam omnia, quæ audiebat, & videbat, ad Christi passionem referebat. Si clamor occurreret, aut tumultus, vel ictus malleorum: Si scalas aspiceret, aut ligna, aut lanceas, aut clavos, aut aliud quidpiam; ex omnibus occasionem captabat Christi passionem grato animo recolendi.

v. Quocumque autem modo Deum præsentem consideres, crebris ad eum aspirationibus tanquam ad finem tuum assurgendum est, eliciendo actus fidei, spei, & charitatis, & ad ejus unionem suspirandum, tum studendum est puritati cordis, scriptum est enim: *Beati mundo corde, quoniam ipsi Deum videbunt*: denique aliquo signo exteriori exercitanda mens est ad ipsius memoriam; cujusmodi sunt pulsus campanæ, vel horologii, filus, sive annulus digito vel catenula brachio adstricta; inscriptum parieti hoc lemma, *Ubique Deus*, & alia ejusdem generis; ne ingruentibus distractionibus Domini Dei tui non

sine magno animæ detrimento obliviscaris.

VI. Licet Dei præsentis memoria semper necessaria sit, quia tamen plurimæ sunt humanæ mentis evagationes, eam saltem aliquoties in die omni studio renovare debes, nimirum summo mane, initio orationis mentalis, & vocalis, cum imminet aliqua peccandi occasio, exemplo Joseph, & Susannæ, ante quælibet virtutis opera, cum è domo egredieris, ante examen, & cubitum, & cum noctu expergisceris.

VII. In hoc exercitio affectui magis insistendum est, quàm speculationi; copiosior enim fructus ex ignitis cum Deo colloquiis, quàm ex consideratione refertur: imò ex affectu plurima consideratio velut ex fonte promanat. Crebra autem, & humili oratione cum charitate hoc donum impetrabis. Orabis igitur, & dices. *Quo ibo à spiritu tuo, Domine Deus meus, & quò à facie tua fugiam? Si ascendero in cælum, tu illic es; si descendero in infernum, ades: neque te cæli cælorum capere possunt. O quàm caci sumus filii hominum, qui te Dominum præsentem non veremur, neque*

tuo

tuò à pectus componimur, neque à peccatis
patrandis deterremur! Ergo-ne credo te
hic, & ubique presentem esse, & om-
nia opera mea, atque intimas cogitatio-
nes perscrutari, nihilque occultum esse
oculis tuis? Certè si crederem, non au-
derem te audiente, & vidente ea facere,
loqui, & cogitare, de quibus in conspectu
hominum erubescerem. Quanta enim puri-
tate, ô puritas infinita, coram te enitere
debeo, in cuius conspectu cœli non sunt
mundi, & in cuius faciem supremi sera-
phici spiritus respicere non presumunt?
Audio tamen te dicentem, Ambula co-
ram me, & esto perfectus; & ideo fidu-
ciam habeo orandi ad te, ut non abscon-
das faciem tuam à me, neque declines
in ira à servo tuo. Ecce sicut oculi seruo-
rum in manibus dominorum suorum, ita
oculi mei ad te, donec mei miserearis.
Respice in me, & miserere mei, &
ostende mihi faciem tuam. Faciem tuam
Domine requiro; ne avertas eam à me.
sed fac misericordiam cum servo tuo, ut
semper ambulem coram te in hac pere-
grinatione, teque in patria perfruar in
aeternum. Amen.

§. VII.

Praxis rectæ intentionis.

1. **R**ecta intentio illa dicitur, quæ operis sui finem constituit Deum, & ad ejus honorem, & gloriam revocat quicquid fit, dicitur, & cogitatur. Sicut respiratio vitæ naturali, sic recta intentio vitæ spirituali necessaria est. Ea est anima, & forma omnium actionum: nam qualis intentio, talis est actio. Si quis jejuniis, flagellis, aliisque pœnalitatibus affligat corpus suum non propter Deum, sed ut gloriam accipiat ab hominibus, nihil ei prodest. Si eodem fine ad extremos Indos pergat, omnesque ibi infideles multum laborans convertat ad Deum, factus est velut æs sonans, aut cymbalum tinniens. Ut enim docent sancti Patres, Martyrem non facit pœna, sed causa. Bona intentio parva extollit, & illustrat; magna autem, & in pretio habita prava intentio dehonestat. Ne igitur opera tua impura, & vacua in conspectu Dei inveniantur, puritati intentionis omni conatu insiste; ne quidpiam vel minimum aggredere, quia

prius actu ad Deum referas, tanquam ad primum principium, & ultimum finem tuum. Species quædam Idololatriæ est, Deo præsentidorsum vertere, & faciem ad idolum, ad aliquam scilicet creaturam, vel propriam voluntatem, aut proprium commodum convertere, Deo neglecto, & ejus voluntate.

II. Tua autem opera triplici intentione ad Deum referre potes, ut pœnam evadas, ut præmio potiaris, & ob purum amorem ipsius Dei. Prima est servorum, secunda mercenarios spectat, tertia ad filios. Prima bona est, melior altera, tertia optima: hac enim in Deum tendis, & ad ipsum omnia dirigis, ut ei placeas, ipsumque honores, ut ejus voluntatem adimpleas, & ut iis, quæ agis, te ad intimam cum illo unionem disponas. Illa verò purissima intentio est, quam Deiformem vocant, quæ nihil proprium in voluntate relinquit admixtum, ipsamque penitus, omni humana affectione abjectâ, in Deum transfundit.

III. Signa rectæ intentionis hæc sunt: Non turbulenter rem aggredi, non anxium esse, non distrahi, non perturbari, ob rei eventum minus prosperum non

●ffligi, nec aliorum iudicia anxie quæ-
rere; omni vana cogitatione post factum
carere, opiniones hominum contem-
nere, æque diligenter omnia facere, siue
publicè, siue privatim fiant; siue multi
sint spectatores, vel auditores, siue pau-
ci; nec laudibus extolli, nec vituperiis
dejici; resignatum ad omnia esse, nihil-
que optare, nihil timere.

I V. Quia Deus tanquam prima cau-
sa, & primum principium naturæ, &
gratiæ tecum concurrit ad omnes actio-
nes tuas, nec quidpiam sine illo potes
operari, quin ipse in te omnia opera tua
operetur; perfectissimæ intentionis ge-
nus erit in singulis operationibus tuis
easdem intentiones assumere, quas sa-
pientissimus Deus tecum, & in te ope-
rando habet, sic mentem ad eum diri-
gendo. *Domine Deus meus hoc opus ag-
gredior, & perficere iniendo ob eosdem
fines, propter quos tu idem operaris: ad
eundem scopum mentis oculos dirigo, ad
gloriam tuam, & amorem tuum, & ut
omnis voluntas tua fiat in cælo, & in
terra. Utinam hunc scopum semper
atingam ea rectitudine, quam ego desi-
dero, & tu mereris.*

V. Sed quia difficile est, etsi summum conatum adhibeas, hunc actum elicere, quin ob multiplicem humanæ naturæ fragilitatem, & corruptionem multis imperfectionibus permixtus sit; remedium illatum efficacissimum, & Deo gratissimum erit tua qualibet opera, verba, & cogitationes, operibus, verbis, & cogitationibus Domini nostri Jesu Christi unire; ut in sanguine ac meritis ejus purificentur, & perficiantur. Sic autem unita, & purificata offeres Deo Patri in odorem suavitatis.

VI. Tecum expende quid sit quod ames in singulis actionibus tuis, illudque abnega, ne vitiet intentionem. Considera deinde monitum illud Christi, *Quoniam oportet semper orare, & non deficere*; hoc enim non aliter servare potes, quam mediante recta intentione. Semper orat, ait quidam Sanctorum, qui semper bene agit: bene autem semper agit, qui per rectam intentionem omnia opera sua ad Deum refert. Cum dormis semper orabis, si ante somnum hunc actum præmittas. *Cupio mi Deus, ut me dormiente singula respirationes meae te laudent, & glorificent; ac si affe-*

An omnium Angelorum, & Sanctorum semper dicerem, Laus tibi Domine Rex aeternae gloriae. Simili modo cum manducas singulas buccellas, singulos haustus offer Deo, ac si singulis diceres, Benedictus Deus. Cum legis, aut scribis, offer eadem ratione singulos characteres, ac si singuli magna voce clamarent, Sanctus, Sanctus, Sanctus Dominus Deus Sabaoth. Idem in reliquis faciendum.

VII. Assertio est doctissimorum Theologorum multiplicatis solis intentionibus posse merita singulorum actuum multiplicari, ita ut uno opere decem, vel pluribus intentionibus instructo tantum mereri possis, quantam eodem illo decies, vel pluries repetito. Cum igitur aliquid inchoas, sic dirige intentionem. *O bonitas infinita Deus meus hoc agere vel pari volo eodem affectu, spiritu, & intentione, quibus Christus Filius tuus operabatur in terris, primò ut tibi omnem laudem, cultum, honorem, & gloriam tribuam, quibus debeo te venerari. 2. Ut faciam voluntatem tuam. 3. Ut protestor omnimodam mei subiectionem, & dependentiam à te. 4. Ut meritum ac primum*

aternalum, quantum est in me, augcam.
5. Vt quotidiana corporis, & anima bona
impetrem. 6. Vt dimittas mihi peccata
mea. 7. Vt ab omni malo cu'pe, & pœne
liberer. 8. Ad honorem, & augmentum
gloria Beata Virginis, sanctorum Ange-
lorum, & omnium Beatorum, præsertim
tutelarum meorum. 9. Ad utilitatem
meam, omnis umque amicorum, & inimi-
corum meorum, & totius Ecclesie Mili-
tantis. 10. In auxilium fidelium defun-
ctorum. 11. In gratiarum actionem pro in-
finitis beneficiis mihi, & omni creatura
collatis. 12. Vt superem tale vitium tua
gratia adiutus. 13. Vt talem virtutem mi-
hi necessariam consequar. 14. Vt aptior
reddar officio meo. 15. Vt sic imiter
Christum, & sanctos ejus. 16. Vt crescā,
& perseverem in bono. 17. Vt sim aliis
bono exemplo. 18. Vt vota mea reddam,
que promisi tibi. 19. Vt lucrer indul-
gentias tali rei annexas. 20. Vt bonam
mortem obtineam. 21. Vt tale beneficium,
quod peto à te, impetrem. 22. Vt tibi ma-
gis placeam, & accuratius seruiam.
23. Vt Ecclesie, vel superiori hoc præ-
cipienti obediam. 24. Vt pro peccatis
meis satisfaciam. 25. Vt mento in te

amorem augeam. 25. Ut contra diaboli tentationes, & insidias muniar. 27. Ut aliquid patiar pro amore tuo. 28. Ut ad sanctissimum Eucharistiae Sacramentum dignè suscipiendum me preparem. 29. Ut proximum meum adjuvem, & edificem. 30. Ut ad intimam tecum unionem me disponam.

VIII. Plures intentiones sigillatim suggeret cujusque operis natura, & circumstantiæ. Non omnes autem, quæ supra descriptæ sunt in omnibus haberi debent, aut possunt; sed illæ quæ magis unicuique operationi congruere videbuntur. Vespere in fine examinis considera diem, & opera abiisse, & quanta cor tuum lætitia perfunderetur, si ea fecisses pura intentione? Opta igitur omnia te fecisse ad majorem Dei gloriam, renova propositum rectæ intentionis, & die sequenti eam sæpe restaura, mane præsertim ante sacrum, ad cujusvis laboris, & actionis initium, ad horas singulas, & ante somnum. Res ista facilissima est, & in tua potestate posita: quid enim facilius, quàm mente ad Deum elevata dicere: Hoc propter te Domine, ad gloriam tuam? Parva res est, sed
ingens

ingens meritorum cumulus ab ea pender;
& si eam omiseris, quamvis multa agas,
nihil egisti. Sine mercede est labor, qui
caret recta intentione.

§. VIII.

*De quotidiana virtutum
exercitatione.*

DE virtutum excellentia, utilitate,
jocunditate, & necessitate non est
hic differendi locus; sed quia omnis earum
laus in actione consistit, industrias
aliquot, & documenta tradam pro quo-
tidiano ipsarummet usu, & exercita-
tione.

I. Illarum virtutum acquisitioni pri-
mo incumbere debes, quarum usus fre-
quentior est, & quæ magis statui tuo
conveniunt. Semel autem electa virtute,
cujus studio insistere vis, ejus naturam,
conditionem, actus, & gradus, excellen-
tiam quoque, commoda, & necessitatem
prænoscere oportet. Magnum deinde de-
siderium excitandum est, quod te ejus
capacem efficiat, & alacrem reddat ad
superandas difficultates. Tum sedulo-ex-

pendendum quanta sit contrarii vitii
fœditas, quæ afferat damna, quantum
Deo displiceat, quantum te dedeceat,
quantum statui tuo, ac fini adverſetur.
Id verò perficies instituta hac de re me-
ditatione, & quia virtus non partus cor-
ruptæ naturæ, sed opus est divinæ gra-
tiæ; in solo Deo fiduciam pones, & ab
eo auxilium continua, & ferventi ora-
tione postulabis.

II. Quia habitus virtutum ex sæpe
repetitis actibus generantur, & crescunt,
magni refert singulas separatim aggredi,
unamquamque per aliquot dies, ejusque
actus in quotidianis functionibus nulla
prætermiſſa opportunitate exercere; imò
in omnibus ea occasio quærenda est, quia
diligentibus Deum omnia cooperantur
in bonum. Adferenda etiam ad excolen-
dam virtutem constans, & generosa vo-
luntas, quæ nunquam à bono proposito
resiliat; quæ contra humanam instabili-
tatem viriliter pugnet; nec sinat se à
virtutis difficultate, & opposita consue-
tudine, ac itineris molestia à cursu re-
trahi, & à virtute repelli. Non enim
qui cæperit, sed qui perseveraverit, co-
ronabitur.

III. Potissima ratio veræ, solidæque virtutis comparandæ est ad Christum Dominum respicere tanquam ad perfectissimum exemplar, & seriò animadvertere quomodo eam docuerit verbo, & exemplo, quomodo ejus actus exercuerit, qua intentione, & devotione. Considera quid ille egerit, & passus sit, ut ad serium ejus studium te incitaret, & gratiam tibi necessariam impetraret. Et quia hætenus tam benigni Redemptoris amorem neglexisti, excita in te dolorem & zelum proficiendi, eumque imitandi. Attende quoque Sanctorum exemplar, & ea sequi propone adhibito ad stimulum examine particulari, & frequentibus precatiunculis, quibus gratiam proficiendi à Deo petas per eorum intercessionem.

IV. Pro mensura gratiæ tibi à Deo concessæ satage actus virtutis internos, & externos in singulos dies intensiores elicere. Tam in progressu, quam in principio ipsorum perfectissimè, quantum potes eos exerce, non ex arida consuetudine, sed novo semper fervore, purissimè quoad intentionem, intensissimè quoad conatum, & constantissimè num-

quam ab eis cessando, quæcumque ingruant adversitates, & impedimenta, Actibus verò externis semper internos adjuuge, quia ab istis illorum bonitas pendet. Sit stabile in te & insatiabile proficiendi desiderium, quo te offeras Deo ad actus etiam virtutis insigniores, tuasque vires longè excedentes, ad ardua quæque pro Dei amore perpetranda, si per vires liceret. Bonam enim voluntatem Deus coronat, ubi deest facultas.

v. Omnem adhibe conatum, ut virtus, quam exerces, sit vera, solida perfecta. Vera inquam, non ficta, non simulata, qua per hypocrisim alios decipias, vel qua ipse decipiaris vitium pro virtute amplectens. Solida, quæ constanter, & cum victoria permaneat adversus diaboli insidias, & tentationes: quæ non quacumque aura circumferatur, nec puerili cuidam fervori, sed altis radicibus innixa sit: quæ speciem externam, & pompam fugiat, & extrinseca naturæ dona non pluris æstimet, quam valeant. Perfecta, id est omnibus imbuta conditionibus, quæ ad eam necessariae sunt ex præscripto, & norma

cœlestis, atque infusæ prudentiæ: ut id nimirum quod proprium, & intimum est in quacunque virtute, secteris, ex certo consilio, & electione, non temerè, aut ex quodam impetu, & impulsu naturæ, nec quodam quasi extrinseco ornatu contentus sis, sed ad summum virtutis gradum semper aspires, juxta exemplum quod à sanctis viris, & à Christo Domino in eo genere relictum est. Perfecta denique erit virtus, si cum cæterarum omnium societate, & usu conjuncta fuerit.

VI. Indicia jam in anima genitæ & obtentæ virtutis hæc præcipue sunt. Si vitium virtuti oppositum, aut omnino extinctum, aut magna ex parte compressum sit: si passionibus, & pravis affectionibus sub rationis imperio jam frænum imposueris: si in exercendis virtutis actibus nullam amplius difficultatem sentias: si continuo proficiendi desiderio flagres: si dicta tepidorum contemnens bona opera in te ipso serves abscondita Dei, & conscientiæ testimonio contentus: si vitam denique non temerè, & ex usu instituas, sed ex præscripto rationis, & prudentiæ extra se-

mitas solidæ, & masculæ virtutis nullatenus declinando.

§. IX.

*Protestationes ad Deum sæpius
renewandæ.*

IN conspectu divinæ Majestatis tuæ omnipotens Deus, ac totius curiæ cœlestis, ego miserabilis creatura, & indignissimus peccator, considerans, & volvens animo infinitam bonitatem, & misericordiam tuam, qua dignatus es de me ab æterno tam amanter cogitare, & in tempore creare ad imaginem, & similitudinem tuam, & quando venit plenitudo tēporis, redimere me sanguine unigeniti Filii tui, toties mihi parcere, & quotidie peccantem benignè tolerare usque ad diem hanc, expectans me ad pœnitentiam post tot iniquitates & scelera mea: itemque considerans me tam fædè violasse fidem in baptisinate datam; toto corde, & spiritu ante thronum justitiæ tuæ prostratus me reum ultrò confiteor læsæ Majestatis divinæ, reum mortis & passionis Jesu Christi Filii tui, ac

propterea æternis suppliciis cum rebellibus Angelis puniendum. Sed postea convertens me ad thronum misericordiæ tuæ, quoniam benignus, & misericors es, & præstabilis super malitia, omnia peccata mea omnium verè pœnitentium affectu detestans, & de his dolens, ac veniam humiliter petens per merita passionis Domini mei Jesu Christi, quibus innitor, professionem fidei, & sancta proposita renovo, quæ in baptismo te promiseram, iterumque renuncio diabolo, mundo, & carni, eorumque pompis, vanitatibus, suggestionibus, & concupiscentiis omnibus diebus vitæ meæ, avertens me ab omni creatura, & convertens me in toto corde meo ad te Dominum Deum meum, qui nunquam despicias revertentes ad te. Dixi; Confiteor tibi adversum me injustitiam meam, & tu remisisti iniquitatem peccati mei: Dixi, & mox eructasti verbum bonum, dicens remittuntur tibi peccata tua, quoniam rogasti me, quoniam dilexisti me. Et quis non diligat te, ô infinita bonitas? Aperis enim mihi cataractas miserationum tuarum, & torrente misericordiæ mundasti, & inundasti me. Ideo

propono , & statuo irrevocabiler tibi soli servire , teque medullitus diligere & nunc , & in aeternum. Quod si contingat vel ex Satanæ incurſu , vel ex lapſu humanæ fragilitatis me quicquam cogitare , loqui , vel facere , quod huic deliberationi contrarium ſit ; ex nunc propono tua ſavente gratia ſtatim reſurgere , ſanctique propoſiti viam ferventius arripere , & tibi jugiter adhærere. Tu Domine , qui univerſorum es cognitor , tu noſti quia amo te. Ne quaſo deſpicias hoc ſacrificium contriti cordis , ſed præſta , ut hæc deſideria de tua inſpiratione concepta nulla poſſint tentatione mutari.

Proſiteor , & proteſtor coram te , Deus meus , & coram Angelis , & ſanctis tuis me in hac vera , & Catholica fide & vivere , & mori velle , quam ſancta Romana , & Apoſtolica tenet Eccleſia , & conſitetur , pro qua millies mori paratus ſum. Ignosco omnibus ſincero corde , qui quovis modo injuriam aliquam ſive moleſtiam mihi intulerunt : omneſque rogo , ut viciffim ignoſcant mihi ; & ſi aliquod remanet in me peccatum , quod in confeſſione omiſerim , vel non ritè

confessus sum; si aliqua obligatio, cui non satisfecerim, revoca ea in mentem, ô scrutator cordium, ut confitear, & satisfaciam, antequam veniat nox in qua nemo potest operari.

Agnosco, & fateor me hæcenus non vixisse in sanctitate, & iustitia coram te, sicut status sublimis, ad quem me vocasti, & beneficia tua multa nimis exigebant. Agnosco, inquam, & doleo quantum possum, quod te aliquando dereliquerim fontem aquæ vivæ, & tui oblitus fuerim, vita mea, qui omni momento, quasi cæterorum oblitus esses, nunquam oblitus es mei. Et nunc, Domine, ad te revertor, & propono deinceps tibi soli, & mihi vivere, & omnes justificationes tuas custodire. Tu eris mihi in Deum, & ego tibi in servum fidelem usque ad extremum vitæ meæ. Si quis insidietur hostis, si quis allatret, pelliciat, incantet, teneat, & surrepat; tu eris timor meus, spes mea, amor meus. In te confido, dulcissime Salvator, minima enim guttula pretiosi Sanguinis tui in Cruce effusi sufficiens est pro redemptione totius mundi. Sub tuum præsidium, & Beatissimæ Matris tuæ, om-

numque Angelorum, & Sanctorum & vivere cupio, & mori volo absque ulla hæsitacione, aut desperatione ob multitudinem, & gravitatem peccatorum meorum. Hac munitus protectione tutus ero, neque irridebunt me inimici mei, etenim universi, qui te expectant, non confundentur. Paratum cor meum, Deus, paratum cor meum facere semper voluntatem tuam; cumque omni affectu beatorum spirituum te arctissime amplecti, atque omnium creaturarum vocibus te laudare, & glorificare.

Hoc ardentissimum votum, ac desiderium meum respice, clementissime Deus, dum tempus est miserendi, & cor meum suscipe in holocaustum, cunctosque homines, & quamcumque extraneam imaginem in eo extingue, & me in corde omnium hominum, ut mihi mundus crucifixus sit, & ego mundo.

Oculi mei te solum videant, & in te omnia: aures meæ non audiant vocem alieni, sed tuam dumtaxat: lingua mea, & labia mea te solum loquantur, tuasque laudes jugiter resonent: manus meæ amplectantur te: pedes mei ad te gradiantur: omnes vires meæ in tuis vulne;

ribus, & morte tua confumentur : omnia denique membra , & ossa mea dicant, Domine, quis similis tibi? Abnego omnia terrena hæc , quia in te uno omnia habeo : abnego me , quia tuus ego sum, & vivo ego jam non ego , vivis autem tu in me Christe Jesu , & diligo te ex toto corde meo , & tota anima mea, ex tota mente mea , ex totis viribus meis. Da ut ab omnibus contemni , & abjici desiderem , nulli placere appetam , nulli verear displicere , nisi tibi ; nec quidquam concupiscam, nisi gratissimam voluntatem tuam.

Hæc sunt desideria mea , hæc vota, in quibus contestor coram te , Deus meus, me vivere , & mori velle : hæc quotidie, & omni momento renovare intendo, nec unquam te favente ea revocabo. Quod si vi morbi, vel hostis fallacia quicquam dixerò, vel cogitavero huic voluntati, ac deliberationi contrarium , id nullum esse cupio in tribunali tuo , justissime Deus , qui voluntatem timentium te semper exaudis ; idque omnino detestor, abominor , abjuro , & abrenuntio , nihil de me ipso præsumens , sed in sola spe gratiar, & protectionis tuæ confidens. Hanc au-

tem voluntatem paratus sum sanguine
n eo signare, & pro te millies mori, ut
tibi vivam, Dulcissime Jesu, cui omnia
vivunt; & in te moriar, qui pro me
mori dignatus es. Amen.

§. X.

De crebra spiritus revocatione.

INter alias industrias, quæ ad fervo-
rem spiritus augendum, & conser-
vandum adhiberi solent, nulla efficacior,
quàm crebra ejusdem spiritus renovatio,
sine qua sensus devotionis tepescit, &
perfectionis desiderium olim conceptum
sensim languet, & flaccescit. Hujus rei
hæc praxis est.

I. Die Dominica, quæ est initium
hebdomadæ, & prima die cujusque men-
sis, horam unam matutinam seliges,
quam cæteris curis abdicatis huic reno-
vationi totam impendes. Et primo qui-
dem statues te in conspectu Dei, & ip-
sum adorabis. Tum veneraberis tan-
quam tibi assistentes beatissimam Virgi-
nem, Angelum custodem, & sanctos
Tutelares. Declarabis te illic adesse, ut

bona recogites à Deo accepta, itèmq; mala commissà, & ut cognoscas, quid te jubeat facere. Ad id vero gratiam petes, & lumen recitato hymno *Veni creator Spiritus*, additis etiam precibus ad B. Virginem, Angelum custodem, & sanctos Tutelares.

II. Post hæc considerabis peractæ hebdomadæ, vel mensis beneficia. Sunt autem ista. Quoad animam: sanctæ cogitationes, lumina, inspirationes, desideria, consolationes, patientia in desolationibus, usus Sacramentorum, orationes, meditationes, examina, lectiones spirituales, Missæ, Officia, actus virtutum, mortificationes, fuga vitiorum, spiritualis profectus, præservatio à multis periculis, & peccatis, gratia resurgendi post lapsum, & alia innumera. Quoad corpus: victus, vestitus, sanitas, liberatio à multis malis, & ægitudinibus, conservatio amicorum, & domesticorum, & alia ejusdem generis. Sunt & multa beneficia occulta, quæ ignorantur. Sunt communia, ut lux solis, terræ felicitas, & alia commoda ad corpus, ad animam, & ad bona externa pertinentia. In his sigillatim ponderabis

magnitudinem benefactoris , amorem quo benefacit , donorum excellentiam , & tuam indignitatem Quia verò impar es ad gratias agendas , invocabis Verbum incarnatum , B. Virginem , Angelos , Sanctos , & omnes creaturas , ut pro te Deo gratias agant. Tum offeres æterno Patri gratiarum actiones Christi , beatæ Virginis , & Sanctorum , atque omnes Missas , quæ dicuntur illa die : & tu quoque ea intentione Missam audies , vel celebrabis.

III. Deinde examinabis peccata commissa , discurrendo per singulos dies ; per loca , & ministeria contra Deum , contra proximos , superiores , æquales , & inferiores , & contra teipsum. Admiraberis potentiam Dei , qui te expectavit ad pœnitentiam : obstupefces vehementer quomodo vivere potueris in tam misero statu , quomodo non se armaverint creaturæ omnes adversus te : ingens odiû tui concipies , & dolorem de peccatis cum proposito emendationis , & desiderio satisfaciendi. Mente finges Deum Patrem tibi assistere , & exprobrare peccata. Filium verò plagas ostendere , & te absolvere : Spiritum sanctum tibi ali-

quam satis actionem injungere, cui statim cum timore, & tremore obedies: & si quid Sacramento Pœnitentiæ expurgandum sit, illico Sacerdoti confiteberis. Denique firmiter statues vitam in melius commutare, invocato Dei, & Sanctorum auxilio.

IV. Percurres sequentes articulos, & videbis: An præteritum tempus rectè expenderis. An sancta proposita, & animi decreta in oratione concepta servaveris. An vitium, cujus emendationem tibi proposueras, superaveris. An adhuc delecteris memoria vanitatum præteritarum, & scelera olim admissa sine debita detestatione recurrant ad mentem. An studueris extricare te à suspicionibus, judiciis temerariis, & cogitationibus impuris. Quo animo quæ agenda sunt, aggrediaris, attentè ne & prudenter; an verò præcipiti impetu, & sine maturo consilio. An vitam tuam componas ad humana judicia, & axiomata mundi. An optes soli Deo placere. An proruperis, & quàm frequenter, in colloquia mala, scurrilia, & inutilia. An paratus sis mori, & an aliquid sit intus, & extra te in conscientia, cella, vel

domo tua, quod nolles reperiri, in hora mortis.

v. Radices tuorum defectuum, & impedimentum profectus spiritualis accuratè dispicies, & evellere satages. Sunt autem istæ. Neglectus seriæ mortificationis vitiosorum habituum, & passionum. Defectus magnanimitatis, seu pigritia, & fuga laboris in arduo perfectionis monte conscendendo. Nimia tui confidentia, & occulta præsumptio de propriis viribus. Amor inordinatus propriæ existimationis, gloriæ, & excellentiæ; & neglectus humilitatis, ac puræ intentionis. Nimia indulgentia circa corporis comoda, otium, relaxationes, libertatem: Remissio, & tepiditas sensim irrepens in usu Sacramentorum, in oratione, & aliis piis exercitationibus. Scrupulositas, & anxietas nimia de præsentibus, & futuris; & exigua de divina providentia & bonitate confidentia. Ingratitudo pro beneficiis acceptis, maxime vocationis, & rara, atq; arida eorum recordatio parumq; affectuosa eorūdem æstimatio.

vi. Ad magnos progressus in spiritu faciendos te ipsum variis stimulis excitabis, quorum præcipui sunt isti diligenter

genter, & ferio expendendi. Iustitia Dei summa, æterna morte puniens peccata. Abyllus iudiciorum Dei sæpe permittentis multos, præsertim ingratos, labi, apostatare, & miserè mori. Timor mortis, quæ repentè venit, sicut fur in nocte, aperitque janua[m] tremendæ æternitati. Brevitas, & incertitudo temporis, cujus jactura irreparabilis est. Horror iudicii, & consideratio æternitatis. Exemplum Christi verbo, & exemplo docentis nos: & Sanctorum confudentium tepiditatem nostram, & invitantium ad imitationem. Bonitas, & amabilitas infinita Dei, & summus in hominem amor, atque innumerabilia beneficia.

V I I. Bona proposita & vota tua toto affectu renovabis, & pro eorum observantia gratiam à Deo humiliter petes. Tum firma animi deliberatione propones nunquam deinceps deliberatè peccare, nullam regulam transgredi, de rebus viro religioso dignis semper colloqui, quotidiana opera diligenter facere, à jocis, & scurrilitatibus perpetuò cavere, de nulla re conqueri, nullius mores censurare, omnia in melius interpretari,

honores fugere, adversitates libenter, & hilariter pati, semper niti ad perfectiora, singula opera ita facere, ut meritoria sint, vanos hominum respectus contemnere, in his, quæ pertinent ad modestiam, & castitatem, vel ipsam defectus umbram perhorrescere; extra studium, & alias regulares occupationes omnia intercedentis temporis, vel minima intervalla in sanctis cogitationibus, & piis erga Deum affectibus expendere. Hæc vero proposita sæpe repetes, & conaberis ita observare, ut in fine saltem cujusque hebdomadæ invenias, & agnoscas te profecisse.

VIII. Profectum tuum examinabis, & conferes cum profectu transactæ hebdomadæ, sicut mercatores libros suos evolvere, sumptus, & lucra computare solent; attentè considerans quid amiseris, quid lucratus fueris in negotio salutis tuæ profectuque virtutū. Deinde inspicias quid peculiariter cavendum tibi, quid emendandum sit. Prævidebis quicquid acturus es, & Deo offeres purissima intentione, petesque ab eo ut opera tua dirigat, teque speciali, & efficaci gratiæ suæ auxilio ad omne opus bonum

excitet, & corroboret, adhibita intercessionem B. Virginis, Angeli custodis, & Sanctorum tutelarium. Demum propones sequentem hebdomadam sic transigere, ac si prima sit, qua incipias servire Deo, & postrema vitæ tuæ.

§. XI.

De Oratione mentali.

Quid sit oratio mentalis, quot ejus gradus, & partes; quæ causæ, & effectus, quanta ejus necessitas, & excellentia, infiniti penè scriptores diffusissimè pertractaverunt. Vix tot sunt huic studio incumbentes quot ejus præceptores habemus. Ex his autem quædam notabilia ad praxim pertinentia breviter delibare propositum mihi est; reliqua ab illis petenda sunt.

1. Nulla dies præterire debet, quæ per horam, vel saltem per dimidium horæ huic orationi non incumbas, alioquin nullum, vel admodum exiguum facies in virtute profectum. Hæc est enim basis, & firmamentum Christianæ perfectionis. Hæc hominem sæculo disjunctum omnem mortalitatem transilire facit, & Angelicis choris sociatum ad cœlestium.

gaudiorum consortium, & ad beatissimam cum Deo unionem attollit. Nemo paruit vitiis, nemo carni obsequutus est, nemo desertor religionis fuit, qui non ante orationis studium projecerit, & conculcaverit.

I I. Quædam ad bene orandum præviæ dispositiones requiruntur, quarum prima est carere peccatis, quamvis enim à studio orandi non arceatur qui mortalibus culpis irretitus est, peccata tamen bonum à nobis prohibent, sicut dixit Jeremias Propheta. 2. Omnes inanes occupationes & vana colloquia, quæ distractionibus fomentum præbent, præscindere. 3. Pravas affectiones comprimere, & cor avellere ab omni affectu rerum terrenarum, quia mens sordida, & perturbata cœlestes nequit influxus percipere.

I I I. Ante orationem materiam præparare oportet, eamque in puncta distribuere, & memoriæ imprimere: affectus item prævenire, quis, ex quo puncto, & quo pacto elici possit: tum finis præfigendus est, qui in ipsa quæritur, sive sit odium peccati, sive alicujus vitii emendatio, sive abnegatio sui, sive adeptio

virtutum, aut unio cum Deo, habitatione proprii status, & indigentia, atque ad ipsum finem tota series orationis dirigenda est.

IV. Orationem inchoaturus præmisso signo Crucis, & versiculo, Deus in adiutorium meum intende, cum Gloria Patri, Deum præsentem fide viva concipies, circa te existentem, intra te manentem per essentiam, præsentiam, & potentiam; cordis tui intimos recessus penetrantē, opus quod facis agnoscētem, & ad ipsum te adjuvantem. Tum Deum præsentem adorabis actumq; contritionis elicies, & gratiā bene orandi postulabis. Hos autem & alios quosdam actus prærequisitos continet sequens oratio, quæ sive præscriptis verbis, sive alia breviori formula fiat, ferventissima esse debet, utpote quæ animam disponere debet ad divinæ gratiæ influxum, sanctique Spiritus inspirationes percipiendas, & ad veritates supernaturales penetrandas.

Oratio Preparatoria.

Domine lux sapientissima, bonitas ineffabilis, potestas insuperabilis, qui universorum es conditor, conserva.

tor, & rector : qui es felicitas, & beatitudo nostra, à quo speramus peccatorum veniam, meritorum gratiam, premii gloriam; quem omnes beatorum spirituum ordines amant, laudant, & admirantur: ecce ego indignissimus peccator adsto coram te, ut de tua infinita perfectione gaudeam, meque tibi omni conatu subjiciam. Te igitur adoro, te veneror, te omni honore, & laude prosequor, ac dignissimum judico, qui ab omnibus Angelis, & hominibus, & ab universis creaturis magnificeris, & in summo pretio habearis. Doleo autem ex toto corde, quod offenderim te, & summopere cupio emendare quod feci. Ignosce mihi Deus meus, & adesto propitius precibus meis, & meditationi meæ cui nunc incumbere intendo ad majorem gloriam & honorem nominis tui, ut placeam tibi, & consulam saluti animæ meæ. Ne despicias me Domine, ne avertas faciem tuam à me, sed da mihi abundantissimam gratiam tuam, ut coram te altare possim hac hora, quemadmodum tibi placet, Domine Deus. Offero tibi, & consecro animam meam, ut eam perficias, ut extollas ad te:

Offero memoriam, ut eam sanctis cogitationibus imbuas : offero intellectum, ut luce tua illustratus considerare possit mirabilia tua : offero voluntatem, ut amore tuo inflammata affectus tibi gratos, & mihi congruos eliciat : offero tibi omnes cogitationes meas, omnia verba, & opera, ut in his quæ tibi sunt placita semper occupentur : offero corpus meum, & vitam meam, ut de me secundum beneplacitum tuum in tempore, & in aeternitate disponas. Respuo omnes curiositates, & distractiones, tibi que soli, & mihi attendere propono, ac si tu, & ego soli essemus in hoc mundo. Lubens patiar omnes desolationes, & ariditates, quoniam indignus omni consolatione, & dulcedine ego sum : Hanc autem meditationem offero tibi in unione meditationum, & orationum Domini mei Jesu Christi, ut ipse suppleat defectus meos, & bene orandi gratiam mihi tribuat. Adjuva me Domine Deus meus per merita, & intercessionem Beatissimæ Virginis Mariæ, omniumque Angelorum, & Sanctorum tuorum. Virgo Maria, Angele mi custos, sancti mei advocati assiste mihi, & orate pro me.

v. Post hanc orationem incipies à primo puncto præparatæ meditationis, & circa ipsum intellectum exercebis discurrendo per omnes rei, vel mysterii sive historiæ causas, effectus, & circumstantias. Tum fines voluntatem, cujus posteriores partes esse debent, munus suum exequvariis elicitis affectibus, quos gratia divina in te excitabit. Intellectus enim voluntati præfert facem, ut in meditatione exardescat ignis.

vi. In affectuum exercitatione nonnulla sunt observanda. Ut eam videlicet aggrediaris cum omni puritate, & conscientiæ candore, quia juxta puritatis mensuram erigitur mens in oratione. Ut ad puritatem accedat humilitas, & reverentia maxima, & dicas cum Abraham, *Loquar ad Dominum meum, cum sim pulvis, & cinis.* Ut non sistat animus in gustu, sed gustus dirigatur ad opus, & usui virtutum deserviat. Ut quanto tempore affectus excitatus afficit animum, tanto in eo perseveres, minimè interim sollicitus quid supersit meditandum. Ut conversatio, & opera tua his affectibus consentiant, quos in oratione exercuisti: ut si in oratione peccata odio habuisti,

habuisti, ea multo magis extra orationem opere detesteris: si res caducas despexisti, actu efficacius despicias. Quidam recentiores varios modos proponunt movendi, & dilatandi affectus per modum admirationis, benedictionis, comminationis, dereftationis, exhortationis, fiducia, gratitudinis, humiliatōnis, interrogationis, laudis, miseratōnis, narrationis, obsecrationis, postulationis, querelarum, redargutionis, sollicitationis, timoris, vituperationis, & zeli. Veruntamen hæc omnis exercitatio magis ab unctione gratiæ, quàm ab humana institutione dependet. Ipse enim spiritus postulat pro nobis gemitibus inenarrabilibus.

V I I. Tempore consolationis sequendus est ductus, & impulsus Spiritus sancti, sed tempore ariditatis maximopere conducet praxim aliquam sibi familiarem habere qua possint affectus excitari, & dilatari. Ea autem erit huiusmodi. Postquam intellectus aliquas virtutes uno puncto contentas accuratius penetravit, ex iis tanquam ex præmissis evidenter cognitis practicas conclusiones deducet, quibus voluntatem ad congruos

affectus, & desideria movebit, deinde
 iudicium practicum ad bona proposita
 elicienda impellet: & sic voluntas ratio-
 nibus intellectus convicta, affectus, de-
 sideria, & proposita iudicio intellectus
 consentanea eliciet, & continuabit ser-
 vato hoc ordine in singulis affectibus
 excitandis. Primò propositæ virtutis
 actus internos exercebis. Secundò opta-
 bis semper eos perfectè exercuisse, & de
 tua hucusque socordia dolebis. Tertiò
 propones in posterum eos ardentius cor-
 de, ore, & opere frequentare. Quarto
 idem omnes ut præstent desiderabis.
 Quintò gratiam ad id necessariam im-
 plorabis.

V I I I. Distractionum, & evagationum
 multæ sunt causæ. Prima sunt peccata,
 & affectus inordinati, qui nos ad terram
 allidunt & mentis secum cogitationes
 ad cœlestia sursum ferri non sinunt.
 Secunda nimia effusio ad exterioria, ani-
 mique evagatio ex sola levitate per in-
 ania discurrentis. Tertia curiositas, quæ
 omnia vana, & inutilia ad sensus addu-
 cit. Quarta nimia sensuum libertas, qua
 mens in multa discinditur, & dissipatur.
 Quinta naturæ fragilitas, & instabilitas,

quæ nos incurvat, & deprimat, & in una re cogitanda diu non finit immorari. Sexta astutia dæmonum fructum orationis impedire conantium. Septima ingenii hebetudo inepti ad meditandum, siue ignorantia cum quis nescit quid, quando, qua ratione debeat meditari. Octava omisso debita præparationis, & præviæ dispositionis supra descriptæ. Nona superflua colloquia, & tepiditas: scriptum est enim, *Qui mineratur actum percipiet sapientiam*: & super tepidos cadit illa maledictio, *Eris vagus, & profugus super terram.*

IX. His morbis hæc remedia applicabis. Primò profundam humilitatem, qua tuam miseriam cognoscas, & coram divina maiestate ita evagari te pudeat. Secundò ingentem animi fortitudinem, qua viriliter statuas nullam cogitationem admittere, quæ te retrahat ab oratione: & si invito contigerit evagatio, eam statim abigere studeas. Tertiò diligentiam, ratione cujus ad orationem paratus accedas, & rem, quam meditaris, non quasi præteritam, aut futuram, sed ut præsentem cogites. Quarto animi tranquillitatem, ita ut distractus non

tristeris, ne ipsa anxietas evagationem foveat; sed imagines rerum irruentes non discutias, & quasi aspicere dedigneris. Quintò brevem, & ferventem orationem, qua petas à Deo, ut ipse mentem tuam cohibeat, & intra animam tuam habitare dignetur. Sextò attentionem ad singula puncta circa quæ ordinatè discurre, & cum te distractum advertis, vel ab ipsa distractione occasione sumes redeundi in viam, vel certè abrupta omni cogitatione ad propositam materiam redibis cum dolore, & proposito emendationis. Tandem, quia contraria contrariis curantur, causæ supradictæ, & radices evagationum contrariis remediis extirpandæ sunt, pravi affectus mortificatione, tepiditas fervore, naturæ fragilitas vigore gratiæ, & sic de cæteris. Quod si evagatio non obstante quacumque diligentia adhuc orantis studium perturbat, cave ne recedas ab oratione, sed humiliare in conspectu Dei & decerta viriliter, quia involuntariæ distractiones non imputantur nobis ad culpam, imò plerumque meritum augent, ob assiduam luctam, & conatum resistendi.

x. Ut intellectus distractiones sic voluntas ariditatem patitur, siue sterilitatem, & inopiam piorum affectuum, quæ provenire solet vel ex naturæ infirmitate, & misera conditione, vel ex orantis culpa, & negligentia, vel ex divina dispositione. Remedia hæc sunt. Terrenas consolationes detestari, & ad veras, & cœlestes suspirare: grato, & humili animo gratiam devotionis præstolari, suscipere, conservare, Deo non sibi adscribere; non ideo se extollere, sed tinere, seque indignum tanto beneficio intimè agnoscere, & fateri: audito orationis signo magna alacritate, & promptitudine ad eam properare, & ipsam magno affectu inchoare: abjicere se ad pedes Domini ad instar cæci, & pauperis, seu ad instar jumenti, & offerre illi animæ sterilitatem, in pœnam peccatorum: actus internos virtutum tametsi arido corde exercere, & in vocales erumpere orationes: resignare se divino beneplacito ad ariditatem illam tota vita perferendam, seque paratum exhibere ad serviendum jugiter Deo sine ullo stipendio consolationum, atque etiam sine spe mercedis eternæ: offerre

Deo desideria, & merita Christi, beatæ Virginis, & Sanctorum percurrendo eorum choros, & à singulis aliquid mendicando, salutando singula Christi membra, singula vulnera osculando, singula recensendo beneficia: causas denique ariditatis solerter examinare, & amovere. Quod si nulla præter Deum appareat causa, gratias illi agere oportet, & eum patienter sustinere sibi que nihilominus, & suis peccatis gratiæ subtractionem imputare.

x i. Duplex in oratione lumen reperitur, practicum & speculativum. Magnum verò inter utrumque discrimen est respectu intellectus, voluntatis, & operis. Et primò quidem in intellectu hoc discrimen cernitur, nam res divinas duabus viis contemplari possumus, vel per sublimes quasdam theorias, vel per rationes practicas, & vulgares. Prima via lumine speculativo procedit, secunda practico: illa peritioribus, hæc etiam imperitis convenit: illa ad movendam voluntatem parum vel nihil confert, hæc efficacissima est, & movet ad opus. Secundo apparet discrimen in voluntate, nam in lumine speculativo ita nonnum-

quam voluntas etiam movetur, ut inde gemitus, & suspiria oriantur; sed postquam evanuit dulcissimus ille sensus, remanet homo nihilominus impatiens, sui consilii tenax, ac iisdem semper vitiis irretitus licet speciem pietatis præ se ferat. Lumen verò practicum perturbaciones domat, extirpat vitia, afficit cor non fallaci suavitate, sed salubri compunctione, veram parit virtutum sitim, non inanem gloriolæ, aut scientiæ gustum. Demum in opere diversa utriusque naturaprehenditur, nam illud labores externos devitat, & zelum animarum imminuit tanquam spiritus impedimentum: hoc ardorem excitat durissima queque patiendi, & quodlibet hominis commodum salutis animarum postponit.

XII. Observandæ sunt, & præcavendæ demonis fraudes, quibus solet homines à studio orationis avocare. Prima est sub prætextu quietis ad orationem necessariæ, proprii status officia, ad quæ quis ex obligatione tenetur, vel perfurto-riè persolvere, vel penitus omittere.

2. Non recta intentione orationi se tradere. 3. Ob externas occupationes

orationem negligere quę maximum negotium est, & tempus illi destinatum in aliis rebus infumere. 4. Propter spiritus pusillanimitatem quod manifestus illa profectus non appareat, ipsam despicere, & alia ei studia præferre. 5. Ab eadem cessare ob tentationem, & scrupulorum molestiam. 6. Propter ariditatem eam breviate, vel propter abundantiam consolationis sine discretione, quę sal est sacrificii, immoderatè protendere. 7. Ab humilium meditatione abstinere, & sola sublimia, quę captum plerumque superant, & in superbiam elevant, admittere. 8. Ecstases, raptus, & revelationes desiderare, quod arrogantię, & vanę curiositatis indicium est, multisque demonum illusionibus januam aperit. 9. Tepescere, & perturbari cum deest consolatio, quam recipere quidem humiliter, sed non querere oportet, aut in ea quiescere, finis enim orationis emendatio vitę est, non consolatio. Postrema tandem illusio, elatio est, cum quis stultè cogitat sibi soli gratiæ divinę solem illucescere, cæteros autem tanquam carnales, & imperfectos spiritus orationis non esse capaces. Hic autem tumor dili-

genti sui discussione , & profunda propria indigentia, ac teporis , & misericordie consideratione sanari debet.

XIII. Cum propter ægritudinem, & capitis languorem tempore meditationis discurrere nequis, satis erit de re aliqua pia in punctis præparatis proposita cogitare, eo modo illa aspiciendo, quo pulchram soles imaginem Christi, vel B. Virginis, sive alicujus sancti aspicere sine capitis fatigatione, & pios tamen affectus ex eo aspectu in te excitabis. Quando autem circa puncta meditationis, vel propositum vitandi peccatum, vel alicujus virtutis actus elicitur, optima erit meditatio, etsi nullus sentiatur fervor, vel consolatio sensibilis. Sicut enim medicina ab infirmo sumpta sine gustu, imò cum nausea, valde tamen illi prodest: ita sola recordatio piæ alicujus rei ad meditandum assumptæ prodest animæ, licet ob morbum, vel aliam causam inculpabilem nulla sentiatur consolatio.

XIV. Cum oratio definiatur à Theologis petitio decentium à Deo, satis constat ejus naturam in interno cum Deo colloquio propriè consistere. Non

quod semper, dum meditaris, cum Deo colloqui necessarium sit; sed quia omnes meditationis partes ad hanc ferè diriguntur, ejusque tota vis in ejusmodi colloquiis potissimum sita est. Tribus autem modis se habere potest intellectus in rerum divinarum consideratione. Aut tecum loqueris, & adductis hinc inde rationibus circareni propositam discursis: aut Deum quasi loquentem, ac tecum de via salutis verba faciètem audis: aut tu ipse cum Deo loqueris, & tuam meditationem in interius colloquium vertis. Hic verò postremus modus, ut suavior, sic utilior, & efficacior est, tum ad animum immutandum, tum ad affectus excitandos: ita tamen ut attentius audias, quid ipse Deus intus loquatur ad cor.

xv. Finis colloquii est vel Deum laudare, & pro collatis donis gratias agere: vel nova beneficia impetrare. Aliquando assumpta Filii persona à Deo petes quicquid ab optimo parente sperari potest. Aliquando sicut pauper à ditissimo Domino, sicut agrotus à pientissimo medico necessitati tuæ subsidium, infirmitati remedium postulabis. Interdum

astabis tanquam reus ante judicem, tanquam discipulus ante magistrum ea flagitans, quæ statui tuo, & assumptæ personæ convenient. Quod si te amor ad sublimiora evexerit, & fecerit audacior, licebit animæ tuæ Deum alloqui tanquam sponsum, eo spiritu, & iis affectibus, quibus Cantica Canticorum refertissima sunt. Bona autem in colloquiis petes pro te, pro tota Ecclesia, pro sociis, pro tibi peculiariter commendatis, pro omni statu hominum, pro vivis, & defunctis.

xvi. Non solum cum Deo, aut cum Christo Salvatore nostro, sed etiam cum Beatissima Virgine, cum Angelis, & Sanctis in oratione loqui poteris vel ad laudem, & gratiarum actionem, vel ad opem eorum implorandam. Pro hac re titulos efficaces assumes, & quidem si cum Deo loqueris ejus attributa, & infinitas perfectiones; beneficia nobis collata, & conferenda; ejus liberalissimas promissiones, infinita Christi merita, & virtutes; merita quoque B. Virginis, & Sanctorum, tuamque inopiam, & extremam miseriam. Si cum B. Virgine, ejus virtutes, officia, privilegia,

merita, & beneficia. Si cum Sanctis, eorum amorem erga Deum, & nos; virtutes, merita, charismata, & propensam erga nos voluntatem. Sunt & alia colloquia ad impios, & hostes Christi, quorum cæcitatem admiraberis, malitiam detestaberis, & te iis pejorem fateberis; ad te ipsum, tuam ingratitude, & tepiditatem agnoscendo, & detestando: ad creaturas sensu carentes, quarum exempla ad confusionem, & dolorem te movebunt, quia illis ministerium, & ordinem à Deo sibi impostum constantissimè servantibus, tu frequentissimè divina mandata transgressus es.

XVII. Cum finem orationi imponere volueris, tribus actibus eam concludes. Et primo quidem peractis considerationibus, & excitatis affectibus gratiarum actio subjicienda est. Ne autem affectuum, & variarum materiarum varietas mentem perturbet, id observabis, ut ex eo, quod medicatus es, ipsa gratiarum actio oriri quodammodo videatur. Si enim de passione fuit oratio, gratiæ statim agendæ erunt pro beneficio Redemptionis; atque è vestigio reliqua omnia

huic addentur generalia, & particularia, ea præsertim quæ in ipso orationis decursu à benignitate divina suscepisti, Sequitur secundo loco oblatio, qua offeres æterno Patri merita Christi, & omnium Sanctorum, & teipsum cum illis, atque omnia opera tua cum perfecta resignatione in omne beneplacitum Dei. Tandem petitio subjungenda est eorum, quæ ad salutem sunt necessaria pro te, & reliquis hominibus, adhibitis B. Virginis, Angelorum, & Sanctorum intercessionibus. Sic terminabitur meditatio, addita in fine oratione Dominica, vel aliquo Psalmo, sive alia oratione vocali, cujus formula hæc esse poterit.

Oratio post Meditationem.

Domine meus, & Deus meus, Ego pulvis, & cinis in tot periculis constitutus, quàm frigide, & distractè, ob negligentiam custodiæ sensuum meorum, & cordis mei, tecum locutus sum coram curia tua universa, quæ toto corde te laudat, sicut & animæ omnes justæ, ac verè religiosæ! Misere mei infantis, omnium egeni, vix valentis in

summis periculis opem tuam implorare. Suscipe si quid boni feci gratia tua, in unione meritorum, vitæ, & mortis B. Virginis, & Sanctorum tuorum: dispone de seruo tuo, sicut tibi visum fuerit, siue consolari libeat, siue relinquere me, tua voluntas fiat. Dignus verè sum, si me respicias, quem derelinquas; sed si te, & vulnera tua, erit unde me nō despicias, ut sit misericordia tua super omnia opera tua. Da mihi dulcissime Jesu, ut quod me docuisti ad salutem, & solatium animæ meæ, pro amore tuo promptè exequar, cum manifestè cognoverim voluntatem tuam. Tu scis, qui nosti omnia, ardentissimum desiderium meum, & quod abominer imperfectiones meas. Sed nisi miseratio tua magna sit super me, peribo utique in infirmitate mea. Quomodo enim mihi, qui nihil sum, & nihil pejus, confidere potero? Esto refugium meum, Deus meus, fiducia mea, & da mihi spiritum bonum, ut omnia opera mea perfectè faciam, sicut proposui; ne tot exempla tua, & documenta sint mihi in singultum, & dolorem cordis in die iudicii; quod toties me visitaveris, & visitatio tua non custodie-

rit spiritum meum, toties me paveris & non sim saturatus; toties vitam dederis, & tamen mortuus sim. Ne despicias servum tuum clamantem ad te, & te sequi desiderantem. Ecce enim de manu tua cruces, & adversitates libenter accepto, ut tibi, & sanctis tuis similis fiam, ut pro peccatis meis satisfaciam, ut te perfectè amem ex tota anima mea, ô bonitas infinita. Pone te ut signaculum super cor meum, ut signaculum super brachium meum, ut nemo mihi deinceps molestus sit, ut agnoscant omnes qui viderint, quoniam servus tuus ego sum, tibi soli vivere, & mori cupiens, & omnes te glorificent cum Patre, & Spiritu sancto laudabilem, & gloriosum in secula seculorum. Amen.

XVIII. Oratione peracta ejus examen instituendum est, ut si quidem bene successerit, in eadem meditandi ratione perseveres: sin autem malè, errores, eorumque radices abscindas, & emendes.

Primò igitur examinabis an ea omnia servaveris, quæ in præparationibus præmittenda esse docuimus: an puram habueris intentionem: an quid erratum

fit in intellectus, & voluntatis exercitatione: quo spiritu, quoque affectu ipsa meditatio terminata sit. Secundò examinandæ sunt distractiones, quales fuerint, quo ex fonte processerint, quæ eis remedia, & qua diligentia adhibueris. Tertio examinandi pii motus, inspirationes, illustrationes, gustus spirituales, an à bono vel à malo spiritu fuerint, juxta regulas ab iis traditas, qui de discretionem spirituum scribunt. Quartò ariditates, tædia, desolationes utrum provenerint ex demonum impugnatione, an ex tua culpa, seu negligentia, vel certè ex divina permissione ad tuam eruditionem. Quintò denique animi decreta, quæ in orationis decursu concepisti, ut scias quo tempore, & qua ratione executioni mandari possint, & debeant. Ipsa verò decreta, & fructus ex oratione perceptos notare oportet in libello ad hunc usum parato. Tum aliquot puncta seliges tota die ruminanda; idque summo-pere curabis, ne balsamum devotionis per loquacitatem evanescat. Demum ab oratione placidè transibis ad tui status obligationes, etiamsi à spiritu orationis plurimum distent; utrumque enim Dei voluntati

voluntatis est, & orationi incumbere, & propriæ obligationi satisfacere.

xix. Signa boni successus orationis hæc sunt. Elapsa ejus hora se paratum sentire ad diutius meditandum, si obedientia, & vires corporis id ferrent: spontè distractionibus non consensisse: debitum ordinem, & methodum servasse in præparationibus, discursu, colloquiis, affectibus, principio, medio, & fine: varios actus virtutum exercuisse, & proposita practica in particulari formasse: in propositorum executione majorem solito facilitatem, robur, & gaudium sentire, non solum tempore tranquillitatis, & consolationis; sed etiam ingruente tentatione, & desolatione. Optimè Climacus gradu 28. Quidam, ait, ab oratione exeuntes, veluti ex fornace ignis egrediuntur sordis, ac materiæ levamen sentientes: alii velut à luce illustrati humilitatis amicti veste inde procedunt. Qui verò absque his duobus effectibus ab oratione exeunt, corpore non spiritu orant.

xx. Si orationis infusæ, & supernaturalis gratiam à Deo misericorditer recepisti, summa diligentia eam custodi,

ne thesaurum cœlitus immissum tua culpa, & socordia amittas. Et primo quidem valde humilis esto, teque omnino tanta gratia indignum agnosce, & fatere te nullatenus eam mereri potuisse. Illos deinde, quos hujusmodi donis carere conspicias, ne contemnas, aut minoris æstimes, perfectio enim non in his gratiis extraordinariis, sed in ferventiori amore Dei, & majori tolerantia consistit. Cave etiam ne nimium afficiaris erga consolationes & delicias spirituales, quæ infusam orationem comitari solent; sed memor psalmi præcipientis, *Divitiae si affluant, nolite cor apponere*; divinæ voluntati conformare te stude cum plena resignatione ad carendum in perpetuum talibus donis, & vivendum, si Deo placuerit, in ariditate, & desolatione. Quod si tibi subtraxerit Deus gratiam hujus orationis, & cœlestes illæ divinarum consolationum aquæ defecerint, fuge otium, & strenuè incumbere solidarum virtutum exercitationi, & orationi mentali magis ordinariæ, donec iterum aspires dies, & lux Spiritus sancti denuo cordi tuo illucescat. Denique hoc donum, dum eo potiris, humilitatis

velo sapienter occulta, nec ob illud inaniter insolesce: nam quò magis te abjicies, eò altius ab eo exaltaberis, qui superbis resistit, & gratiam præstat humilibus.

§. XII.

*Aspirationes pro quotidianis
exercitationibus.*

UT in omni actione tua mens nunquam à Deo deflectat, eam subinde ad ipsum elevabis ignitis aspirationibus, quas in principio, progressu, & fine cujusque operis ex intimo cordis affectu elicies. In exemplum sequentes propono:

Adjuva, dirige, & conforta me Domine, ut tecum, propter te, & secundum te hoc opus perficiam, quia sine te nihil sum, nihil possum. Suscipe sancta Trinitas unus Deus hoc exiguum servitutis mee obsequium ad maximam tui gloriam, sitque mea unica delectatio, & merces magna nimis, ut in eo tibi placeam, licet toti mundo displiceam. Mihi pro minimo est, ut ab hominibus judicer, aut ab

humano die ; neque diem hominis desideravi , tu scis : sed ad te sunt oculi mei , qui habitas in cœlis.

Purga me Domine ab omni impuritate , averte omnem tepiditatem , & negligentiam , da vires menti , & corpori , illumina intellectum , accende voluntatem , & da huic operi salutarem progressum , ut à te coeptum per te perficiatur.

Accende me , & promove ad omne opus bonum , clementissime Pater , ut in beneplacito dilecti Filii tui tibi placitis actibus semper merear occupari.

Serviat tibi Domine Deus , quidquid ago , lego , & scribo ; quidquid cogito , dico , & intelligo , omne opus meum à te incipiat , & in te finiatur.

Hunc meum laborem tibi , Domine Iesu gratum faciant omnium electorum tuorum labores & quidquid ab eis pro tui amore , & honore gestum est : omnia enim illorum opera offero tibi , & per te Patri tuo & ad gloriam tuam.

Ah si mihi liceret elongari ab hominibus , & procul à negotiis vivere in solitudine , quales delitiae ! sed si tu , Domine , aliter disponis ; fiat voluntas tua.

Quam bonum est , & quam jucundum

tibi nudè, & simpliciter adharere, Deus meus, qui primum principium es, & ultimus finis. Atque utinam, cum foris versor maxima pars mei in te quiescat, in quo est vita mea, & gaudium & voluptas.

Da mihi Domine sedium tuarum assidetricem sapientiam, ut mecum sit, mecum laboret, ut sciam quid acceptum sit coram te omni tempore.

Pœnitet me Domine temporis inutiliter transacti: pœnitet quod parum hætenus te dilexi. Vtinam deinceps in rebus tibi placitis semper occuper.

Veni cœlestis amor, & splendidissima luce tua dissipa tenebras ignorantia meæ, tuoque ardore vivifica languentem animam meam, ut videam semper quid agere debeam, & illud opere compleam.

Domine Iesu omnes negligentias meas, & omnia peccata in sanguine tuo pretiosissimo, & in abyssu tue infinita charitatis, ac misericordiæ immergo, & projicio, roganste humiliter, ut ea ad nihilum redigas, & absorbeas, & nunquam amplius compareant.

CAPUT III.

DE OFFICII DIVINI
recitatione.

§. I.

De Preparatione ante Officium.

N I H I L magis necessarium Religioso, quam ut attentè, devotè, & reverenter divinum Officium persolvat; de qua re hic breviter agendum est. Incipio autem à proxima præparatione, quæ nocturnis vigiliis tota præmitti debet, ante reliqua verò officia post redditas Deo gratias, quod te incolumen usque ad eam horam custodierit, ea tantum indicaberis, quæ à puncto quarto & deinceps descripta sunt.

1. Nocturno tempore audito signo, quo ad vigiliis excitaris, quod à sancto Dorotheo Angelicum nuncupatur; considera illam esse vocem Dilecti pulsantis, & dicentis, *Aperi mibi soror mea sponsa*: Statimque surgens præpara illi habitaculum cordis tui, ne si fortè mo-

ram feceris in surgendo, ille declinet à te, & animā tuam aridam, & desolatam relinquat. Dic ergo illi cum S. Job; *Vocabis me Domine, & ego respondebo tibi, operi manuum tuarum porrige dexteram:* Et cum Psalmographo, *Paratum cor meum, Deus, paratum cor meum, cantabo, & psalmum dicam: exurge gloria mea, exurge psalterium, & cithara, exurgam diluculo.* Quod si timore magis, quàm amore afficeris; excipe signum illud tanquam tubam illam terribilem, quæ extrema iudicii die in auribus omnium horrendum illud personabit, *Surgite mortui, venite ad iudicium.* Ideoque statim cum festinatione è cubili profiliens, Deique timore concepto dic, *Domine ne in furore tuo arguas me, neque in ira tua corripas me. Tu terribilis es, & quis resistet tibi? ex tunc ira tua.* His, & aliis huiusmodi affectibus mentem diligentissimè occupabis, ut primitiæ cogitationum diem festum agant Deo.

II. Excitatus à somno considera te in medio laqueorum esse, quibus invisibiles hostes te ex omni parte irretire conantur: quapropter signo Crucis muni-

tus orationis arma assume , & ignitis aspirationibus ad Dei laudes te excita, de qua re vide quæ supra notavi §. I. cap. I. Dum verò hæc agis torporem, & somnolentiam viriliter excute elevatis manibus , flexis genibus , expansis brachiis , vel alia simili corporali exercitatione.

III. Quia nihil coinquinatum intrat ad Deum , & bestia , quæ tetigerit montem lapidabitur , examina post hæc conscientiam tuam , & si quid culpæ in ea inveneris , plange coram Domino delictum tuum : etsi nihil tibi conscius es , cave elationem , & dic cum Propheta , *Ab occultis meis munda me, & ab alienis parce servo tuo.* Tum actum contritionis elice , *Peccatori enim dixit Deus , quare tu enarras justitias meas , & assumis testamentum meum per os totum ?*

IV. Viva fide apprehende te versari in oculis Dei , Domini infinitæ majestatis , benefactoris infinitæ liberalitatis , judicis infinitæ justitiæ , patris infinitæ benignitatis , sponsi infinitæ amabilitatis , & propone nullas admittere mentis evagationes.

V. Actum simplicissimæ , ac purissimæ intentionis

intentionis ferventer exerce : omnes cogitationes, verba, & opera tua offer Deo ad honorem, & gloriam ejus, & te perfectè resigna in omne beneplacitum ipsius. Officium verò recitare propone, ut Deum colas, & laudes : ut eidem gratias agas pro innumeris beneficiis : ut ei placeas, & gratum adhibeas sacrificium : ut supremam ejus excellentiam, & tuam subjectionem protestaris : ut iratum eum mitiges : ut pro peccatis tuis satisfacias : ut Ecclesiæ præceptum adimpleas : ut omnia tibi, & fratribus tuis vivis, & defunctis necessaria impetres : ut virtutum augmentum obtineas : ut tuæ voluntatis cum divina unionem impetrare quandoque valeas. Tum statue cum magna reverentia, attentione, & devotione totum officium persolvere in unione illius reverentiæ, attentionis, & devotionis, qua Jesus Christus Dominus noster orabat in terris. In honorem quoque beatæ Virginis, & omnium Sanctorum, eorum præsertim, quorum festivitas ea die celebratur : & in memoriam eorum mysteriorum, propter quæ illud officium est institutum.

.VI. Audito ultimo signo puta astare

L

tibi Angelos clamantes , *Ecce spiritus venit , exite obviam ei* ; atque illico affectionum tuarum apratis lampadibus curre in locum tabernaculi admirabilis usq; in domum Dei. Dic cum sanctis Regibus, *Hoc signum magni Regis est, eamus, & inquiramus eum, & offeramus ei munera, sacrificium pingue, & holocaustum medullatum.* Considera quàm magnum opus sit Deum laudare , ante cujus conspectum virtutes cœlorum contremiscunt. Et quis es tu pulvis , & cinis , ut loquaris ad Dominum tuum ? Humiliare itaque , & relictis in ingressu chori cunctis terrenis cogitationibus ingredi donum Dei , & dic : *Introibo in domum tuam, adorabo ad templum sanctum tuum, & confitebor nomini tuo.* Deinde adora sanctissimum Sacramentum , & sanctos, quorum altaria , & reliquæ ibi sunt. Si transis per cæmeterium, ora pro fidelibus defunctis : & dic : *Salvete Christi fideles anima , quæ hic , & ubique requiescitis ; Iesus , qui pro vobis passus , est , vos consoletur , & requiem vobis æternam donare dignetur per intercessionem B. Maria , & omnium sanctorum, quam adeptæ memores mei estote. Amen.*

VII. Cum perveneris in chorum considera universalem Ecclesiam unam, eandemque esse, & quæ in cælis coronata triumphat, & quæ adhuc in terris militans suspirat ad patriam. In ea omnes creaturæ pro modulo suo Deum collaudant, Angeli, homines, bestię, & universa pecora, volucres cæli, & pisces maris. Lætare igitur, quod sic ab hominibus glorificetur Deus, & desideria omnium Justorum omniumque Beatorum, & Angelorum fervorem, & charitatem habere. Divinum denique auxilium implora, ut ipsè qui solus potest, tumultuantium cogitationum, & affectionum comprimat turbam, insidiantes coerceat dæmones, intellectum illuminet, inflammet affectum, & omnia interiora, atque exteriora tua sub certæ compositionis disciplina moderetur.

§. II.

Oratio ante Officium.

GRatias tibi ago Domine sancte Pater omnipotens æterne Deus, ob innumerabilia beneficia tua, præsertim

verò quia usque ad hanc horam me custodire, & à multis periculis misericorditer præservare dignatus es. Insuper elegisti me in sortem tuam, ut ministrarem in templo tuo, tibi que laudes canerem die, ac nocte. Ego autem tanto benefactori ingratus in terra Sanctorum iniqua gessi, & delicta mea creverunt usque ad cælum. Ideo percutio pectus meum, & procumbens humiliter ante thronum majestatis tuæ infinitam clementiam tuam deprecor, ut facias cum me indignissimo servo tuo secundum multitudinem misericordiæ tuæ, quoniam corruptæ sunt cicatrices meæ à facie insipientiæ meæ. Ne derelinquas me Domine Deus meus ne discesseris à me. Non enim mortui laudabunt te, neque narrabunt misericordiam tuam qui descendunt in infernum, sed vivens, vivens confitebitur tibi, sicut & ego hodie, & psallam nomini tuo quandiu fuero. Obsecro igitur, ne me cantantem laudes tuas projicias à facie tua, sed propter tuam bonitatem, & inexplicabilem perfectionem, per Jesu Christi Salvatoris nostri Incarnationem, vitam, & passionem; per beatæ Mariæ semper Virginis,

spirituum beatorum, omniumque San-
ctorum merita, & intercessionem sancti-
fica me, & emunda ab omni inquina-
mento mentis, & corporis: da sermo-
nem rectum, & bene sonantem in os
meum, ut placeant verba mea in con-
spectu tuo: excita me ab omni torpore,
& pigritia: expugna impunantes me, &
comprime impetum inimicorum. Fac
mecum signum in bonum, ut videant qui
oderunt me, & confundantur: sensus
externos sub omni disciplina, & hone-
state compone. Reple mentem, & me-
moriā placitis tibi objectis, & imagi-
nibus. Illumina intellectum splendore
gloriæ tuæ, & amoris tui facibus volun-
tatem accende. Inclina aurem tuam ad
preces meas, & præsta ut intimo affectu
te adorem, te glorificem, tibi gratias
agam, tuamque benignitatem pro me,
& omni populo efficaciter implorem.
Esto mihi in Deum protectorem, ut in
voce Iudis reddam tibi vota mea, obse-
quium servitutis meæ. Ego sum, ego
sum, qui Domino canam, psallam Do-
mino Deo Israël. . Tua est Domine ma-
gnificētia, & potentia, & gloria, atque
victoria: & non est qui possit resistere

voluntati tuæ. Tibi laus debetur ab omni creatura; cuncta enim, quæ in cælo sunt, & in terra, tua sunt. Tibi sancti, & humiles corde, tibi spiritus, & animæ iustorum gloriam concinunt sine fine. Ego quoque licet peccator te summo-
pere laudare desidero, & sic honorem afferre tibi, quoniam tu dixisti, sacrificium laudis honorificabit me. Accipe itaque laudationem meam, vitulos labiorum meorum, & quia vir pollutus labiis ego sum, sanctifica me, & mitte Angelum tuum, qui calculo ignito emundet cor meum, & faciat me dignum laudibus tuis. Scio Deus meus, quod probes corda, & diligas simplicitatem. Unde & ego in simplicitate cordis mei lætus offero hoc officium, quod nunc debeo ex Ecclesiæ tuæ præscripto recitare. Illud inquam offero in unione illius perfectissimæ laudis, & dilectionis, quibus altissima Trinitas se laudat, & amat: in unione omnium laudum, orationum, & exercitiorum Domini nostri Jesu Christi, beatissimæ Virginis, omnium Angelorum, & Sanctorum, eorum præsertim, quorum hodie memoriam agimus, quæ tibi ob-

tulerunt, & offerent ab initio mundi
usque in eternum: in unione omnium
bonorum, quæ à fidelibus tuis sunt, facta
sunt, & perficientur: in plenitudine sen-
sum, quos intendit Spiritus sanctus jux-
ta intentionem Ecclesie, & superiorum
meorum, & secundum meam speciem
intentionem, & omnium proximorum
indigentiam. Suscipe illud, summe Deus,
in omnigenam hostiam, & oblationem
ad maiorem tui gloriam, in memoriam
Incarnationis, vite, & passionis Domini
nostri Jesu Christi; ad honorem beatæ
Virginis, & omnium Sanctorum; ad
nostram, & omnium, pro quibus in-
tendimus, vel debemus, vel tu scis, &
vis nos orare debere, salutem, pacem, &
prosperitatem: itemque in refrigerium
omnium animarum existentium in Pur-
gatorio, pro conversione omnium infi-
delium, & pro pace, & prosperitate to-
tius mundi. Et nunc, Domine, memor
esto mei, & exaudi me: nec enim ex af-
fectu meo, vel in justificationibus meis,
fiduciam habeo orandi ad te; sed ex af-
fectu, pietate, & devotione piissimi
cordis Filii tui Domini mei Jesu Christi,
& purissimæ Matris ejus, & omnium

justorum, qui tibi placuerunt ab initio, de quibus scriptum est, Desiderium pauperum exaudivit Dominus, preparationem cordis eorum audivit auris tua. Attende Domine, & ne repellas orationem meam, quam servus tuus orat coram te hodie, tibi gratias agens pro omni bono quod es, quod habes, quod operaris: pro omnibus, quæ pro nobis pertulit Unigenitus Filius tuus in assumpta humanitate: pro omnibus donis à te collatis, & conferendis Deiparæ Virgini, Angelicis spiritibus, sanctis hujus diei, meis specialibus advocatis cunctisque electis tuis, atque universis rationalibus, & irrationalibus creaturis.

In peculiarem quoque commemorationem talis mysterii, vel objecti hac hora recolendi. Eia ergo piissima Virgo Maria mater Dei, & Advocata nostra, suscipe me in materna tua custodia, & directione; & has canonicas preces tuis efficacissimis orationibus unitas offer Filio tuo ad nostram, omniumque salutem. Purgate me Angeli sancti, excelsi Principes, & domestici Dei, succendite cormem, & laudes meas ante thronum Dei in turribus aureis adolete.

Angele sancte , custos fidelissime , respice inimicos meos , quoniam multiplicati sunt , apprehende arma , & scutum , & exurge in adiutorium mihi. Vos omnes felicissimi cives supernæ civitatis , qui statis in domo Domini , in atris domus Dei nostri : Vos beatissimi N. & N. quorum me patrocinio , & tutelæ jam pridem commendavi : Vos N. & N. qui hac die de carnis ergastulo in veræ libertatis patriam evolastis ; per ipsum vos rogo , qui vos elegit , memores mei estote , & orate pro me , ceterisque miserrimis peccatoribus , ut vestris intercessionibus adjuti levare corda nostra cum manibus in oratione possimus. Præstante Domino nostro , quem jugiter laudare desideramus benedictum , laudabilem , & gloriosum per infinita secula seculorum. Amen.

§. III.

Praxis Attentionis.

1. **T**Riplex est attentio , materialis , formalis , & finalis. Praxis materialis in hoc dumtaxat sita est , ut om-

nia verba integrè, perfectè, & distinctè pronuncientur, ita ut à sociis audiri, & percipi possint. Ad hanc tenentur omnes, etiam ignari linguæ Latinæ, sub gravioris culpæ reatu, ut per se constat.

11. Praxis formalis à D. Augustino Conc. 3. in Psal. 30. sic explicatur. Si orat psalmus, orate, si gemit, gemite; & si gratulatur, gaudete; & si sperat, sperate; & si timet, timete; omnia enim quæ hîc conscripta sunt, speculum nostrum sunt. Eandem Cassianus probat, & docet capite 11. decimæ Collationis. Omnes, inquit, psalmodiarum affectus in se suscipiens ita incipiet decantare, ut eos non tanquam à Propheta compositos, sed velut à se editos, quasi orationem propriam profunda cordis compunctione depromat; vel certè ad suam personam æstimet eos fuisse directos, eorumque sententias non tunc tantummodo per Prophetam, aut in Propheta fuisse completas, sed in se quotidie geri, implerique cognoscat. Eundem namque respicientes cordis affectum, quo quisque decantatus, vel conscriptus sit psalmus, velut auctores ejus facti præcedemus magis intellectum ipsius, quàm

sequemur. Hæc Cassianus, ex quibus liquet hoc genus attentionis non nisi doctis convenire, qui sensum psalmorum literalem, & mysticum percipiant, & sanctorum Patrum in ipsos lucubrationes frequenti manu versarint. Est autem hæc attentio cæteris omnibus faciliior, utilior, atque evagationibus minus subiecta, sanctorumque Patrum documentis, ac Ecclesiæ spiritui magis conformis.

III. Postremus attentionis modus doctis, & indoctis communis est, per quem finem orationis respicimus, qui est Deus. In viris doctis formalem attentionem non excludit, sed perficit. Doctores spirituales varias methodos adinvenerunt respiciendi jugiter Deum dum oramus, vel certis quibusdam signis materialibus adhibitis, quæ mentem percellant: vel assumptis objectis ex vita, & passione Christi: vel selectis quibusdam contemplationibus ex divinis attributis: quæ omnia hic transcribere, ut nimis laboriosum, ita & inutile foret. Hæc enim exercitia vix ad praxim reduci possunt sine distractione, aut gravi capitis offensione: nam continua attentio ad illas

signorum distinctiones, si diu adhibeatur, caput ledit; si verò interrumpatur, inde sequuntur distractiones.

§. IV.

Vnde eliciantur devotionis affectus.

QUINQUE sunt fontes è quibus inter psallendum hauriri poterunt devotionis affectus. Primus fons copiosior ceteris sunt ipsimet psalmi, qui cum diversis deserviant affectibus, aptissimi sunt ad excitandam in corde devotionem. Ut si psallas versiculum illum, *Domine non est exaltatum cor meum*; Sic poteris affectus excitare: Utinam numquam fuisset exaltatum cor meum; ô si cor meum numquam exaltaretur. Væ mihi, qui revera exaltatum est cor meum. Quando fiet istud, Domine, ut non exalteretur cor meum. Secundò poterunt affectus educi ex singulis verbis, cum præsertim sub unica voce multiplici notarum decursu protrahitur cantus: ut si hoc nomen, *Pater*, audiatur in cantu, protinus assurgere debet animus ad tanti Patris amorem,

& reverentiam : ad orandum fiduci aliter
pro necessitatibus nostris : ad generosum
terræ contemptum ; ad supernæ here-
ditatis desiderium , quam Pater filiis
suis præparavit in cælo. Tertiò eliciun-
tur adjiciendo verbis psalmorum quæ-
dam adjectiva , ut si legas versum , *Mi-
serere mei Deus* , dices , Deus bone , &
misericors , cui proprium est misereri
semper & parcere : benignissime Domi-
ne , suavis , & clemens miserere mei ne-
quissimi , immundi , & abominabilis pec-
catoris , qui tam multipliciter te opti-
mum Patrem offendi. Quartò eruuntur
ex circumstantiis orationis , consideran-
do nimirum quis oret , quem , pro qui-
bus , quid petat , cur , quando , & alia
ejusdem generis. Tandem hauriri potest
affectus ex objectis vitæ & passionis
Christi , quæ possunt singulis officiis assi-
gnari. Illud porro notandum , ut pro di-
versitate orantium mutentur affectus
secundum exercitia triplicis viæ purga-
tivæ , illuminativæ , & unitivæ. Incipien-
tes enim flere peccata debent & inge-
mescere , ac timere : proficientes virtu-
tum augmentum petere , seque Domi-
no ad heroicas virtutum actiones ma-

gnanimè offerre : perfecti verò ad unionem cum Deo ardenti amore suspirare.

§. V.

De privata Officii recitatione.

Qui privatim Officium extra Chorum recitant, tametsi suprascripta omnia servare non possint, satagere nihilominus debent, ut suæ pensum servitutis reverenter, attentè, & devotè reddant, integra verba distinctè pronunciantes, statutam servantes horam, nisi necessitas excuset, & locum aptum querentes, atque à distractionibus remotum. Utantur etiam situ decenti cum timore divino flectentes genua, ut Regulæ suæ capite 50. sanctus Benedictus decernit. Hoc autem præceptum tanto olim rigore servabant Cistercienses, ut etiam iter agentes, & equitantes horis constitutis descenderent, ut flecterent genua. Cum verò Cluniacensibus hujus Monasticæ sanctionis transgressionem objecissent, Petrus Venerabilis his verbis respondit, lib. 1. epist. 28. de flexionibus regularium horarum quid-

quid regula jubet omnimodis custodimus, & antequam horum decantare incipiamus, ubicumque simus cum timore divino genua flectimus. Prohibet hoc aliquando nimius iuber, condensa nix, lutulenta tellus, & tunc loco moctaneæ psalmum Miserere mei Deus decantamus, ut tali commutatione præceptum, quod implere non possumus, recompensemus. Cave itaque, ne, dum privatim recitas, cursim, & perfunctorie Officium tuum persolvas, sed quantum fieri poterit præscripta documenta observes, præmissa præparatione, & una ex suprascriptis attentionibus adhibita, ne oratione tua Deum provoces ad iracundiam.

§. VI.

De fine cujusque Officii.

Meliorum esse finem orationis, quam principium sapientissimus mortalium asseverat: pendent enim à fine omnia, & quod postremo adjectum est secum rem totam traxisse videtur, Studet orator ea præclara facere, quæ

sunt in fine orationis, ut cum plausu recedat. Athleta si, vel omnibus victis victus fuerit ab ultimo, nonne se ipsum, & gloriam perdit? Ita oratio laudabilis non erit, nisi optimo fine terminetur.

I. Officio igitur peracto recogita primo quid in recitatione transgressus sis, quot, & quales defectus in attentione, devotione, & reverentia commiseris, & de iis veniam pete cum dolore, & contritione, ac proposito emendationis. Si quid autem omissum, vel cum culpabili distractione persolutum est, statim supple, & culpam pœnitentia delere non differas.

II. Gratias Deo age, qui te suis laudibus quantumvis indignissimum interesse, & eas immundo ore decantare permittit. Deinde tuum obsequium per manus B. Virginis, & omnium Sanctorum, eorum præsertim quorum festivitas celebratur, Domino offer in unione meritorum Christi juxta intentiones initio præfixas.

III. Defectus, quos commisisti quàm primum expiare studeas cum proposito emendationis.

§. VII.

Oratio post Officium.

CRatias tibi ago Domine Deus misericors, & clemens, patiens, & multæ miserationis, quod meas indignas orationes audire dignatus sis, & de manu mea laudum tuarum sacrificium suscipere. Unde mihi hoc, ut invenirem gratiam ante oculos tuos, Domine mi, qui consolatus es me, & fiduciam præbuiisti orandi te? Dimitte Domine, secundum magnitudinem misericordiæ tuæ quidquid in tuo servitio scienter, vel ignoranter peccavi, & admitti jubeas ante conspectum Majestatis tuæ deprecationem servi tui. Vide afflictionem meam amaram nimis, & omnes transgressionem meas in vulneribus ablue dilectissimi Filii tui. Suscipe preces, & laudes, quas effudi coram te cum laudibus, & orationibus Domini mei Jesu Christi, Beatissimæ Matris ejus, beatorum Angelorum, & omnium Sanctorum, eorum præcipuè quorum hodie festivitas celebratur: ad majorem tui gloriam, & su-

M

premam latrariam, ad totius Curiae cœlestis venerationem, ad meam, meorumque omnium utilitatem, & salutem, sicut tu scis, vis, & potes. Recordare fragilitatis meæ, & ignosce confitenti per unicè tibi dilectum Jesum Christum Filium tuum, in cujus mellissimum cor officium meum, & omnia opera mea trado, ut ea emendes, suppleas, purifies, & accipies. Pie Jesu Fili Dei, & Mariæ Virginis dignare de manu clementissimæ Matris tuæ suscipere hoc tepidum, & distractum officium, & unitum tuis ardentissimis orationibus Patri tuo repræsenta. Responde quæso, satisfac & supple pro me plenissimè. Tu verò Pater benignissime respice in faciem Christi tui, & miserere mei, atque omnium pro quibus orare debeo, gratiam tribuens te dignè semper laudandi, & glorificandi, per ipsum, & cum ipso, & in ipso, cum quo, & Spiritu sancto unus es Deus, unus es Dominus laudabilis, & gloriosus, & superexaltatus in sæcula. Amen.

CAPUT IV.

DE FINE DIEI.

§. I.

De examine Conscientiæ.

Perfectio, & puritas Christianæ vitæ hoc à nobis exigere, ut quæcumque agimus attentè semper examinemus, ita ut vita nostra continuum examen esset: sed quia paucorum est ista virtus, id saltem in fine diei agendum est. Die igitur peracto singulas actiones tuas internas, & externas cum omnibus circumstantiis attentè discuties, & quas à regula perfectionis descivisse repere-
ris, acri censura coram Deo reprehendes.

1. Hoc autem examen inchoaturus cogita te ab Angelo tutelari ad divinæ clementiæ tribunal accersiri ad reddendam rationem, certa tibi oblata spe obtinendæ veniæ, & misericordiæ, dummodo errata tua contritione eluere, pœnitentia expiare, & fervore spiritus

compensare studueris. Ideo cum recta intentione, & unica fide præsentis Dei tanquam amantissimi Patris, cum magna humilitate, reverentia, & fiducia prosterne te ante thronum divinæ gratiæ inter phalanges Sanctorum, qui mediante hoc exercitio suas olim stolas in sanguine Agni dealbarunt.

I I. Examinandæ conscientiæ quinque sunt partes. Prima est commemoratio beneficiorum Dei, & humilis, ac fervida gratiarum actio. Tua enim improbitas divinæ liberalitati collata majorem tibi pudorem incutiet. Gratias autem ages pro beneficiis communibus, & particularibus, tum præteritis, tum illius diei; imò & pro futuris, pro occultis item, & ignotis, idque brevissimè, & ferventer, hac vel simili ratione. *Gratias tibi ago, Domine Deus meus, pro universis beneficiis tuis, quæ mihi hodie, & toto tempore vite meæ misericorditer contulisti. Tu enim, benignissime Pater, ex æternitate vidisti, & dilexisti me: tu ex nihilo me creasti, & usque ad hanc horam conservasti, atque propter me omnia sapientissimè regis, & gubernas: tu me redemisti pretioso sanguine Filii tui: tu*

me Christianum, & religiosum, & Sacerdotem fecisti; atque in hoc statu ab innumeris peccatis, & defectibus preservasti, vita perfecta desiderium dedisti, bonos instinctus, & sanctas inspirationes immisisti, emendationem meam patientissime expectasti, longiusque spatium tibi serviendi, & lucra spiritualia congregandi tribuisti. Sit nomen tuum benedictum in secula, quia gratiæ tue munus presidio à multis hodie calamitatibus, & miseriis corporalibus, & spiritualibus, te preservante, liber evasi. Pro singulis etiam nature, & gratia donis, his præsertim quæ ipse cæcus non video, & ignoro; pro innumeris beneficiis mihi, & omnibus creaturis exhibitis, & exhibendis ex totis præcordiis meis gratias ago & meo, & omnium creaturarum nomine, & affectu: atque id continuare desidero præ propter te in omnem æternitatem.

III. Secunda pars est postulatio gratiæ, qua culpæ tuas dignoscere valeas, & defectus investigare. Nam cum prævum sit cor hominis, & inscrutabile, & amor proprius in discernendis delictis tenebras offundere, & excusationum

tricasnectere soleat, vix poteris lapsus tuos dignoscere, nisi desuper lucem immittat Pater luminum, qui scrutatur renes, & corda. Sic igitur post gratiarum actionem orationem prosequeris. *Nunc verò, Domine, his beneficiis tuis, per eandem charitatem tuam aternam erga me, aliud adijunge illuminans tenebras meas & gratiam tribuens omnia peccata, & negligentias meas agnoscendi, detestandi, & emendandi, ut tibi deinceps per omnia placeam, & dignos faciam pœnitentia fructus.*

IV. Tertia pars in ipsa discussione conscientie sita est, qua te ipsum intus, & in cute agnoscere studeas. Ea facilis, & fructuosa erit, si ordinatè, succinctè, & exactè instituat. Exactè, ita singula expendendo, ac si ea subito in confessione explicare deberes. Succinctè, non immorando diutius quàm par sit in singulis defectibus excutiendis. Ordinatè, certam methodum servando, quæ triplex esse potest. Prima, ut discutiantur priori loco cogitationes, & affectus, tum verba prolata, & audita, demum opera, & omissiones. Secunda plura continet capita. Nam primò discurrere

debes circa cogitationes , si fuerint charitative ad Deum , bonæ ad proximum , humiles ad teipsum , puræ ad carnem , & mundum. Secundo circa sensus , si fuerint disciplinati , custoditi , verecundi , non curiosi , non in varia , & vana objecta dispersi. Tertio circa locutionem , si fuisti in ea brevis , tardus , circumspetus. Quarto circa opera , si operatus es quod debes , quod licet , decet , & expedire. Quinto circa conversationem , si fuisti in ea maturus , humilis , & benignus. Sexto circa omissiones , quàm negligens fuisti in lectione , oratione , & executione boni operis ; in corde custodiendo , tempore expendendo , fine intendendo ; ad dolendum de peccatis , ad resistendum tentationibus , ad proficiendum in virtutibus. Septimo metiri debes quantum quoq; die defeceris à priori fervore , profeceris in intento fine , abjeceris de solitis imperfectionibus. Tertia , quæ videtur commodior , est ut discurrendo per singulas actiones , & exercitia diligenter inquiras quid singulis horis ab ultimo examine elapsis peccaveris contra Deum , proximum , & teipsum ; cogitatione , verbo , opere , & omissione.

Cæterum non sufficit in singulis actionibus examinandis commissa peccata invenire eorumque radicem, quamvis hic sit finis præcipuus examinis; sed ratio insuper habenda est omnium quorumcumque defectuum, & inquirendum, an defuerit eis aliqua perfectio, an tepidè peractæ sint, an irrepsit inanis gloria, vel finis distortus, & minus recta intentio. Vide etiam, & considera, an aliquod bonum supererogationis data occasione omiseris, an in omnibus elegeris quod perfectius est; etsi quod Dei beneficium in ipsa actionum discussione occurrit memoriæ, statim pro illo breviter, & ferventer Domino gratias age. Hæc si servaveris, eam conscientiæ tenebilitudinem assequeris, quæ quoslibet novos mentis oculis statim subjiciet expiandos.

v. Sequitur quarta pars, quæ in dolore consistit, & detestatione peccatorum, ac proposito emendationis. Quare expedita conscientiæ discussione summo cum fervore doloris actum elicies non solum de occurrentibus noxis, & imperfectionibus, sed etiam de peccatis occultis, & de reliquis totius vitæ tuis,

&

& alienis, qui dolor ex amore Dei perfectus ipsi Deo summopere placet. Formula hæc esse potest. *In his, & aliis multis, quæ propter cæcitatem meam ignoro, peccavi hodie coram te, Domine Deus misericordia mea, & pro omnibus bonis quæ tribuisti mihi, mala tibi retribui, & ingratitude. Doleo de his omnibus, & ea detestor super omnia alia mala propter te Domine, quem super omnia bona diligo, nec mea solum peccata maximopere mihi displicent, sed & omnia totius mundi, quæ utinam impedire possem, ut omnes te infinitè amabilem agnoscerent, amarent, glorificarent. Ignosce mihi, & omnibus, Pater misericordiarum, omnes enim offensas hujus diei, & totius vitæ meæ, ac totius mundi in abyssum projicio infinite misericordia tue, & per mortem Filii tuo rogo te dimitte quicquid peccatum est, & da gratiam, ut deinceps purius vivam. In te confido Domine, & sperans in adiutorio gratiæ tuæ firmissime propono non peccare amplius, & mores meos emendare.*

vi. Quinta demum pars est castigatio aliqua, sive mulcta, & pœnitentia

pro peccatis commissis, cum qua simul offeres merita Christi, & Sanctorum hoc modo. *In satisfactionem verò peccatorum meorum offero tibi Deus meus, Vitam, Passionem, Crucem, & Mortem Domini mei Iesu Christi, merita beata Virginis, & omnium Sanctorum, illorumque plenarias, & tibi gratissimas satisfactiones, totam insuper vitam meam, animam meam, & corpus meum ad omne beneplacitum tuum in tempore, & aternitate, cum vero, insatiabili desiderio plenius iustitia tua satisfaciendi; & hanc mulctam, quam mihi impono. Mulcta autem hæc erit, orationem Dominicam cum Angelica salutatione, vel aliquem plasmum flexis genibus recitare, terram aliquoties osculari, cilicio per diem carnem affligere, & alia ejusdem generis.*

§. II.

De examine Particulari.

NUllum efficacius remedium ad vitia extirpanda, & acquirendas virtutes, reperitur, quam singulari certa-

mine unum quodque vitium aggredi, & quotidie contra ipsum pugnare, donec expugnetur, instituto de hac re examine particulari: quo in negotio ut te prudentiùs, & securiùs geras, tum in electione vitii impugnandi, tum in ipsa examinationis praxi, sequentes industrias observabis.

1. Ideo sancti Patres hoc examen summopere commendant, quia medium expeditissimum est, & efficacissimum ad extirpanda vitia, ad evellendos defectus, ad inferendas animo virtutes, & ad omnimodam perfectionem brevì tempore consequendam. Est igitur ejus materia valde copiosa, & latissimè patens; omnia videlicet vitia, & defectus, ut eradicentur: sensus, potentia, & passiones, ut rectè ordinentur: virtutes omnes, ut acquirantur: quotidianæ actiones, ut optimè fiant, & ubi opus fuerit, reformentur.

Inter hæc autem servare hunc ordinem debeo, ut hoc singulare certamen ab eo inchoes vitio, quod tibi magis infestum est. Etsi à pluribus infestaris, à faciliiori incipiendum, quo superato, animum sumes ad cætera diffi-

ciliora profliganda. Si verò æquè gravia, & difficilia sint, illud prius invade, quod reliquorum radix, & fons est, Vitiis autem extirpatis, in quæ frequentius labi consueveras, cujusmodi sunt gula, ira, superbia, & pigritia in rebus agendis; examen institue circa transgressionem illius regulæ, quam sæpius violare soles, qua in re primum locum dabis transgressioni silentii; est enim hoc simpliciter necessarium ad gratiam devotionis, & unionem cum Deo comparandam. Cum porro à te abegeris frequentem lapsum in vitia, & omnem regulæ violationem, assuesce per hoc examen quotidiana, & ordinaria opera rectè facere: quibus feliciter peractis, tunc primum, & non ante ad virtutum acquisitionem accede. Et primò quidem actus internos, & externos pœnitentiæ exercebis, secundò humilitatis, tum obedientiæ, indifferentiæ, & patientiæ, quæ sunt solidiores, & magis necessariæ, & ex his ad alias progredieris.

II. Electo vitio, seu virtute, de qua examen instituendum est, ejus naturam, gradus, signa, actus, effectus, proprie-

tates, occasiones, motiva, & incitamenta prænoscere oportet; Considerabis etiam à quanto tempore in te regnet illud vitium, quod impugnare proposuisti, an & quomodo creverit; quibus locis, & occasionibus te magis infestet. Quæ sit ejus virtutis, quam vis adipisci, utilitas, excellentia, & necessitas; qui gradus insigniores, & tuæ indigentiae conformiores, quos pro examine seliges, & in charta notabis. Quod si plures sint unius vitii, vel virtutis actus, utile erit eos per partes aggredi, ut facilius excindi valeant. In eadem charta tot lineas duces, quot sunt dies hebdomadæ, ut in his possis quotidianas transgressiones singulis diebus annotare.

III. Frequenter considera, an proficias, & cureris; an assumpta remedia sufficiant, vel alia adhibenda sint. Huc dirige omnes orationes tuas, & exercitia pietatis; atque initio saltem diei occasiones prævide lapsum; vel victoriarum cum petitione ad id auxilii divini. Sæpe item propositum vincendi renova, & ne memoriæ defectu hoc omittas, juvare hanc poteris vel signis certo loco positis, vel funiculo,

sive catenula ad brachium circumligata. Cum verò agnosces te deliquisse, manu pectori adnota doleas de lapsu, quod aliis præsentibus, nec advertentibus facere potes: statimque elice actum contrarium illi defectui, ut eadem opera & habitum pravum extirpes, & bonum acquiras.

IV. In exercendis virtutum actibus nimia contentio, & coacta quædam servitus fugienda est, quæ caput fatigat, libertatem spiritus tollit, & piæ voluntatis affectus impedit. Ideo non debes ad certum pensum actuum te serviliter adstringere, quasi eos præterire nefas sit; sed cum modum serva, quem tibi commodiorem expertus fueris. Mihi faciliior & utilior iste videtur, si quidam actus brevissimè, & ferventissimè eliciantur, vel ante singulas horas canonicas, vel quoties horæ signum dat horologium, hac ferè verborum internorum formula, exemplum sumendo ab humilitate. *Domine non sum dignus aspicere altitudinem cæli, Domine non sum dignus calcare hoc pavementum, per quod transeunt tot servi tui meliorè meliores. Paratus sum Domine Deus*

incus, ad omnem utilipensionem, & contemptum, quia sic exigunt peccata mea. Da ut contemnar ab omnibus, & pro te ad nihilum redigar: Fac me tanquam pavimentum mundi, ut ab omnibus conculcer, & indignissime trañter.

v. In extirpatione unius vitii tantùm immorari debes, donec facilè valeas insurgentem ejus impetum coercere, ita ut nec semel quidem in illud labi per notabile tempus contingat. Solent quidem diu sopita vitia aliquando reviviscere; sed non ideo desperandum est, nam contra illa pugnamus, non ut penitus vincamus, sed ne vincamur. Virtutis autem exercitatio tamdiu durabit, quoadusque possis secundum eam absque difficultate operari.

vi. Hoc examen tria tempora complectitur. Primum est matutinum statim ac à somno surrexisti, quo proponere debes diligentem tui custodiam circa vitium, vel virtutem, quod evellere, vel quam acquirere desideras; pro qua re gratiam petes à Deo cum profunda humilitate, & tui diffidentia. Secundum est pomeridianum ante vel post prandium, quo rationem exiges à

te ipso omnium transgressionum circa prædictam materiam, singulas diei partes percurrere ab hora qua surrexisti usque ad præsentem : & quoties lapsus fuisti, tot puncta in linea notabis. Tertium est vespertinum, cum mox cubitum iturus es, quo eodem modo discuties conscientiam tuam numeratis vicibus, quibus post priorem discussionem deliquisti, hisque notatis separatim in linea ad hoc præparata.

VII. Modus in discussione tenendus hic est, ut primò gratias agas, tum lumen, & gratiam defectus tuos cognoscendi ab eo petas, qui illuminat abscondita tenebrarum. Sequitur discussio, postquam concipiendus est dolor de admissis, proponenda emendatio, & assumenda brevis aliqua pœnitentia. Sunt qui hoc examen cum quotidiano coniungunt, idque necessarium erit personis occupatis. Sin autem separatim fiat brevissimis suspiriis poterit expediri hoc modo. *Quam bonus, & liberalis erga me huc usque fuisti Deus meus infinite amabilis, humiliter id agnosco, reverenter suspicio, & toto cordis affectu gratias ago. Dignare, Domine, mi-*

serationibus tuis plurimis, & maximis
hanc addere gratiam, ut lapsus contra
propositum meum cognoscam, & emen-
dem. Inito autem numero lapsuum
sic dolorem excitabis. Quàm ingratus
fui erga te, dulcissime Deus, quàm quo-
tidie abutor bonitate tua! Intimè do-
leo de his, & omnibus defectibus meis
purè propter te, & propono deinceps
cautius vivere & me seriò emendare.
Ignosce Domine, & persice desiderium
meum. Si verò nullum deprehendis la-
psum gratias age. Tibi laus, honor, &
gloria, Clementissime Pater, qui me sic
preservare, & gratia tua adjuvare di-
gnatus es. En paratum Cor meum ad
omne beneplacitum tuum: tu me custo-
di, fove, & conserva presidio gratia
tua, ut tibi perfectè serviam, & pla-
ceam, & nunc, & in aeternum. Post hæc,
collatio institui debet, quæ in hoc con-
sistit, ut defectus in secunda discus-
sione repertos cum defectibus primæ
conferas, unius diei culpis diei præ-
cedentis lapsus compares, hanc hebdo-
madam cum altera quæ præcessit ut
sic discernere queas an proficias vel
deficias. Tandem juvabit ad faciliorem

emendationem tot opera pœnitentiæ sponte assumere, quoties ea die in defectus seu commissione, seu omissione circa propositam materiam incidisti.

§. III.

Exercitium Vespertinum.

Absoluto conscientię examine, antequam cubitum eas hoc exercitium peragendum est.

I. Gratias Deo ages pro omnibus beneficiis naturalibus, & supernaturalibus præstitis tibi, domui in qua habitas, civitati in qua es, ordini seu congregationi tuæ, reliquis mundi hominibus, amicis, & inimicis, vivis, & defunctis. Deinde à Deo petes propter merita Christi, & omnium Sanctorum remissionem omnium peccatorum tuorum, domus, Civitatis, Congregationis, & cæterorum ut supra. Tum Deum roabis, ut propter eadem merita concedat ea, quæ petis, & quibus indigent omnes supra dicti. Denique offeres Deo merita Chri-

sti, & sanctorum pro beneficiis tibi & reliquis concessis: pro peccatis à te & aliis commissis: & pro necessitatibus tuis, & cæterorum. Hæc autem omnia in sequenti oratione continentur.

Oratio.

EXaltabo te Deus meus rex, & laudabo nomen tuum in sæculum sæculi; quia de excelso cælorum habitaculo respicere dignatus es super me indignissimum servum tuum. Venite, audite, & narrabo omnes qui timetis Deum, quanta fecit animæ meæ. Ab æterno ordinavit me, ex antiquis, antequam terra fieret; & videns me in communi, & infelici sorte filiorum Adam ob labem originalem damnationi obnoxium, ab aliis innumeris pereuntibus segregavit me, & dilexit me priusquam essem. Cum verò jam esse cæpissém aliis pluribus præmatura morte raptis, me ad gratiam baptismatis perduxit, & in gremio Ecclesiæ constituit; corpusque aptavit mihi integrum, & ad animæ functiones idoneum; & sol intelligentiæ

ortus est mihi, ut scirem viam justitiæ,
& semitas perfectionis. Crescente au-
tem ætate creverunt erga me miseration-
es ejus, & cùm sacrilega perversitate ab
eo recessissem in regionem dissimilitudi-
nis præferens creatori creaturam, ho-
stem Redemptori, ipse me attraxit ad
se, & in sortem suam vocavit, ut fi-
lius ejus per gratiam nominater, & ef-
sem. Vicit nimirum malitiam meam
charitas ejus, & benignitas ipsius pec-
cata mea superavit. Quid retribuam ti-
bi Domine Deus meus pro omnibus quæ
tribuisti mihi? aut quis me separabit
à charitate tua? Tu propitiatus es ini-
quitatibus meis, tu liberaisti me de ini-
micis meis, tu sanasti omnes infirmita-
tes meas, tu sanguine pretiosissimo Filii
tui redemisti de interitu vitam meam,
& replevisti animam meam omni bene-
dictione. Tu in dulcedinē tua mensam
parasti mihi habentem omne delecta-
mentum, mensam prorsus divinam, in
qua anima mea de te Deo meo sagina-
tur. Et quis sum ego vilissimus terræ
vermiculus, ut invenirem gratiam in
oculis tuis, & tot bonis cumularer? Tuam
itaque magnificentiam in æternum can-

tabo gratias tibi agens pro innumeris ,
& maximis beneficiis quæ ex momento
conceptionis meæ usque in hanc horam
de tua benignitate suscepi , pro innu-
merabilibus , quæ in hoc temporis mo-
mento à te suscipio ; pro infinitis , quæ
usque in finem vitæ meæ & per totam
æternitatem sum accepturus. Gratias
item ago tibi pro universis donis im-
mensæ largitatis tuæ quæ liberali manu
tua contulisti huic Domui , in qua nunc
habito , & omnibus in ea habitantibus ;
huic congregationi , & membris ejus ab
ipsius origine usque in præsentem diem
huic item civitati , quæ magnifica gra-
tia tua cum civibus , & incolis ejus pro-
regis , & conservas ; cunctis quoque ho-
minibus justis , & improbis , amicis ,
& inimicis , vivis , & defunctis , ac
universis creaturis tuis quas è nihilo
produxisti non propterea , qui bonorum
nostrorum non eges , sed ut mihi , &
electis tuis servirent , & nobis. Om-
nia hæc , & alia beneficia quibuscumque
concessa tanquam mea suscipio , & eo
magis te laudo & glorifico , quominus
quidam ex illis , quibus benefecisti , te
agnoscunt , & benedicunt. Et hæc qui-

dem præstitisti mihi, quamvis ego pulvis, & cinis, & vapor ad modicum parens injurius tibi fuerim, & quotidie peccatis meis contristaverim spiritum tuum. O quàm doleo ex amore tui, quod unquam offenderim te, & mandata tua prævaricatus sim! Ignosce Domine, placare Domine, attende, & fac propter te ipsum: & per merita dilectissimi Filii tui Redemptoris nostri, in quo tibi bene complacuit, per ejus acerbissimam passionem, & mortem atrocissimam, qua peccata nostra portavit; per merita quoque, & intercessionem sanctissimæ Virginis Mariæ, sanctorum Angelorum, & omnium electorum tuorum dele, obsecro, peccata mea, neque reminiscaris iniquitatum servorum tuorum, omnium domesticorum, civium, & fratrum meorum, cunctorumque hominum amicorum & inimicorum meorum, vivorum, & defunctorum. Perveniant ad te voces, & singultus omnium ad te clamantium, neque perdas nos cum iniquitatibus nostris, quia tu es Deus longanimis, & misericors & placabilis super malitias hominum, & secundum multitudinem boni-

tatis tuæ pœnitentiam decrevisti iis, qui peccarunt, & verè contritis promissisti remissionem. Memor esto fragilitatis nostræ, & charitatis tuæ, & projice in profundum maris omnia delicta nostra, quibus iram tuam provocavimus, ut loti, & reconciliati in sanguine filii tui cantemus laudes tuas in sempiternum.

Respice in faciem Christi tui, & ne avertas vultum electorum tuorum tecum in cælo regnantium, per quorum merita, & intercessionem obsecro clementiam tuam, ut mihi miserabili servo tuo atque universis fratribus meis mecum in hac domo, & congregatione, & in hac civitate commorantibus cunctisque hominibus amicis, & inimicis, vivis, & defunctis omnia necessaria ad salutem animæ, & corporis largiri digneris. Da nobis sincerè, & perseveranter servire tibi fortia agendo, & dura tolerando. Da contemptum omnium rerum terrenarum, veramque resignationem, & cum tua voluntate concordiam. Reple totum mundum fide, ac scientia tua, & omnes infideles ad te converte. Da inimicis meis quos intimè diligo, amorem tuum, &

pacem, quam filius tuus reliquit nobis.
Da fidelibus defunctis, ut ad te citò
perveniant, te que regnantem videant
in secula seculorum,

Commoveant paterna viscera tua Do-
mine pericula nostra, & propter glo-
riam nominis tui libera nos ab omni ma-
lo: neque enim in justificationibus no-
stris prosternimus preces ante faciem
tuam, sed in miserationibus tuis mul-
tis, & in immensa charitate unigeniti
Filii tui, quem pro nobis tradidisti, ut
esset salus, & propitiatio nostra. Hujus
meritis onustus ad te accedo, & ea of-
fero tibi simul cum meritis, & preci-
bus Beatissimæ genitricis ejus, omnium-
que Angelorum, & Sanctorum, in gra-
tiarum actionem pro universis benefi-
ciis tuis, quæ mihi, huic domui, &
congregationi, huic civitati, & homi-
nibus quibuscumque amicis, & inimi-
cis, vivis, & defunctis misericorditer
contulisti. In satisfactionem pro omni-
bus peccatis à me commissis, & pro
peccatis omnium commorantium in hac
domo, & congregatione in hac civita-
te, & in mundo universo, sive amici
mei sint, sive inimici, seu vivi, seu
defuncti,

defuncti. Ad impetranda denique omnia bona mihi, & aliis necessaria ad salutem animæ, & corporis. Memento omnium, pro quibus sanguinem suum pretiosum effudit Filius tuus, & præsta per Passionem, & mortem ipsius, ut peccatores & tepidi ad vitam bonam, & ferventem convertantur: ut tentati, & afflicti liberentur, & consolentur: ut sancti in Ecclesia tua multiplicentur, perfectèque vivant, & perseverent: ut ego tandem ad apicem sanctitatis semper aspirem, plenusque meritis moriar liber ab omni culpa, & pœnæ obligatione. Amen.

II. Dices sequentem orationem: *Respice quesumus Domine super hanc familiam tuam, pro qua Dominus noster Iesus christus non dubitavit manibus tradi nocentium & Crucis subire tormentum.* Per familiam verò intelliges Ecclesiam triumphantem, militantem, & purgantem: & primæ quidem aliquod gaudium accidentale, alteri omne auxilium, tertiæ quàm citissimam libertatem desiderabis.

III. Ter versus quatuor mundi partes genua flectes Deum adorans in gra-

tiarum actionem pro beneficiis in quolibet eorum concessis : in satisfactionem peccatorum ibi commissorum : in petitionem auxiliorum, quibus totius mundi necessitatibus subveniatur.

iv. Semel flectes genua versus eam partem, qua proximo in templo repositum est sanctissimum Sacramentum gratias agendo pro beneficiis, quæ tu, & alii ex eo percepistis : dolendo de peccatis, quæ contra illud à blasphemis, & indignè communicantibus perpetrantur, rogando ut tibi mediante communione accedat copia caelestium bonorum juxta copiam meritorum ejus.

v. Somnum futurum offeres Deo ad ejus gloriam, in omni respiratione Deum laudare, & glorificare intendens, teque Virgini Deiparæ, Angelo custodi, & Sanctis tutelaribus commendabis.

§. IV.

*Aliud exercitium sive oratio
vespertina.*

Confitebor tibi in toto corde meo Deus meus, bonitas infinita, & narrabo mirabilia tua, quia magnificata est hodie misericordia tua super me, & liberaſti animam meam à perditione. Et unde hoc mihi, ut recorderis mei præueniens me tot benedictionibus dulcedinis, & charitatis tuæ? Tu ab æterno dilexiſti me, & in ſplendoribus Sanctorum vidisti tenebras meas. Tu me ex nihilo condidiſti, & è numero pereuntium miſericorditer exemiſti. Tu ex utero matris meæ factus es protector meus, & ſegregaviſti me in ſervum tibi. Tu propter me omnia gubernas, & regis, & quæ ad me pertinent efficaciffima providentia diſponis. Tu me hac die ex innumeris creptum periculis multis, & mirabilibus beneficiis cumulaſti, & in me oſtendiſti divitias tuæ immenſæ bonitatis. Et quis ſum ego, ut invenirem gratiam in oculis tuis, meque reſpicere dignareris de-

sublimi throno gloriæ tuæ, & hæc dona tua largiri mihi? Tu potentissimus, & immensus, ego vapor, & nihil: tu sapientia, & lumen, ego tenebræ, & ignorantia: tu fons bonitatis, ego vermis, & non homo, & omnes justitiæ meæ sicut pannus menstruata. Et tamen non cessas diligere me, & egenam animam meam bonis tuis locupletare. Ideo benedicam te omni tempore, quia eripuisti animam meam de morte, & pedes meos à lapsu, cum tamen ego miserabilis peccator, & servus ingratus contristaverim hodie spiritum tuum peccatis meis. Et nunc, Domine, pœnitet me peccasse, miserere mei secundum magnam misericordiam tuam. O! si nunquam te offendissem! ô si præcepta tua, & regulam meam numquam transgressus fuissim! Atque utinam, Deus meus, cras tibi perfectius serviam, & omnia creata spernens te unum timeam, & diligam. Quid enim mihi prodest, quod hodie talia dixerim, viderim, audierim. Tu solus potes animam meam satiare, Deus cordis mei, & pars mea Deus in æternum. Quando venies ad me, & me totum possidebis? Veni, Domine, fac me

unum tecum, & cor meum abstractum ab omni creatura tibi soli impollutum conserva. Nam quid proderit universa vanitas, cum veneris sicut fur in nocte? Revela igitur oculos meos, ut considerem novissima mea, & prospiciam saluti meæ. En vitæ, & salutis incertus perveni ad finem hujus diei. In manus tuas commendo spiritum meum. Redime me, & miserere mei, qui unicus, & pauper sum ego. Credo tibi summa veritas, in te spero salus mea, te diligo, & amplector toto corde, tibi que renovo vota mea paupertatem, obedientiam, & castitatem; omnia enim, quæ fecisti, magna voce clamant, ut diligam te, cum sis unicum, & omne bonum meum.

Aperi mentes omnium, quos creasti, eorum præsertim pro quibus orare debeo, ut tibi Regi cælorum honor, & gloria ab omnibus tribuatur. Radicibus extirpa omne peccatum, & vitium, discordium, infidelitatem, errores, opiniones. Peccatoribus pœnitentiam, justis perseverantiam, afflictis consolationem, inimicis nostris charitatem largire. Sit in omnibus patientia, benignitas, hu-

militas. Misere omnium animarum in pace quiescentium, & da illis requiem sempiternam. Tu suavissime amator omnium diei, ac noctis alternas vices summa sapientia disposuisti, ut diurno labore fessas vires somni quies reficeret. Sed licet capiendæ quieti tributa sit nox, an non licebit etiam noctu te amare? Amor enim quies est animi, & te diligere quiescere est. In teumigitur amorem tanquam in somnum suum incumbat cor meum, ô meta, ô finis, ô centrum animæ meæ. Veni divine Amor, & tu mihi somnia dispone. Da mihi trahere anhelitum de mellifluo corde tuo, da sanctè, & pudicè somnum capere, sitque omnis respiratio mea omnium Angelorum affectibus imbuta.

Vos Angeli sancti, vigiles cœli, agite pro me, dum dormio, excubias amoris, & vestro semper vigilantî affectu summum bonum diligite. Sit opus vestrum quod meum est votum, ut amabilis Deus nunquam intermisso amoris sacrificio ab omnibus colatur. Tu Angele gloriose, qui mei curam suscepisti, assiste mihi hac nocte, hostemque nostrum comprime, ne noxiis phantasmatibus animi, & cor-

poris puritatem lædat. Tuere me ab omni malo, & crastina die statuo tempore excita ad psallendas Dei laudes. Adeste sancti, & electi Dei, vos presertim Patroni mei N. N. supplete vices fragilitatis mee, & custodite hujus noctis vigilias super me, Deumque pro me laudate, dum ego dormio, & me ab omni malo defendite. Tu denique beatissima Virgo mater pulchræ dilectionis, protege me hac nocte sub umbra alarum tuarum. Monstra apud Filium tuum te esse Matrem, Matrem gratiæ & misericordiæ, mihi que impetra cor castum, & purum, ut in eo quiescat hac nocte dilectus Filius tuus Dominus noster, qui pascitur inter lilia, qui est benedictus in sæcula sæculorum. Amen.

S. V.

Quid nocte servare oporteat.

Peracto examine conscientiæ, atque orationibus recitatis te honestè ad quiescendum compones, quod ut sanctè, & meritoriè perficias, hæc observabis.

1. Antequam vestimenta deponas,

percurre breviter puncta futuræ meditationis, dispone de actionibus diei sequentis, prævide quid facere, quid dicere debeas purificando intentionem, terram tribus vicibus osculare cogitando primò quia pulvis es, & fortassis hac nocte in pulverem reverteris. Secundò quia Verbum caro factum est, totum te ei resignando, & invitando ut cras ad te veniat in sanctissimo Sacramento. Tertiò, quia peccatis tuis locus infimus debetur, & excita contritionem. Post hæc flexis genibus pete benedictionem à sanctissima Trinitate, à Christo Domino, à B. Virgine, ab Angelo Custode, à sanctis Tutelaribus. Demum protestare coram Deo, & sanctis ejus te nolle somno inlulgere ob voluptatem, & propriæ sensualitatis inclinationem, sed ob naturæ necessitatem, & divinæ voluntatis ordinationem.

II. Cum te exuis, memor esto præsentiae Dei, & Angelorum. Cogita Christi denudationem in passione, vel animæ tuæ nuditatem ob virtutum inopiam, vel horam mortis; qua rebus omnibus calucis spoliaberis; vel primi parentis peccatum, propter quod veste innocentiae

innocentiæ exutus fuit, & elice his cogitationibus congruentes affectus. Cum verò lectum aperis, meditare sepulchrum, & futuram citò horam, qua illud ingredieris. Ideo quasi moriturus omnia terrena contemne, ad Deum suspira, renova vota tua, & memor sententiæ in iudicio particulari pronuncian- dæ, magnum Dei iudicis timorem concipe, dic aliquoties, *Iesus Maria*, de- inde dic, *In manus tuas Domine commendo spiritum meum.*

III. In strato te honestissimè com- pone in latere dextero, junctis mani- bus in modum Crucis ante pectus, & decenter tectus etiam in magno æstu: nec crebro te vertas, sed quierè cuba memor Christi in Cruce pendentis, tum propter Angelicæ puritatis studium, quam te oportet emulari. Recumbens dic in corde tuo, *Domine Iesu Christe, quàm multi sunt miseri in toto mundo, qui & tecto, & lecto carent, tui nihilo- minus filii, mei fratres, tuo pretioso san- guine redempti, & multò meliores me. Da illis Domine patientiam, & misere- re mei.*

IV. Dum somnium expectas, sanctæ

alicui meditationi incumbe, ne vacuans inanibus cogitationibus occupetur: idcirco ad hunc effectum semper aliquid tecum deferens, in quo placidè dormias, quod somniare juvet, quod te vigilantem excipiat, & statum bonæ intentionis restituat. Juvabit pro hac re somnium capere cum beata Virgine peregrina in stabulo, vel cum eadem fugiente in desertis Ægypti, vel cum Jesu infante in præsepio, sive cum eodem pernoctante in monte, vel jacente in sepulcro. Juvabit item imaginari circa lectum sanctissimam Trinitatem, B. Virginem, Angelos, & sanctos Tutelares, quos devotè salutabis: ad pedes autem lecti demones, quos detestaberis.

v. Si fortè cubanti negetur somnus; nec opportunum tunc videatur animum referre ad rerum spiritualium meditationem, ne somnus expetitus ea contentione magis prohibeatur, somnum simulabis, & finges cogitatione te sacro vulneri pectoris Christi os applicare, atque ibi per vices attrahens, & reddens spiritum, pronunciabis mente vocem, **J E S U S**, priorem videlicet syllabam cum recipis spiritum, posteriorem cum red-

dis, id
& re
vi.
sugge
ne in
mum
lia sur
rio, i
sinu
custo
gnum
necess
tione
auxili
Eadem
exper
insurg
tum
cutian
& fer
sumqu
menta
vi.
protin
& dic
ri, ed
tis, e
tum.

dis, idque perges facere, quoties spiras,
& respiras, donec sopiri possis.

VI. Si ante somnum subrepat aliqua suggestio, seu tentatio Sathanæ, cave ne in illa obdormiscas, sed quamprimum opportunis remediis reprime, qualia sunt oratio, novissimorum recordatio, refugium ad vulnera Christi, in sinu beatæ Virginis, sub alas Angelî custodis. Imprime fronti, & cordi signum Crucis, recogita æternitatem, & si necesse fuerit surge, prosterne te in oratione, nec cesses divinum implorare auxilium, donec redeat tranquillitas. Eadem remedia proderunt tibi, si, cum expergisceris, similis infestatio inimicî insurgat, ne subito ingravescens incautum opprimat. Si subito pavore concutiaris, oppone dæmoni signum Crucis, & ferventes aspirationes ad Deum, ipsumque adversarium, & ejus terribilia contemne.

VI. Quoties expergisceris, mentem protinus piis suspiriis ad Deum eleva, & dic, *Deus propitius esto mihi peccatori, educ me de tenebris, & umbra mortis, & voca me in admirabile lumen tuum. Tuere me Domine, ne tenebri-*

*cosa peccati caligine involvar: eripe me
ab omni inquinamento carnis, & spiri-
tus: pervigiles tribue cogitationes, &
mentem sobriam, ne me gravis oppri-
mat sopor. Fiat hac nox illuminatio
mea in deliciis meis, quoniam memor
fui nocte nominis tui Domine. Recor-
dare item passionis Domini Jesu, eique
gratias age, quod ipse te dormiente ad
tui custodiam excubias agere non gra-
vetur. Invita lunam, & stellas, & An-
gelos ad laudandum Deum: ora pro de-
functis, & pro peccatoribus. Et tamen
discretionem utere, ne somnus naturæ
necessarius ob nimiam contentionem
plus æquo abrumpatur.*



M 18

D

T

librat

ut pe

talis

ciat i

exam

stitui

noct

do. T

vitiu

tutem

tidia

hic d

I.

cum

pitu

Cruo

CAPUT V.

MISCELLA DIVERSARVM
exercitationum.

§. I.

De generali examine sui ipsius.

TRIPLEX est conscientię examen:
Unum generale, quo unusquisque
librat, & discutit proprium spiritum,
ut perspciat in quo gradu vitę spiri-
talis reperiatur, ut quomodo proficiat
in studio perfectionis. Alterum est
examen quotidianum quod ter in die in-
stitui debet, mane, meridie, & vespere
noctis, ac diei acta ad calculos revocando.
Tertium est particulare, quod ad
vitium aliquod extirpandum, vel virtu-
tutem acquirendam instituitur. De quo-
tidiano, & particulari dictum est suprà,
hic de generali agendum est.

I. Ad hoc faciendum recipies te in lo-
cum aliquem secretum, & ab omni stre-
pitu expeditum; teque in spiritu prope
Crucem collocabis, & in conspectu

Christi Crucifixi, à quo lumen, & auxilium petes, quo possis te ipsum dignoscere, & deprehendere, & languescentem spiritum renovare. Tum diligenter investigabis, & solerter expendes ea, quæ progressum tuum in studio perfectionis retardant, & impediunt, habitatione triplicis viæ purgativæ, illuminativæ, unitivæ. Firmum deinde propositum excitabis quælibet impedimenta amovendi, defectuum radices extirpandi, & studiosè proficiendi; gratiamque ad id necessariam à Deo humiliter postulabis.

11. Impedimenta profectus in via purgativa hæc ferè sunt. Non habere zelum majoris puritatis animæ. Parvi facere peccata venialia, nec ea sollicitè cavere, & expiare. Nimium sibi fidere, nec præcavere occasiones tentationum, & lapsuum. Studium mortificationis interioris, & exterioris negligere. Divinos instinctus, & superiorum admonitiones dissimulare, & parvipendere. Libenter se effundere ad res exteriores, liberè sensibus, & cogitationibus evagari, egrè ad cor redire, otium amare. Aliorum dicta, & facta facilè carpere,

jocis delectari; pia colloquia fastidire. Solatia avidè quærere in cibo, potu, somno, recreationibus, nugis, & fabulis. Conscientiam cursim, & perfunctoriè examinare absque serâ compunctione, & proposito melioris vitæ. Confiteri ex arida consuetudine, absque vero doloris sensu, & desiderio emendationis.

III. Profectum in via illuminativa hæc sunt quæ retardant. Non magni æstimare eximiam virtutum perfectionem, nec ad eam aspirare. Non frequentare ferventer internos virtutum actus. Externos item actus sine spiritu exercere, materialiter potiùs quàm formaliter. Exactam votorum, & regularum observantiam non tanti æstimare, uti par est, nec à parvis transgressionibus abstinere. Parum sollicitum esse de puritate intentionis, ejusque continuatione, & crebra renovatione. Abjecta officia, & humilia fugere. Ad otiosam vitam aspirare, & labores declinare. Non habere accuratam temporis rationem, & visitationes, atque discursus tædii vitandi causa avidè amplecti. Examen particulare præmittere, & de virtutis perfectione

acquirenda desperare. Non esse ad omnia indifferentem, sed vilioribus speciosiora anteferre.

IV. Obstacula, & signa defectus in via unitiva hæc esse solent. Circa Missam, & usum sanctissimi Sacramenti tepidum esse. Divina obiter meditari sine fructu, & affectu: & orare vocaliter cursim sine attentione, & devotione. Piis colloquiis minimè affici, librorumque spiritualium lectionem fastidire. Usus aspirationum, & exercitium divinæ præsentia omittente. Frigidè, & rarò internos actus amoris Dei, & proximi elicere. Externos item absque debita intentione, & devotione peragere. Non purè in omnibus Deum querere, nec conari ei placere propter seipsum. Languere in zelo animarum, & in peculiari devotionis affectu erga Deum, & cœlites. Tepescere, ac ferè animum despondere, cum de perfecta resignatione, & unione cum Deo assequenda tractatur.

V. Hoc examen semel saltem in hebdomada institue, suprascripta puncta attentè percurrendo, & cum notaveris quid te maximè à perfectione retardet, ad hoc amovendum omnem adhibe dili-

gentiam. Considera tuam naturalem complexionem, educationem, & consuetudinem, atque peccata, in quæ olim sæpius labi consueveras; ea enim solent sui vestigia usque ad finem vitæ altissimè impressa relinquere, & ad ea radicitus evellenda strenuè laborandum est. Discute totius diei functiones, & exercitia, & attende præcipuè quid in singulis intendas, & qualiter singula obeas ab initio diei usque ad finem.

VI. Expende gradus virtutum, & vide ad quem perveneris; an à contrario vicio studeas te immunem servare: an omnes lapsus circa eam vites: an unquam heroicos ejus actus exercueris. Vide quomodo te habeas erga Deum, ejusque amorem, & cultum erga proximum, & superiores, & erga teipsum, animam scilicet, & corpus.

VI. Adverte, & disquire an contentus vivas juxta tuam vocationem, & libenter servias in statu, & officio tuo: quid sentias de instituto: quantum tempus orationi tribuas: an castitatem Angelicam secteris, & remedia contrariis tentationibus adhibueris: quem fructum ex usu Sacramentorum percipias: an aversio-

nem ab aliquo, vel nimiam cum uno habes familiaritatem. Mox scribe quæ in te emendanda reperiis, & Deum ora, ut dignetur tibi ostendere quid à te potissimum velit. Debes autem præcipue illas cogitationes, affectus, verba, colloquia, actiones, & omissiones examinare, quæ vix advertenti naturaliter quodammodo excidunt, quæque se produnt, cum languet spiritus, & natura sibi, ut ita dicam, relicta est, tunc enim propriis motibus ipsa natura agi solet, ex quibus discas qualis sis.

§. II.

Modus visitandi quotidie Augustissimum Sacramentum.

NUllum efficacius instrumentum ad perfectionem, & unionem cum Deo, quam crebra per diem Salvatoris nostri Jesu Christi in augustissimo Eucharistiæ Sacramento latentis visitatio. Praxis autem hujus nobilissimi exercitii his ferè monitis continetur.

1. Eundo ad templum considera, & admirare incomprehensibilem Dei amo-

rem erga te; non enim satis illi fuit sub speciebus Sacramentalibus suum tibi corpus, & sanguinem, ipsamque divinitatem tam mirabili dignatione largiri; sed jugiter etiam usque ad consummationem sæculi in Ecclesiis asservari voluit, ut in omni necessitate certissimum subsidium, in omni tribulatione tutissimum perfugium, in omni rerum eventu præsentissimum consilium in promptu haberes, ejusque præsentia, quantum viatori licet, perfrueris. Cum novis igitur divinæ gratiæ auxiliis semper indigeas ad evitanda peccata, superandas tentationes, & virtutes exercendas, quid optatius tibi contingere potuit, quam apertum accessum ad eum jugiter habere, qui solus potest te adjuvare, erudire, & consolari? Si Rex, vel Princeps magnæ potentiae à regia sua civitate ad exiguum oppidulum accederet, ut tibi vilissimo homini beneficeret, nonne ipsi continuo assisteres summa cum reverentia, amore, & gratitudine? Nunc autem Rex Regum, & Dominus dominantium ab excelso cœlorum habitaculo descendens, velatis radiis majestatis suæ in exigua pixide latere voluit ob inenarrabilem erga

te amoris excessum: quam detestabile ingrati animi vitium foret non eum inflammatis amoris, & reverentiæ affectibus aliquoties saltem in die visitare, & tam insignem benignitatem contemnere? Quis amicus non libenter cum amico versatur? Quis Filius in suis necessitatibus non confugit ad Patrem cum summa alacritate, & fiducia? Quæ sponsa non frequentissimè cum sponso moratur? Hic autem amicus, & pater, & sponsus est animæ tuæ, fons gratiarum, & omnium bonorum thesaurus inexhaustus. Accede ad eum, & vide, & gusta, quàm suavis est, & delectabitur in crassitudine anima tua, dabitque tibi petitiones cordis tui.

11. His, & aliis hujusmodi considerationibus incitatus ingredi in domum Dei usque ad locum Tabernaculi admirabilis, & confusione tui plenus, Christi præsentiam viva fide apprehende, ipsumque adora in spiritu humilitatis, & animo contrito; ipse enim optimè novit quid sit in te, & quia nihil es; & ideo hoc recognosce, & fateri coram eo. Ipse scit omnia beneficia tibi collata, pro quibus gratias age. Ipse videt omnia

peccata tua , & malas inclinationes , quas recense in conspectu ejus , & veniam pete. Puta te Christum audire exprobrantem tibi ingratitude , & duritiem cordis , teque dignum omni malo pronunciantem in hac , & futura vita. Approba hoc judicium Christi , & tanquam executor ejus sententiæ private omni bono , & paratum offer ad omnem infamiam , ignominiam , tribulationem , ægritudinem , pœnalitatem , derelictionem , & mortem. Denique excita desiderium Deo ferventius serviendi , propone emendationem , & gratiam pete ad tui innovationem necessariam , atque ita te compone , ut illi placeas.

III. Ad evitandum tedium , quod in ejusdem exercitii frequenti repetitione subrepere solet , varia tibi motiva propones , propter quæ venerabile Sacramentum visitabis , quæ mutare subinde poteris nunc unum , nunc alterum assumendo. Fines autem , seu motiva hæc sunt. Ut ipsum adores , glorifices , admireris : ut offeras ei te ipsum , & omnia : ut ei gratias agas , ut indigentias tuas eidem exponas , & remedia postules : ut fruaris . ju. præsentia , te

que cum iplo unias & communices spiritualiter.

IV. Accede ad ipsum eodem spiritu & aviditate, qua pauper ad divitem liberalem, esuriens ad convivium, sitibundus ad fontem, discipulus ad magistrum, filius ad patrem, æger ad medicum. Sit devotus affectus tuus, & fervens; cumque corporaliter ad Ecclesiam ire nequis justa de causa præpeditus, imitare Daniele, & tres pueros, neque ad templum converte, & preces tuas cò dirige, ac si presens adesses, & vacuus non redibis.

V. Cum aridus es, & mentaliter orare non potes, psalmum aliquem, vel hymnum, aut canticum recita ad rem accommodatum. Poteris etiam alicujus, vel plurium virtutum actus exercere modo infra præscribendo: poteris Litanias, aut Orationem Dominicam recitare, vel infra scriptam orationem leges, & in recessu à Christo Domino benedictionem petes, atque ei te ipsum, & omnes, pro quibus orare debes, obnixè commendabis.

§. III.

*Oratio ante Sanctissimum
Sacramentum.*

AVe dulcissime Jesu, verus Deus,
& verus Homo, qui ex voluntate
Patris, cooperante Spiritu Sancto te
mihi nascens in socium, convescens in
edulium, moriens in pretium, regnans
in præmium dare dignatus es. Ave, &
benedic calamitoso exuli tuo, meque
recipe in tui amoris suavissimos ample-
xus. Avete manus venerabiles pro me
cruci affixæ; Avete pedes speciosi pro
me clavis confixi. Ave latus divinum
pro me lancea vulneratum. Ave mitis-
simum cor mei peccatoris indignissimæ
amore saucium. Ego pulvis, & cinis
indignus conspectu tuo ob innumera
peccata mea, de quibus dolco, te Do-
minum meum & Deum meum hic verè
præsentem omnium creaturarum possi-
bili affectu saluto, adoro, laudo, &
glorifico; & ab omnibus amari, lau-
dari, & glorificari desidero in æter-
num, & ultra. Offero tibi, Domine

in perpetuum holocaustum voluntatem
meam, arborem tuam, ut nec bona
velle liceat mihi, nisi tu id per supe-
riores significes. Quid enim scit puer
tuus, benignissime Pater, quid expediat
sibi, quam viam teneat cæcus in tot pe-
riculis, & ignarus viæ? Tibi cura est
de me ab æterno, tu me dirige in viam
mandatorum tuorum. Si me vis esse hîc
omnium minimum ut sim maximus in
regno tuo, nonne infinita est misericor-
dia tua? Si vis me in omnibus obedire,
& ab omnibus contemni, sequar vesti-
gia tua, suavissime Redemptor, qui
Deo Patri æqualis obediens ei fuisti us-
que ad mortem, mortem autem Cru-
cis, & cum sceleratis reputatus es.
Quod si inmemor promissionis meæ,
qua me tibi in servum sponte obtuli,
toties optans fieri unicam voluntatem
tuam, jam corporis, & sensuum com-
moda quæro; Si obliviscor prævari-
cationis meæ, & tui, Jesu, felle potari;
si honorifica affecto, & vilem me agnos-
cens vilis haberi nolo, quanta mihi
confusio in die illa in conspectu tuo!
Absit hoc à me, Domine, ut detrahā
de holocausto tibi dudum oblato, ut
non

non sequar semper voluntatem tuam. Quæ est enim spes mea, & fiducia mea, & amor meus à juventute mea? Nonne tu Domine Deus meus? In te ergo sperans, non confundar, te sequens non errabo, te diligens non timebo. Possi- de Jesu bone cor meum, & reple illud gratia tua. In te vivam, in te moriar, & tam in vita, quàm in morte canta- bo tibi, quia bonus es, & in æternum misericordia tua. Laudent te mecum cælum, & terra pro tot, ac tantis be- neficiis tuis. Tu me amasti ab æterno, etiamsi prævideres me aliquando te ofurum: tu me conservasti, & redemi- sti, qui toties te vendidi pro vilissima creatura: tu prodigum expectasti, ju- stificasti impium, fragilem præservasti, & fugientem proditorem tuum miseri- corditer vocasti, ut collocares cum Principibus tuis. Et non sufficit adhuc tanta charitas tua, ut amore lique scat anima mea?

Sed quod omnem superat gratiam passus pro me extasim amoris, parasti in conspectu meo hanc divinißimam men- sam, in qua carnem tuam in cibum, & sanguinem in potum tribuisti, trahens

me ad te in funiculis Adę in vinculis
charitatis.

Quis jam me separabit ab amore tuo?
Quis me impediet, ne me intimè tecum
amiam? Dixisti enim, Qui manducat
meam carnem, & bibit meum sangui-
nem, in me manet, & ego in eo. O
dulcissimum Verbum! tu in me, & ego
in te! O quanta dignatio! tu in me, &
ego in te! O quantus amor! tu in me
vili sterquilinio, & ego in te summo
bono! O qualis commutatio! tu in me,
& ego in te! Quid ultra petere, & spe-
rare possum? Visitas nos certè in salu-
tari tuo, ad videndum in bonitate ele-
ctorum tuorum. Et quomodo potero
declinare à te, non jugiter adhærere tibi,
qui tam copioso munere gratiæ locuple-
tasti me, mibique præsens semper as-
sistis in hoc memoriali passionis tuæ,
in hoc compendio mirabilium tuorum?
Laudo, & glorifico te, dulcissime hos-
pes animæ meæ, quod hoc Sacramen-
tum in ultima cæna instituisti, & in eo
permanere nobiscum usque ad consu-
mationem sæculi voluisti. Omnes beato-
rum spirituum ordines te mecum ma-
gnificent, & exaltent, & gratias pro

me indigno referant , quod à me immundissimo peccatore attrectari , & sumi non sis dedignatus.

Gratias item ago tibi pro tribulationibus , tentationibus , & confusionibus , quas ad salutem meam esse voluisti , & me offero ad hæc , & postulo veste tua indui , obtestans per viscera misericordie tuæ , ut retribuas illis , qui suo fortè crudeli damno , & pœna tibi luenda , tantum bonum mihi attulerunt. Cupio tecum bajulare crucem , nudus nudum sequi , in te vivere , pro te mori. Hæc est ultima voluntas mea velut hodie morituri , coram te iudice , & patre amantissimo , & curia Sanctorum , quos testes habebo infidelitatis , & tepiditatis si deterior evasero. Averte Domine , & dele in me servo tuo quidquid tibi displicet. Fac ut temporalium omnium fastidium habeam , cum hæc satiare nunquam possint. Tu verò Domine , omne bonum es , quies , & felicitas mea , & sola satietas animæ meæ. Quis ergo mihi tribuat , ut te solum diligam , te quæram toto corde , te in omnibus amem , qui in omnibus es , & operaris? Veni , bone Jesu , Jesu dulcissime,

suavissime , pulcherrime , potentissime ,
sapientissime , gloria mea , & exaltans
caput meum : veni , & ure cor meum ,
inebria me charitate tua , & fac me
unum tecum , sicut tu , & Pater unum
estis. Dispone & ordina de me creatura
tua secundum beneplacitum tuum. Tuus
enim sum , & esse volo in sæcula sæcu-
lorum. Amen.

§. I V.

Modus orandi in ingressu Templi.

CUM aliquod templum iugrederis,
primò adorabis Augustissimam Tri-
nitatem, Sanctissimum Sacramentum, &
sanctos quorum Reliquiæ , & imagines
ibi sunt , præsertim ejus Ecclesiæ Patro-
num. Secundò gratias ages Deo pro do-
nis gratiæ in hac vita , & gloriæ in altera
Sanctis illius Ecclesiæ collatis , & pro
omnibus beneficiis , quæ fidelibus con-
cessit petentibus in illa Ecclesia. Tertiò
gratias ages iisdem sanctis pro bona vi-
ta , quam egerunt , diem Deo in hoc
sæculo servierunt : & pro beneficiis ,
quæ impetrarunt supplicibus suis , &

devotis hominibus orantibus in templo illo. Quartò congratulaberis Deo, & Sanctissimo Sacramento, & Sanctis illius loci de felicitate, quam habent in gloria cælesti; & de honore, qui illis exhibetur in terris, præsertim in colloco; & de bonis operibus, quæ ibi fiunt. Quintò dolebis de omnibus peccatis, quæ ibi, & alibi committuntur contra Deum, Sanctissimum Sacramentum, & Sanctos illos. Sextò Petes à Deo per merita Christi Domini in Sacramento existentis, & omnium Sanctorum illius loci, ut remittantur peccata, præsertim quæ ibi committuntur, vel ibidem aperiuntur in Confessione, vel sunt commissa, & confessa, utque eis detur gratia non amplius peccandi: ut exaudiat orantes in ea Ecclesia, si expediat ad eorum salutem; tibi que concedat quod petis: ut à Purgatorio liberet animas, quarum corpora ibi quiescunt: ut det tibi gratiam sanctè vivendi, & ad gloriam perveniendi, quemadmodum illi Sancti vixerunt: & pervenerunt: ut ea largiatur, quæ peti solent pro lucranda indulgentia illius Ecclesia. Tandem omnes actus supra scripto

ritis Christi, & eorundem Sanctorum ;
& sic ex corde Sanctissimæ Trinitati
offerres ad ejus gloriam , & honorem.

§. V.

*Quomodo quisque se gerat cum in
aliquod peccatum lapsus est.*

SI te contingat sive ex fragilitate, si-
ve ex malitia in aliquod peccatum,
vel defectum incidere, mentem protin-
us convertes ad Deum. Et primùm
quidem vilitatem tuam ad animum re-
vocabis, & actum odii erga te ipsum
exercebis. Deinde recolliges te, & con-
versus ad Deum dices : *Domine Deus
meus, ecce gessi me qualis sum. Quid
enim à me aliud expectandum quàm
sordes, lapsus, atque peccata? Doleo
Deus meus ex toto corde meo, & fa-
teor, quod multò deteriora perpetrassem,
nisi me singul inter tenuisset dextera tua.
Ideo gratias tibi ago, precorque ne san-
ctissimam Majestatem tuam me deinceps
offendere permittas.* Hæc ubi sincero
corde effuderis coram Deo, non eris
solicitus, peccatumne dimiserit an non.

nam hæc curiositas superbiam sapit, & est gravissimus laqueus diaboli mentem reddens inquietam sine fructu. Te ipsum itaque in paterna brachia clementissimi Dei projiciens exercitationes tuas resumes, ac si nunquam lapsus fuisses. Pueri nondum satis fortes ad ambulandum sæpius cadunt, & quia ex se surgere nequeunt, manum porrigunt matri, quæ eos erigit: tu autem Deo carior es, quàm Filius matri. Et licet una die sæpius labaris, nullatenus tamen de tua salute, & emendatione desperabis; sed solita exercitia iterum cum fervore inchoabis, omnibus viribus contendens, ut internam quietem animæ recuperes, & purè ad Deum te convertas. Turbatio enim ex admissio peccato proveniens non est indicium doloris ob offensam Dei, sed damnorum, quæ ti-
mentur, præsertim in diminutione famæ, & existimationis apud alios. Animi vero quietem sic ferè comparabis. Facta ad Deum conversione, & petita peccati venia; ipsiusmet peccati penitus oblivisceris, & solam ineffabilem dilectionem Dei contempleris, qua summo opere desiderat se tibi unire, & æternæ bea-

titudinis te participem efficere. Sic constituto corde in pia quadam tranquillitate, iterum lapsus tuos recogitabis, totoque corpore prostratus coram Deo dicēs: *Ecce Domine, hic ante pedes tuos jacens manebo, nec discedam, nisi venia, & consolatione accepta. Si vis me mortem quantum vis acerbam subire in pœnam multiplicium peccatorum meorum, occide me, percutē me, sed flagellis, & morte temporali, ut non maneam in æternum separatus à te. Ingemisco tanquam reus, culpa rubet vultus meus, supplicanti p̄ce Deus. Surge deinde, & de tege, ac confitere lapsum tuum simpliciter, & humiliter Patri spirituali cum certa fiducia obtentæ à Deo indulgentiæ. Abstinebis autem à crebrioribus reprehensionibus, & internis afflictionibus, quæ à diabolo quandoque sunt satagente huiusmodi turbationibus hominem inquietum, pusillanimum, & tardum ad bona opera efficere. Tandem his verbis exercitium concludēs. *Benedictus es Domine, dote me facere voluntatem tuam. Fac mecum signum in bonum, ut videant qui oderunt me, & confundantur, quoniam tu Domine adjuvisti me,*
& con-*

*& consolatus es me. Paratum cor meum
Deus, paratum cor meum ad faciendam
voluntatem tuam. Loquere Domine, quia
audiet servus tuus. Pax, & benedictio
tua sit super me semper. Amen.*

§. VI.

*De generali quadam Confessione
spiritualiter peragenda.*

O Primum exercitium a l expurgan-
dam animam à peccatis est aliquo-
ties in anno ante præcipuus festivitatis
generalem totius vitæ confessionem non
sacramentalem, sed spirituales perage-
re. Differt hæc à sacramentali, quod
illa Sacerdoti, hæc Deo fit: illa suos
habet effectus ex opere operato, ut
aiunt Theologi, hæc ex opere operan-
tis: illa necessaria suppositio peccato,
hæc voluntaria est: illa voce, hæc solo
corde fieri potest: illa à Christo insti-
tuta fuit in novo Testamento, hæc ab
ipso mundi exordio incepit, ea ve-
utebantur antiqui Patres in lege natu-
ræ, & in lege scripta; estque etiam
in usu in lege gratiæ, imò sacramentali

præmitti debet, ad quam nemo accedit, quin prius recogitaverit admissa peccata in amaritudine animæ suæ. Comoda, quæ affert, plurima sunt. Per hanc enim disponitur animus ad sacramentalem, acquiritur sui notitia, augetur meritum, & quia plus otii in hac est agendi cum Deo, prolixius quam coram Sacerdote indulgere mens potest actibus contritionis, peccatique gravitatem magis expendere, & detestari. Cavendum est tamen, ne quis moram protrahat in peccatorum carnalium recordatione, ne dæmonum astu in veteres cadat laqueos impudicitiae. Methodus servanda in hac confessione hæc erit.

I. Excitato ardenti desiderio hanc tanti momenti actionem non tepidè, aut perfunctoriè, sed bene peragendi, elige locum occultum, aut secretum notis silentium, & colloca te in præsentia Dei sedentis tanquam iudicis in tribunali, stipati choro Angelorum & Sanctorum: præsentibus specialiter B. Virgine, Angelo tutelari, Patronisque tuis paratis, ut tibi patrocinentur. His autem adstabis cum omni interna, &

exter
ad col
dici
rescens
mine
n'quiss
qui m
minib
suffici
dine
& ing
teris:
ad hoc
admiss
testati
ejus il
tus fu
tatus
tum e
audias
tur tibi
tes, q
ctus,
auxilia
II.
tis uni
ethi sa
tes, j

externa reverentia, tanquam reus fune ad collum alligato, & præsentiam judicis cum timore, & tremore perhorrescens. Sic pudore suffusus dices: *Domine Iesu Christe, ego sum ille peccator nequissimus, miserrimus, abominabilis, qui majestatem tuam tot, tantisque criminibus offendi, ut illa enumerare non sufficiam, sicut arena maris præ multitudine numerari non potest.* Tum suspira, & ingemisce, qua majori efficacia poteris: illique dicito, te nullo alio fine ad hoc exercitium ferri, nisi ut seria admissorum scelerum pœnitentia, & detestatione injuriam refarcias Majestati ejus illatam, quod certè nunquam ausurus fuisses, si clementer ab ipso excusatus non fuisses. Dic etiam tibi statutum esse non inde recedere, quin prius audias verbum consolationis, *Remittuntur tibi peccata tua.* Demum lumen petes, quo scelera tua cognoscas: affectus, quibus ea detesteris: media, & auxilia, quibus emendes.

II. His peractis accusa te de peccatis universis, præcipuè de gravioribus, etsi sæpe confessis, & uti sperare poteris, jam pridem remissis, Percurre om-

nia, recolendo diversa vitæ tempora
ab usu rationis usque ad hanc horam,
sequendo seriem præceptorum Dei, &
Ecclesiæ, teque severissimè objurga, &
in terram abjice cum maximo affectu
doloris, & humilitatis. Sic autem per
præcepta Decalogi discurre addendo
singulis quæ specialiter in ea materia
commisisti.

» Domine Deus meus confundor, &
» erubesco levare faciem meam ad te,
» quoniam iniquitates meæ multiplica-
» tæ sunt super caput meum, & deli-
» cta mea creyerunt usque ad cælum;
» sed sto coram iudice reus, coram Re-
» demptore servus, ideoque attollo men-
» tem, & spem meam, ut propitius sis
» peccatis meis, & deleas omnes ini-
» quitates meas. Converte me, & con-
» vertar, quia tu Domine Deus meus.
» Fac ut memor sim unde exciderim, &
» pœnitentiam, ac prima opera faciam.
» Debui te Creatorem meum amare ex
» toto corde meo: idem tecum velle,
» ac nolle, & in te solo confidere, &
» tibi credere. Sed heu! divisum fuit
» cor meum, & posui carnem brachium
» meum, & ad nihilum redactus sum.

Dere
fodi
humil
in te
Insup
2. Q
abit
infl
quæ
laud
mihi
dit. C
est lap
religi
suam
licem
labia
autem
que
3.
tus in
tum l
& ex
tibi
mea
terra
domi
ciola

Dereliqui te fontem aquæ vivæ, & fodi mihi cisternas dissipatas, nec me humiliavi sub potenti manu tua, cum in te solo vivere, & moveri possim. Insuper hæc, & hæc commisi.

2. Quemadmodum autem cor meum abiit in vanitates; ita etiam lingua mea inflammavit rotam nativitatis meæ: quæque debuerat esse lignum vitæ, te laudare, de te loqui ô omne bonum, mihi, aliisque mortis occasionem dedit. O beatum, & perfectum, qui non est lapsus in lingua: qui enim putat se religiosum esse non refrænans linguam suam, hujus vana est religio. O ter felicem qui vota sua, quæ distinxerunt labia sua, tibi perfectè reddidit. Ego autem multipliciter ea violavi, nomenque tuum minimè sanctificavi.

3. Atque utinam saltem delectatus in te fuisseni, & sabbatum delicatum servassem, in officiis tuis fervens: & exultassent labia mea, cum cantarem tibi; & in voce laudis tuæ omnia ossa mea jubilassent! inebriata enim esset terra mea, & locupleta ab ubertate domus tuæ; pinguis facta fuissent speciosa deserti; & campi tui potentia

» animæ meæ omnibus bonis abunda-
» rent. Nunc verò lingua mea adhæsit
» faucibus meis; contabuerunt omnia ossa
» mea; & orationes meæ atque sacrificia
» facta sunt mihi in peccatum propter
» innumeros defectus meos.

» 4. Quod si te, ut par est, dilexissem;
» cibus meus fuisset facere voluntatem
» tuam, idest superiorum meorum. Pro-
» pter te alacriter, & perseveranter o-
» bedissem illis, neque dura cervice Spi-
» ritui Sancto aliquando etiam in parvis
» resistissem, tu enim ad illos dixisti, qui
» vos audit, me audit. Hoc autem man-
» datum multis modis transgressus sum:
» sed & subditis meis necessaria non pro-
» vidi, onera non portavi, cum tu tibi
» fieri dixeris, quod uni ex minimis tuis
» fit.

» 5. O quantus hic esse stimulus debet,
» ne ullum cogitatione, verbo, & facto
» lædam; ne alicui injuriam faciam: sed
» pacem servem, quoad fieri potest, cum
» omnibus, pacem tuam, quæ exsuperat
» omne gaudium! sumus enim Filii tui,
» qui solem tuum oriri facis super bonos,
» & malos. Ego verò legis immemor na-
» turalis, quæ mihi fieri ab aliis nolui-

sem, ipsis feci; vixque amicos, & bene-
volos dilexi, quod etiam ethnici fa-
ciunt, & feræ. Te nimirum imitari re-
culavi, & in numero filiorum tuorum
cenferi, cum ipse præceperis dicens,
Diligite inimicos vestros, ut sitis filii
Patris vestri, qui in cælis est. Quod si
jubes inimicos amari, quem debeo
odisse?

6. Certè in extremo iudicio à te
agnosci, & inter filios tuos computari
vellem: Non studui tamen longè face-
re à me desideria turpia, & illecebri-
sa, ut mundo corde te aliquando vide-
rem: nec diligentissima oculorum, &
sensuum custodia repuli à me jacula
ignita, igne illo candentia, qui ad in-
ternecionem devorat, & sancta om-
nia profanat. Violavi templum tuum
corpus meum, & denigrata est super
carbones facies mea. Libera me ab om-
ni immunditia mentis, & corporis, tu
qui solus de immundo mundum facere
potes: carnis concupiscentiam longè
fac à me, & spiritum rectum innova
in visceribus meis.

7. Restringe etiam concupiscen-
tiam oculorum, ne cupiditate, radice

» omnium malorum accensus aliena ca-
 » piam, abscondam, retineam, damna
 » inferam: ne rem proximi desiderem,
 » ne malum ei aliquod inferri patiar, qui
 » juxta mandatum tuum tribuere debeo
 » mea, ac omnia potius derelinquere,
 » quàm perdere te.

» 8. Et hæc quidem displicent Ma-
 » jestati tuæ, sed longè magis os bi-
 » lingue, & mendax, quia veritas es
 » Deus meus, uti & proximum lingua
 » percutere, famam illius denigrare,
 » servum alienum judicare. Te enim dirè
 » vulnerat, qui sic pungit fratrem suum:
 » te cruciat qui affligit, & contemnit il-
 » lum, quem tanto pretio redimere di-
 » gnatus es. Hæc sciebam, Salvator
 » meus, hæc credebam, & credo; at ni-
 » hilominus contrarium operatus sum,
 » lingua Christianus, moribus infidelis.

Eodem modo te accusabis de commif-
 sis contra præcepta Ecclesiæ, statuta tuæ
 Religionis, per singula discurrendo.

III. Sic facta accusatione gravita-
 tem peccatorum tuorum ponderabis, ut
 ea efficacius detesteris. Peccasti enim
 contra Deum, qui est summum bonum,
 quo spreto ad umbram boni conversus in

rebus caducis tuam posuisti felicitatem ,
quod est genus quoddam idololatriæ. A
Domino , & Principe supremo infami
rebellione , & perfidia defecisti : adver-
sus sponsum animæ tuæ sacrilegum adul-
terium commisisti , innumeris , & ma-
ximis beneficiis ad ejus contemptum
abusus es , quæ est perversitas , & im-
pudentia inexplicabilis. Expende infini-
tas Dei perfectiones , & tuam abjectissi-
mam vilitatem : omnia bona , quæ à Deo
recepisti , & mala , quæ ei pro bonis
reddidisti ; & vide an possit ulla insania
ulterius progredi , quàm ut is , qui ex se
nihil est , eum , qui est ipsummet esse , au-
deat irritare. Hæccine reddidisti Domi-
no stulte , & insipiens ? Nunquid non ip-
se est pater tuus , qui possedit , & fecit ,
& creavit te ? Considera deinde quid te
ad peccandum impulerit : crescit enim
injuriae magnitudo , si levi de causa irro-
gatur. Ob quam igitur causam peccasti ?
Ob modicam , & fœdā carnis volupta-
tem , ob punctulum honoris , ob vile lu-
cellum , ob res denique vilissimas , & in-
star fumi prætereuntes. Quare Deum fa-
ctis negasti , diabolum ei præposuisti , id-
que tanta temeritate , facilitate , & auda-

cia, ac si Deus tuus, Deus ligneus esset, qui scelera tua, nec videre posset, nec vindicare.

IV. Ex his prorumpes in vehementem admirationem, qua ratione in statu tam misero vitam hilarem, & tranquillam ducere poteris. Quomodo creature te hactenus sustinuerint, quarum conditorem offendisti: cur non omnes adversum te unanimiter conspirarint. Quo pacto Deus tam amanter, & patienter te potuerit tolerare, qui tot millena millia aliorum æternis cruciatibus addixit ob peccata, & gravitate, & numero tuis minora.

V. Post hæc elicies actum odii, & abominationis adversus te ipsum, qui solus auctor peccati es, & peccando majora tibi damna intulisti, quam unquam inferre omnes dæmones, & homines universi potuissent, quamvis hostes fuissent capitalissimi, & crudelissimi. Quare te odio habere debes, atque hostilem in modum persequi, optando penitus abolere quidquid Deo contrarium est, invadendo pia quadam emulatione eorum felicitati, qui nullo se unquam crimine obstrinxerunt, anteponendo rebus omni-

bus animam , quæ Deum non offendit ,
& vixit , ac vivit integræ conscientiæ pu-
ritate.

VI. Sequitur contritio , cum firmo
proposito non peccandi amplius , & fa-
ciendi fructus dignos pœnitentiæ ; Ad-
des autem sequentes affectus , si volueris.

Aquæ multæ peccatorum meorum
non potuerunt extinguere charitatem
tuam, Deus meus, quam tot , tantisque
beneficiis declarare dignatus es. Ideo
memoria memor ero tantæ tuæ charita-
tis , & tabescet in me anima mea præ
desiderio tui , & liquecet , Sol justitiæ
ad radios amoris tui. Utinam sicut fluit
cera à facie ignis , sic pereant hodie
peccata , & imperfectiones meæ à fa-
cie tua Deus meus. Lavi pedes meos ,
nunquid ultra inquinabo illos ? Non
faciam , bone Jesu , gratia tua , sed di-
ligenter cavebo , ne quid in me displi-
ceat purissimis oculis tuis : ambulabo
coram te corde perfecto , & gratissi-
mum mihi erit quicquid sanctissimæ
voluntati tuæ libitum erit : omnes pec-
candi occasiones evitabo ; & virtuti-
bus studebo , quas antea per vitia con-
traria violavi , ut in quo te magis con-

» tempfi , magis honorem. Id profi-
» teor hodie coram te , & univerfa Cu-
» ria tua cœleſti , teſtem illam invocans
» deſiderii mei , & adjutricem infirmi-
» tatis meæ.

VII. Poſt hæc cum omni reverentia,
& demiffione animi , & corporis pete
veniam delictorum à Deo. Obteſtare
illum per titulos omnes , qui cor illius
ad præſtandam tibi miſericordiam emol-
lire poſſunt ; uti ſunt ejus bonitas, amor,
potentia , merita Filii ſui, beneficia præ-
ſtita , & in poſterum præparata, & glo-
ria , quæ illi in cœlo , terrisque decanta-
bitur, ſi tibi indulgeat. Eandem veniam
poſtula à ſanctiſſima Chriſti humanita-
te. Obſecra per puritatem ſuæ Conce-
ptionis , per Nativitatis demiffionem,
per vitæ labores , per infamiam mortis,
per deſiderium, quo vult ſalutem anima-
rum, per veniam Magdalenæ, aliisque
peccatoribus conceſſam, per merita vir-
tutum ſuarum , per quidquid pertulit
pro te. Utere patrociniis Virginis Ma-
tris , Angeli cuſtodis , & reliquorum
Sanctorum , & tutelarium tuorum, pro
ea qua pollent gratia apud Deum , &
Verbum incarnatum.

VIII. Audi postea quid Deus, & Christus interius tibi loquantur. Audi exprobrationes, quibus tuam ingratitude, & perfidiam tibi obijciunt post tot beneficia quibus te præ cæteris fecerunt. Excipe cum omni humilitate commonitiones quibus te ad vitam meliorem excitant. Excipe velut ab ore summi Sacerdotis absolutionem, teque ad pœnam in hac vita subeundam paratum offer humi protestatus. Dic confusus, & dolore plenus. *Domine Pater vita mea, nulla est in mundo condigna pœna demeritis meis; nulla, qua possim satisfacere malis, quæ impudenter commisi. Si hoc tibi gratum forem, libenter me morti traderem in pœnam delictorum meorum: Sed quia me interficere nec possum, nec debeat, tu me miserum occide; aut mitte Angelum gladiatorum tuum, qui de me vindictam sumat. Arma creaturarum tuarum exercitum contra me, ut vindicent causam tuam. Irruant in me omnes egritudines, dolores, adversitates, injuriæ, contemptus, calamitates: omnia lubenti animo sustinebo per gratiam tuam, dummodo in fine placatum mihi ostendas vultum tuum. Vultum*

*tuum Domine requiro, quo civitas tua
laetificatur: vultum tranquillum, & ju-
cundum, quo Angeli beatificantur. Osten-
de mihi faciem tuam, sonet vox tua in
auribus meis, vox gaudii, & consolatio-
nis, qua dicas servo tuo, Remittuntur tibi
peccata tua, vade in pace.*

IX. Demum concludes hanc spiritua-
lem confessionem actione gratiarum,
quas Deo, & Christo reddes ob remis-
sionem peccatorum, quam te obtinuisse
confidis. Renovabis propositum illi ser-
viendi, obtestaberis, ut rata esse jubeat
decreta animi tui, eaque ipse, sine quo
nihil potes facere, ad executionem fe-
liciter deducat. Gratias item ages beatæ
Virgini, Angelo custodi, & sanctis ob
opem tibi præstitam, & auxilium eorum
pro vita sanctè deinceps instituenda
efflagitabis,

§. VII.

*Paraphrasis anagogica Dominicæ
Orationis.*

Pater. Tu es ille, qui filios spirituales progeneras, mediante vivificativo germine, & ideo verè tunc filius tuus ero, quando te vero amore constringam. Tu Pater omnia potes, qui omnia fecisti ex nihilo, da ut serviam tibi filiali amore, teque intimis visceribus amplectar, & tibi soli adhæream.

Noster, qui ratione tuæ latissimæ bonitatis omnes spiritus rationales per immixtos à te radios ad te trahis, & non est qui se abscondat à calore tuo: quando te tam ardentè amabo, ut tua bonitas in me appareat! Nam si verè te amarem, tunc aliquid in me tuæ latissimæ diffusionis stillares.

Qui es in Cœlis. Sed in terris quoque es per essentiam, presentiam, & potentiam. Verum alio modo in cœlis es, quàm in terra. In cœlis enim sunt Angeli & Beati, qui cœli cœlorum sunt, in quibus es adeo ineffabiliter, ut esse in re-

bus cæteris non videaris. Cæli etiam sunt sancti viri, qui à terrenis rebus elevati, puri, simplices, illuminati in cælis semper conversantur: in quibus es per gratiam quæ tanti est pretii, ut sine ea quicquid in mundo est nihil sit. Quando igitur anima mea nitida, & clara instar cæli efficietur, & diversarum virtutum sideribus adornata: Tunc enim in me habitabis, cum per flammam amoris ab omni fœce purgatus mundum tibi, & immaculatum cordis hospitium exhibebo.

Sanctificetur nomen tuum. Sine terra efficiatur in me nomen tuum, quod est mirabile. Nisi enim depulsa omni carnalitate te super omnia diligam, terrenæ concretionis pondus spiritum terræ alligatum tenebit. Quando igitur sanctificabitur notitia tua in me. Quando in me habitabis per gratiam, & amorem, ita ut terra nullum in me habeat locum. Quando depulsa omni mortalitate unus tecum spiritus efficiar per mysticam unionem.

Adveniat regnum tuum, ut non regnet peccatum in meo mortali corpore. Vult quidem regnare in me quandoque inanis gloria,

gloria , quandoque luxuria ; sed ego nolo quemquam in me regnare , nisi te Domine Rex Regum , qui solus habes immortalitatem. Tunc autem in me regnabis , cum te ardentè amavero : qui enim te amat , tecum regnat ; & qui te possidet , omnia possidet in æternum. Valeant omnia regna mundi , & omnis gloria eorum. Melior est mihi dies una in atriis tuis , quàm mille anni in tabernaculis peccatorum. Exul sum , & peregrinus super terram , ad hoc natus ut futuram civitatem inquiram , in qua tu regnas : & hoc est regnum , quod opto ; nam si hoc quæsero , & justitiam ejus ; tu me de cæteris fecisti securum.

Fiat voluntas tua , sicut in Cælo , & in terra. Regnum enim tuum nemo potest possidere , nisi rectus fuerit. Rectus autem esse nequit , nisi qui tuam fecerit voluntatem : voluntatem verò tuam nemo facere potest , nisi ex dono tuo , quia nemo venit ad te , nisi tu traxeris eum. Propterea fiat à te voluntas tua , mihi scilicet donetur à te , ut per gratiam tuam faciam in terra voluntatem tuam , sicut in cælo fit à Beatis per gloriam tuam. Purifica cor meum ô ignis ardentissime,

ut expellam perfectè amorem proprium, & rejiciam propriam voluntatem, ut plenè fiat in me voluntas tua, & mea pereat. Pereat in me omnis proprietas, teque solum diligam ex toto corde, & glutino amoris tecum unitus tibi soli adhercam, & consentiam.

Panem nostrum quotidianum da nobis hodie. Non peto quod voluptati serviat, sed quod languenti animæ sufficiat. Non carnis consolationem quero, sed affectionem supercœlestem. Panem volo Angelorum, augmentum videlicet amoris, quo solo afficitur, & satiatur anima mea. Quando fiet istud, optime Pater, ut te flammigeris affectionibus contingens panem amoris comedam in saturitate? Hunc panem da mihi semper, ut eodem cibo in præsentî nutriar, quo Angeli sancti in glôria saturantur: ut de micis comedam, quæ cadunt de mensa Domini mei. Inquietum est cor meum, donec pane isto divino aliquantulum confortetur, qui ideo quotidianus dicitur, quia quo plus comeditur desiderio quotidiano, reficit abundantius.

Et dimitte nobis debita nostra, sicut & nos dimittimus debitoribus nostris. Mul-

tripliciter enim tibi debitor sum. Nam quis potest numerare peccata, quæ feci, quis tolerare quæ quotidie perpetro? Hæc sunt debita, quæ mihi opto dimitti. Solus autem amor uniendo me tibi te quondam mihi offensum placatum efficiet, & reddet gratiosum. Quando igitur ô bene creditor, te vero amore constringam, ut omni peccato dimisso, te mihi placatum sentiam notitia experimentalis? Ne differas secundum multitudinem bonitatis tuæ dimittere mihi, quia & ego verè dimitto debitoribus meis paratus eis benefacere ubi, & quando oportuerit.

Et ne nos inducas in tentationem. Perfice Pater quod cœpisti, & misericordia subsequatur me omnibus diebus vitæ meæ. Scio enim, quod qui perseveraverit usque in finem hic salvus erit. Nemo autem perseverare potest sine te, quia totus mundus laqueis, & tentationibus plenus est; & nos in tenebris ambulamus, atque inimicos habemus, qui non dormiunt die, ac nocte. Hoc itaque peto amoris glutino inseparabiliter colligari, quia tunc securus ero, cum tibi totaliter adhærebo.

Sed libera nos à malo. Non à malis, quæ me pati oportet in hac vita, ut prober in camino tribulationis; hæc enim libenter ferre paratus sum tua gratia optulente: Sed à malo pœnæ infernalis, quæ hominem separat à te: à malo quoq; Purgatorii, non effugiam tormenta, sed ne diu ibi detentus desiderio frauder vendendi faciem tuam, in quam desiderant Angeli prospicere. Verum si ego te ardentem diligere, amoris flamma peccatorum rubiginem exureret, & sic in hora mortis meæ flammigeris affectionibus expurgatus ad te diu desideratum sine dilatione evolare. Quando ergo hoc ardore te diligam, qui & pœnam excutiat, & à dilatione absolvat? Hoc ipse præstare digneris, qui vivis, & regnas Deus per omnia secula seculorum. Amen.



S. VIII.

*Oratio ad sanctissimam
Trinitatem.*

O Summa Trinitas, una virtus, indiscreta Majestas, unus in substantia, Trinitas in personis, numerabiliter innumerabilis, mensurabiliter immensurabilis, invisibilis, ineffabilis, admirabilis, incomprehensibilis, imperscrutabilis: Deus magnus sine quantitate, sine qualitate bonus, sine tempore sempiternus, sine situ ubique præsens, sine loco ubique totus, omnia implens, sine extensione, sine indigentia omnia creans, sine motu omnia movens. In magnitudine infinitus, summus in bonitate, in virtute omnipotens; in sapientia inestimabilis, terribilis in consiliis, in verbis verax, in operibus sanctus, justus in iudiciis, copiosus in misericordia, patientissimus erga delinquentes, piissimus erga poenitentes: cui nec præterita transeunt, nec futura succedunt: cui nec origo initium dedit, nec tempora dant incrementum: quem nec spatia dilatant,

nec voluntas variat, nec mœsta perturbant, nec læta demulcent. Deus sancte sanctorum, Deus spirituum, & cunctæ carnis, à cuius conspectu tremunt cœlum, & terra; cuius nutui obediunt elementa: vita vivificans me: lumen illuminans me. Aperi mihi clamanti portas iustitiæ, & ingressus in eas confitebor tibi. Te adoro, te laudo, te glorifico labiis, & corde, omnique qua valeo virtute te benedico; & procumbens humiliter sub pedibus magnificentie tuæ gratias ago tibi, quia per illustrationem gratiæ tuæ illuminasti me, & per matris Ecclesiæ documenta in fide tua confirmasti me. Et unde hoc mihi factor cœli, & terræ, qui bonorum meorum non egēs, unde mihi hoc quod amasti me? Quid tibi dedi, & retribuisti? Ubi eram antequam fierem, & ut inciperem bonum? Sed tua gratia factus sum, & innumerabilibus donis tuis ornatus sum, perfice ergo me, qui fecisti me; perfice usque ad formam plenam imaginis tuæ, & similitudinis, ad quam formasti me.

Te invoco, ô beata Trinitas, ut venias in me, & templum me facias dignum gloriæ tuæ. Rogo Patrem per Filium,

rogo Filium per Patrem , rogo Spiritum sanctum per Patrem , & Filium , ut omnia vitia elongentur à me , & omnes sanctæ virtutes plantentur in me. Deus immense , à quo omnia , per quem omnia , in quo omnia facta sunt , custodi me opus manuum tuarum in te sperantem , & in tua solummodo misericordia confidentem. Custodi me quæso hîc , & ubique , nunc & semper , intus , & foris , ita ut in me nullus pateat locus insidiis inimicorum. Ad te beatissima Trinitas anima mea suspirat , quoniam à te infelicitè exulat. Discedens à te quantis se intricavit erroribus , doloribus , timoribus : Cor meum conturbatum est , & inde dolor : dereliquit me virtus mea , & inde pavor : lumen oculorum meorum non est mecum , & inde error. Verumtamen in te speravi Domine , quoniam adhuc confitebor tibi , cum error videlicet à ratione , à voluntate dolor , atque à memoria timor omnis recesserit ; & successerit illa , quam spero , mira serenitas , plena suavitas , æterna securitas.

Æterne Pater , ingenite , innascibilis ,
principium sine principio , auctor bono-

rum, fons deitatis, ac totius entitatis origo, Deitas tua me totum repleat, ejusque gloriæ participem faciat, quam Filius tuus mihi promeruit. Sanctifica me in veritate, & tui præsentia imple memoriam meam, ut cum timore & tremore semper stem in conspectu tuo, nec unquam mens mea à te avertatur. Fili vnigenite, non posterior, nec minor Patre, eique omnino coæqualis, & consubstantialis, Deus de Deo, lumen de lumine, candor lucis æternæ, Verbum incarnatum, virtus omnipotens, sapientia, quæ ex ore Altissimi prodiisti; imago Patris, splendor gloriæ, & figura substantiæ ejus, illumina intellectum meum, roboram infirmitatem meam, ut te cognoscam, & diligam; & tanquam unicuique præsidium meum omnibus præferam. Sanctissime spiritus à Patre, & à Filio procedens, utriusque amor, & arctissimum vinculum, charitas essentialis, & totius charitatis principium, ignis consumens, flamma vitalis, donum superans omne donum, à quo omnia bona in nos descendunt, inflamma voluntatem meam ferventissimo tui amore, & constanti charitate, ut te solum quæram,

ram, & universa despiciam. Adstringe me tibi, & Patri, ac Filio; ut nec intellectu, nec affectu à vobis divellar. Sancta, & adoranda Trinitas, Deus meus, & omne bonum meum, abrenuntio propter te omnibus mundi pompis, & honoribus. Detestor omnem carnis, & sensuum voluptatem: Anathema divitiis, & vanitatibus seculi. Gloria mea hæc sit pro te contemni: mea voluptas tibi adhærere: meæ divitiæ tibi servire in secula seculorum. Amen.

§. IX.

*Pia exercitatio erga Christum
Crucifixum.*

Montibus Hannoniæ parvus libellus impressus est anno 1634. proximam quandam continens spiritualis exercitationis erga Christum crucifixum, qua pius quidam Dei servus utebatur. Est autem hujusmodi.

1. Habebat hic in cubiculo suo Christi e Cruce pendentis affabrè factam imaginem opere anaglyptico, quam semel in mense nudis pedibus maxima humili-

tate adorabat, fidelitatis juramentum ei prestant; deque omni quod erat, quod poterat, quod habebat homagium illi faciebat, petens, ut sibi tanquam seruo emptitio ejus pedes exosculari liceret. Singulis quoque sextis feriis ipsum cum universa familia adorabat, sicut solet Ecclesia feria sexta majoris hebdomadae.

¶ 11. Cum aliqua tentatione vexabatur, ad ipsum confugiebat: & si foris fuisset, anima ejus ad pedes ipsius volabat, & in sacris ipsorum vulneribus se abscondebatur. Cum verò ex cubiculo egrediebatur, in una plagarum animam suam relinquebat; & si alicubi inutilia audiebat colloquia, in nidulo suo colligebat se mente Crucifixum adorans, & dulcia cum eo miscens colloquia. Quod si domi tentabatur, Crucifixum arripiebat eo seipsum signabat, eumque amplectebatur, sicut infans terrore correptus ad Matrem, vel nutricem fugit. Deinde dicebat sibi, *In hoc signo vinces*: & ad diabolum, *Ecce Crucem Domini nostri Iesu Christi, fugite partes adversae, vicit Leo de tribu Juda, radix David.*

III. Si aliquando tentationi succumbens culpam aliquam admisisset, concito gressu ad Crucifixum properabat, seque accusabat ante tribunal justitiæ ejus, & quasi ex ore Domini sententiam suæ damnationis proferri audiret, se humi prosternebat, atque illico pœnitentiam sibi inspiratam faciebat. Interdum etiam graviora sua peccata scribebat, & ad pedes Salvatoris ferebat, ut pretioso suo sanguine ea deleret. Suo item cordi cor faucium Jesu Christi aliquando applicabat, manibus manus, pedibus pedes, ut à fonte totius sanctitatis remedium acciperet suarum necessitatum.

IV. In omnibus dubiis, ac difficultatibus suis consilium ab eo petebat dicens, *Loquere Domine, quia audit servus tuus.* Quoties aliquid composuerat ad pedes ejus ferebat, *Tua est*, inquit, *hæc doctrina, Domine, tu mihi eam distasti: corrige hæc scripta & omnis eorum laus tua sit.* In desolationibus ad eum recurrebat dicens, *Deus Deus meus, ut quid dereliquisti me?* Confugiebat ad eundem in ariditatibus, & dicebat, *Anima mea sicut terra sine aqua tibi, velociter exaudi me Domine.* Cum ægro-

tabat, subinde ad ipsum respiciebat æstimens se felicem, quod aliquid pro illo pateretur. Scribebat ille epistolas plenas amore, omnemque statum suum internum ei revelabat, & consilium ab eo petebat; serto florum eum coronabat, accipiens sibi spineam coronam: erant autem flores diversæ de seipso victoriæ, actusque virtutum, quos illi offerebat serò post examen: spinæ verò erant mortificationes.

v. Vocatus ad aliquam conversationem ponebat Crucifixum super os, oculos, & aures dicens, *Pone te Domine, sicut seram ori meo; sicut sepem spinarum auribus meis, & aliis sensibus, ut nihil intret in cor meum, quod displiceat cordi tuo.* Quod si in illa conversatione aliquo modo deliquisset, pœnam imponebat ori suo, ne sacra vulnera oscularetur: oculis, ne in faciem ejus respicerent: linguæ, ne coram eo loqui præsumeret usque ad certum tempus, donec crederet culpam esse expiatam. Semper eum præsentem habere conabatur, cupiens mori cum eo in Cruce. Omnes actiones suas actibus ejus conformare satagebat, ipsumque jugiter precabatur ut inter

brachia sua , & cor apertum reciperet spiritum suum. Hæc & alia obsequia erga Christum crucifixum præfatus Dei servus præstabat : Sed ista dumtaxat è multis excerpfi , quæ ad exemplum , & imitationem sufficere possunt. Amor autem , & spiritus Domini Jesu se devotè exercitanti plura suggerent : ipse enim spiritus adjuvat infirmitatem nostram , ipse postulat pro nobis , & facienti quod in se est , vires , ac robur subministrat.

§. X.

Paraphrasis Angelicæ Salutationis.

Ave Mater Dei, Mater gratiæ, Mater misericordiæ , quæ Deum & hominem peperisti. Ave Regina cœli, & terræ , quæ sine væ peccati semper fuisti, ab omni miseria immunis , & verè in omnem æternitatem beatissima. Ave fons salutis , cujus privilegiorum multitudo innumerabilis , splendor æternus, gloria inexplicabilis est. Ave pax , & gaudium mundi, quæ cœlum terræ , nos Deo conciliasti.

Maria, nomen dulcissimum super mel, & favum: nomen post Filii tui nomen super omne nomen, in quo post Filii nomen benedicuntur omnes nationes terræ: nomen in quo flectitur omne genu cœlestium, terrestrium, & inferiorum. Maria illuminatrix omnium spirituum, ad cujus lucem mores effingimus: Domina nostra, cujus pio famulatu felicitatem adipiscimur sempiternam: Stella maris, cujus perpetuo afflatu, & fulgore illustramur, & ad portum salutis dirigimur: Mare gratiarum, & sanctitatis, è quo exeunt omnium virtutum exempla, omnia Sanctorum charismata, & beneficia.

Gratia plena. Ira enim, & maledictio in omnes filios Adæ: tu autem invenisti gratiam apud Deum. Singulis gratia data est per partes, in te toti se effudit gratiæ plenitudo. Tu gratia plena, quæ nulli unquam peccato aditum aperuisti: gratia inquam plena, quia omnia opera ex gratia fecisti, & in cunctis virtutibus excelluisti. Fuere quidem & alii sancti gratia pleni, sed tu valde differenter ab illis; quia ibi major abundantia liquoris, ubi major capacitas vasis.

Quanta autem capacitas tua fuit, quæ illum tuo gremio contulisti, quem cœli capere non possunt?

Dominus tecum. Tecum in corde, tecum in utero, tecum in auxilio. Tecum Filius, quem carne induis; tecum Spiritus sanctus, de quo concipis: tecum Pater, qui eum genuit ab æterno, quem tu paries in tempore, Dominus tecum, & in te; uti Rex in folio, sponsus in thalamo, amicus intimus in amico, inò multò intimiùs, & arctiùs. In me etiam Dominus est, quomodo enim subsisterem sine illo? Sed in te multo excellentiùs per majorem gratiam, per majorem bonorum communicationem, per assumptionem humanæ naturæ.

Benedicta tu in mulieribus. Verè benedicta, quæ à communi maledictione mulierum libera, nec sterilis fuisti, nec virginitatem amisisti, nec in tristitia peperisti. Portasti Deum, qui portat orbem; genuisti genitorem tuum, nutritivisti omnium viventium nutritorem; virum non nosti, & virum utero tuo circumdediti. Verè benedicta, quæ fuisti excelsior cœlo, latior terra, ma-

jor universo , illum gerens in ventre; qui nullo clauditur termino. Verè benedicta , quia carne ex te assumpta Filius Dei humanum genus ab omni maledictione liberavit.

Et benedictus fructus ventris tui Iesus , quia sine corruptione conceptus, sine dolore natus , & ut peccati destructor in lucem editus. Merito benedictus , qui est super omnia Deus benedictus in sæcula , quem Pater caput Angelorum , & hominum constituit , & sine mensura omni gratia , & benedictione replevit. Tu arbor vitæ fuisti in Ecclesiæ Paradiso sita , ex qua tam dulcis , tam utilis , tam pretiosus extitit fructus , qui & te benedictam fecit , & nos eripuit à maledictione , & morte peccati , & omni benedictione cumulavit.

Sancta Maria Mater Dei , quæ sancta es , & sanctitatis prodigium ; donorumque & gratiarum pelagus inexhaustum. Vera Mater Dei , quæ Deum hominem factum peperisti : pia mater nostra , quæ erga nos maternum geris affectum , & mater peccatorum vocari non erubescis.

Ora pro nobis peccatoribus. Non dicimus quid ores , quia tu scis quid expediat nobis. Tu sancta es , & quid nobis nisi sanctitatem postulabis ? Tu gratia plena , quid petes nisi gratiarum abundantiam. Ora igitur pro nobis.

Nunc , & in hora mortis nostræ. Duplex auxilium nobis est necessarium : alterum ut sanctè vivamus , alterum ut sanctè moriamur. Utrumque nobis impetra , ut in præsentì tempore ab omnibus malis animæ , & corporis liberati in sanctitate progrediamur , & perseveremus : & cum hora mortis nostræ advenierit , ab omnibus insidiis diaboli erepti sancti , & immaculati hinc decedamus , & perpetuo Dei aspectu in cœlesti patria perfruamur. Amen.

§. XI.

Quomodo colendus quilibet Sanctus ; præsertim in ejus Festivitate.

CONSTAT hoc exercitium quintuplici actu , nimirum adoratione , gratiarum actione , petitione , congratulatione , & oblatione.

1. Ex amore Dei, & sancti illius, quem propter Deum amas, sanctissimam Trinitatem actu patriæ adorabis, tanquam principium omnium donorum naturæ, gratiæ, & gloriæ, quibus ille Sanctus fuit ornatus in hac vita, & nunc ornatur in cælo. Ex simili quoque amore ipsum Sanctum adorabis actu dulciæ tanquam ornatum illis donis in hac vita, & in cælesti gloria. Eodem modo omnes ejus reliquias, ubicumque servantur, adorabis; concipiendo eas in variis partibus dispersas.

II. Gratias ages Sanctissimæ Trinitati pro omnibus donis illi concessis, & Christo in quantum est fons, ex cujus meritis illa dona fluxerunt. Deinde gratias ages ipsi sancto: Primo quia tam fideliter Domino suo servivit in hac vita, & bene usus est donis naturæ & gratiæ sibi concessis. Secundo quia nunc in gloria cælesti tam perfectè famulatur Deo, ipsum laudando, & amando. Tertiò pro omnibus beneficiis per ejus merita, vel preces Ecclesiæ sanctæ, vel alicui particulari concessis: & præsertim pro exemplis optimæ vitæ ad imitandum relictis. Danum gratias ages

Angelo ejus Custodi, aliisque Sanctis, qui eum in hac vita juverunt, & quorum auxilio sanctam traduxit vitam, & ad gloriam Paradisi pervenit.

III. Rogabis sanctissimam Trinitatem per Christi, & ejus sancti merita, ut tibi, & aliis ipsius devotis det gratiam sancte vivendi, ut ille vixit; & ad gloriam perveniendi, ad quam ille pervenit. Eundem quoque Sanctum deprecaberis, ut propter Dei amorem idem nobis efficaciter impetret: Rogabis, ut in Ecclesia sancta minuatur, quam maxime fieri potest, numerus peccatorum existentium in peccato mortali, & justorum tepide Deo servientium: ut extra illam minuatur numerus infidelium. Judæorum, Hæreticorum, & Schismaticorum: ut Principes Ecclesiastici cum toto Clero, & Religiosis gratum divinæ Majestati exhibeant famulatum, quilibet pro ratione sui gradus: ut Principes seculares cum omni statu seculari majorem habeant rationem divini honoris, & obedientiæ erga Ecclesiam, quam ullius commodi temporalis; & inter se mutua concordia pacifice viventes bonis temporalibus ad animæ salutem, & pau-

perum subsidium utantur: ut qui ejus auxilia implorant, salutarem consequantur effectum, & quantocius exaudiantur: ut defuncti, qui in hac vitam devotè coluerunt, & alii qui nullis specialibus suffragiis juvantur, è pœnis Purgatorii citò liberentur: ut te adjuvet in omnibus negotiis tuis, maxime in eo, quod tunc præ manibus habere contingit.

iv. Congratulaberis Sanctissimæ Trinitati, & Christi humanitati, quod, ille sanctus tam fideliter in hac vita Deo servierit, & nunc sit beatus in patria. Eidem quoque sancto de hac ipsa re congratulaberis, & de omni honore, qui ei in hac vita exhibitus est, exhibetur, & usque ad diem judicii exhibebitur. Angelo item ejus Custodi, & aliis Sanctis, qui eum juverunt in hac vita, quod nunc gaudeant de tam felici fructu auxiliorum suorum ad laudem, & gloriam Dei.

v. Offeres sanctissimæ Trinitati, & Christi humanitati omnia merita illius Sancti, & omnes ejus satisfactiones Christi meritis unitas, in honorem divinæ Majestatis, & Jesu Christi

humanitatis : in gaudium accidentale
Beatæ Virginis , Angeli Custodis , &
aliorum Sanctorum , illorum præfer-
tim , qui amici ejus fuerunt in hac vi-
ta, vel quoquo modo cum juverunt : ad
impetrandam remissionem peccatorum
tuorum , & totius mundi , & ad tol-
lendam pœnæ temporalis obligatio-
nem , in quandam recompensationem
pro omnibus beneficiis tibi , & toti
mundo , præcipuè in eo templo per
ejus sancti merita concessis : ad ea ob-
tinenda , quæ à Deo petis , & quibus
maximè indiges ad consequendam vi-
tam æternam. Ipsi autem Sancto offe-
res preces , quas fundunt ad eum om-
nes fideles pro suis necessitatibus , ut eas
præsentet ante Tribunal Altissimi : Of-
feres desiderium eadem placendi , & ejus
honorem propagandi.



§. XII.

*Exercitium internæ conversationis
cum Sanctis.*

CUM solus stas, aut iter agis, pro solatio tuæ solitudinis socios tibi assumes cælestis curiæ cives. Et primò quidem ad B. Virginem accedes, & eam cum Archangelo Gabriele humiliter salutabis agelque cum ipsa de mysterio nostræ Redemptionis. Deinde quæres diligenter S. Joannem Baptistam Præcursores Domini in eremo latentem, dicesque ei: Ave Sanctissime; & dilectissime amice Jesu Christi Joannes. Multa bona, & mirabilia audi de te; quomodo sis natus mirabiliter, & in utero Matris sanctificatus: quam strictè, & religiosè in solitudine conversatus fueris, ne levi saltem cogitatione peccares. Tum petes ab eo quandiù, & cur in solitudine vixerit; quis ei ministraverit, & alia hujusmodi: audiesque intus ipsius responsum rei propositæ & respondentis sanctitati accommodatum. Postea ad Apostolos Christi pro-

cedes, & dulcia cum singulis inibis colloquia. Petes à Petro, quomodo fleverit peccatum suum, ibisque cum eo in Templum ad orandum, & ascendes in cœnaculum, ut accipias cum eo Spiritum Sanctum. Ibis cum Paulo per omnia loca ad prædicandum, & quæres ab eo, Quomodo raptus fuerit in Paradisum. Ab Andræa postulabis, quam suavis fuerit ei Crux: à Jacobo majori, qualiter biberit Calicem Passionis occisus ab Herode. Joannem interrogabis de suo Evangelio, & divina Apocalypsi, stitue totius Ecclesiæ militantis, & triumphantis. Eodem modo cum cæteris colloquia inibis, & discurses post modum per choros Martyrum, Confessorum, & Virginum; insigniores ex eis salutando, & de virtutibus eorum sermonem instituyendo, cum affectu amoris, devotionis, & imitationis.

§. XIII.

*Protestatio , & postulatio amantis
animæ.*

MAgnum est , Domine , desiderium , quo ardeo te solum amandi , tibi soli serviendi : sed infirmæ admodum , ac debiles sunt vires meæ . Multi sunt , qui me persequuntur , infinitæ sunt cogitationes , & sine numero tentationes , quæ me affligunt : & nisi tu adjuves me , paulominus habitabit in inferno anima mea . Ideo cupio me tecum ligare vinculo indissolubili , quod in æternum dissolvi non possit . Protestor igitur ego peccator miserabilis , & servus tuus indigens gratia , & misericordia tua , coram te Deus meus Pater , & Fili , & Spiritus Sancte , intendens hunc actum continuare in efficacia tui benedicti , & amantissimi cordis : Protestor inquam , quod nulli omnino cogitationi , verbo , vel actioni , quæ contra te vel sanctissimam legem tuam , aut contra præcepta Ecclesiæ , & statuta regulæ meæ sint , assensum præbere volo : atque hæc omnia
à me

à me semper elongare conabor exhibendo me purum, & immaculatum in conspectu tuo. Audiant cæli, audiant Angeli, & cælites universi hanc meam voluntatem, & protestationem. Audiat me terra, & incolæ ejus, sintque mihi universæ creaturæ testes vitæ emendationis, quam deinceps instituere decerno. Attentus sit infernus, & qui eum inhabitant maligni Spiritus, animæ infelices æternis ignibus addictæ, quia eorum suggestiones, & peccata abominor, & detestor, eorumque horribili exemplo tremo, & expavesco. Sed quia ex me nihil sum, & nihil possum, instantissimè à te postulo, Domine Deus meus, omne quod mihi necessarium est ad amandum te, & serviendum tibi fideliter. Dum verò hoc dico, intendo hac mea petitione includere, ac simul unire, & offerre tibi omnes orationes omnium Angelorum, & Sanctorum, Beatissimæ Virginis & Jesu Christi Filii tui, omniumque electorum tuorum, quæ vel mente, vel voce factæ sunt ab initio mundi, & fient usque in finem: omnique momento hunc actum renovare intendo certam habens confidentiam, quia tu Domine exaudies me

per Jesum Christum Filium tuum, & per
merita Sanctorum tuorum Amen.

§. XIV.

Exercitium spiritualis mendicitatis.

Quia pauperes in hoc exilio sumus,
mendicandum est nobis in terra vi-
ventium, ubi locus est magnarum elee-
mosynarum, à Rege, à Regina, & ab
omni familia. Dividenda cælestis patria
in varios vicos, seu regiones, statuendæ
in una Angelos, in altera Patriarchas, &
sic de reliquis. Porro Angelos confide-
rabis tanquam nuncios, & secretarios:
Patriarchas, & Prophetas tanquam con-
siliarios: Apostolos ut judices: Marty-
res tanquam milites: Confessores tan-
quam thesaurarios: Virgines tanquam
sponsas, & dispensatrices. Praxis hujus
exercitii his præceptis continetur. Primò
excitabis mentis torporem, consideran-
do quàm miser sis, & miserabilis, nudus,
& cæcus: & expurgabis te à peccatis per
compunctionem. Secundò ascendes San-
ctorum habitacula per devotam contem-
plationem. Tertiò captabis benevolen-

tiam, cos reverenter salutando, magnificè commendando, & te profundè humiliando. Quartò expones miseriam tuam, quia reus es, & infirmus, omni vitio plenus, omni virtute destitutus, passionibus subiectus. Quintò sequetur pia, humilis, & instans oratio, in qua exprimes id quod petis tibi utile, & necessarium esse, & ab eis duntaxat sperandum: pietatem eorum nulli unquam negatam, sed semper solitam omnibus misereri: te gratum, & memorem semper futurum. Sextò tuam petitionem confirmabis variis probationibus, locis, & argumentis. Septimò obsecrabis eos, & obtestaberis, per Dei misericordiam, & cætera attributa; per Christi mysteria, & pietatem eis exhibitam, per eorum charitatem, & viscera pietatis. Octavò gratias ages Sanctis, quod à te exorari voluerint, quod crebrius tibi succurrere, & consolationem immittere dignati sint. Nonò offeres Deo hoc exercitium in unionem operum Christi, petens ab eo, quæ à Sanctis postulasti. Hujus exercitii praxim diffusissimè tradit Gerson tractatu de spiritali mendicitate, Tomo tertio.

§. XV.

*Exercitatio patientiæ cum aliquid
adversus occurrit.*

CUm tibi aliqua evenerit adversitas,
 vel contrarietas sive in corpore, si-
 ve in anima, sive in fama, & existima-
 tione, statim confugiens ad orationem,
 in qua remedium omnium malorum re-
 peritur, p[ro]tes a Deo virtutem patientiæ.
 Postea respicies multitudinem peccato-
 rum tuorum pravosque habitus, & in-
 clinationem ad omnia mala, & sic orabis.
 » Peccavi, benignissime Jesu, & mul-
 » tiplicatæ sunt iniquitates meæ super
 » numerum arenæ maris: à planta pedis
 » usque ad verticem capitis non est sani-
 » tas in me, & nisi gratia tua adjuvaret
 » me, crescerent quotidie delicta mea us-
 » que ad cælum, adeo pronus ad malum
 » sum. Ideo millies me damnare cum An-
 » gelis rebellibus debuisses igne sempi-
 » terno cruciandum: hæc est enim mer-
 » ces, quam merui tot sceleribus, &
 » transgressionibus meis. Sed tu Domine
 » fecisti mecum misericordiam tuam, &

liberasti me à perditione : & pro pœ-
 nis æternis , quas evasi per gratiam
 tuam , hisce minimis tribulationibus
 excerces me , ut purges à peccatis , &
 præpares ad gloriam. Istę sunt rosę , &
 lilia , quas tu sponse animarum , ad or-
 nandam animam meam mittis è cælo ,
 ut placeat oculis tuis. Accepto hoc do-
 num tuum libentissime, Domine Deus ,
 & toto cordis affectu hanc tribulatio-
 nem , seu persecutionem amplector ,
 quantumvis recalcitret perfidus sensus
 meus , & in contrarium renitatur. Non
 consentio perversis motibus partis sen-
 sitivę , pravas ejus suggestiones rejicio.
 Accepto , & volo quod tu vis. Fiat vo-
 luntas tua.

Hęc postrema verba sæpius repetes :
 deinde obtutum figes in Jesum crucifi-
 xum , & sic eum amanter alloqueris.

Tu pro me pendes in cruce , Jesu dul-
 cissime , spinis acutissimis coronatus ,
 tu pro me spargis pretiosissimum San-
 guinem tuum , & crudelissimam tole-
 ras mortem : ego autem non feram ob-
 tuamorem hanc levissimam tribulatio-
 nem ? Rex eterne glorię , & Dominus
 universorum pro me vilissimo servo a-

»trocissimam patitur mortem, & ego
 »omnium malorum reus propter ipsum
 »nihil patiar? Solummè igitur relin-
 »quam sponsum meum, vitam meam in
 »tormentis? Absit hoc à me, bone Jesu,
 »tecum pati volo, tecum affligi, & mo-
 »ri. Venite omnes tribulationes, omnes
 »injurie, & contumelię, omnes calum-
 »nię, & derisiones; venite quotquot
 »estis infirmitates, & adversitates: Deo
 »juvante patienter feram, quicquid ille
 »immiserit mihi, qui tanta pro me passus
 »est. Moriatur sensus, juguletur caro,
 »vivat crux, vivat crux Christi.

Mentem demum elevabis ad Deum, &
 »dices succenso affectu. Ita Pater, quo-
 »niam sic fuit placitum ante te. Tu ab
 »eterno previdisti istam mihi eventuram
 »adversitatem à tali persona, tali modo,
 »& tempore, & cum talibus circum-
 »stantiis: & hanc preordinasti, & per-
 »mittere decrevisti ad salutem anime
 »mee. Gaudeo igitur & exulto, quod tua
 »sanctissimę voluntas adimpleatur in
 »me. Omne meum velle, & nolle tuo
 »justissimo beneplacito prorsus subjicio.
 »Absit à me tanta perversitas, ut meam
 »distortam voluntatem tuis æquissimis

decrevis præferam. Volo quod tu vis, Deus meus in tempore, & in æterni-
tate. Accetto ex toto corde, & ani-
mo hoc donum tuum quantumvis as-
perum sensui cum resignatione, & gra-
tiarum actione. Fiat voluntas tua. His
autem per actis Deum enixè deprecabe-
ris pro his, a quibus injuriam passus es,
si adversitas illata sit ab hominibus, illis-
que benefacere, & eos alloqui studebis,
si occasio tulerit, animo admodum paci-
fico, & tranquillo.

§. XVI.

Exercitium perfectæ Resignationis.

I. **U**T te perfectè expropries, & re-
signes in Deo, hoc exercitio ute-
ris. Primo concipies animo, & propo-
nes invariabiliter manere in simplicissi-
ma unitate, & purissima simplicitate di-
vinæ præsentiae per totalem tui ipsius ex-
propriationem, & remissionem, ac de-
relectionem in divino beneplacito, &
voluntate. Quoties autem spiritum tuum
extra hanc dulcissimam mansionem repe-
ries, suaviter in eam reduces absque ullo

conatu intellectus, & voluntatis per solum amorem simplicis confidentiæ, & conformitatis: & hinc igitur commoraberis, in paterno sinu divinæ bonitatis requiescens. Ab hac verò quiete nusquam discedes, nec ad ea respicies, quæ facis, aut factururus es, aut quæ tibi evenitura sunt: nec philosophaberis super afflictionibus, & contradictionibus tuis; sed omnia sine exceptione à benignissima Dei manu dulciter, & patienter accipies, in omnibus acquiescens ejus semper adorandæ voluntati. Quod si aliquam eriri in te solitudinem, aut desiderium animadvertis, projice abs te, ac protinus omni cura denudatus ad Deum convertere, protestando te nihil velle, aut nolle, nisi ejus sanctissimum beneplacitum.

II. In hac autem solitudine, & nuditate cum Christo crucifixo manens quasi modo geniti infantis simplicitatem imitaberis, ut te Dominus amplectatur qui dicebat, finite parvulos ad me venire, & ad culmen amoris sui perducatur. Et si aliquando tua te consolatione, ac præsentia privabit, læto animo esto, id enim faciet magno tuo emolumento, ne ejus
præsentia

præsentia cor tuum afficiatur, sed solo
 ipsius beneplacito. Beati nudi, quoniam
 induentur virtute ex alto. Felicissimi fue-
 rant primi parentes nostri, quandiu nudi
 fuerunt; & tu quoque felix eris, si verè
 illud Job dicere poteris, *Nudus egres-
 sus sum de utero matris meæ, & nudus re-
 vertor illuc*: & cum sponsa, *Dilectus
 meus mihi, & ego illi.*

III. Ipso etiam desiderio virtutum,
 & perfectionis exspoliare te debes, nihil
 protus volens, aut quærens, nisi divi-
 num beneplacitum; non reflectens te su-
 per actus, & consolationes tuas, nec al-
 iquid cogitans, nisi Deum, quem, si
 nudus, & simplex fueris, in omnibus
 rebus reperies. Sicut enim pueri omni
 cura, & sollicitudine carent, & paren-
 tibus adhærentes, sine ullo reflexu suis
 consolationibus fruuntur cum simplici-
 tate, & expropriatione. nihil cogitan-
 tes de earum causis, & effectibus: Ita
 pari ratione veri Dei amatores soli dile-
 cto adhærent, de nulla re solliciti, nisi ut
 illi placeant, & ipsum ament: purificant
 se, & ornant, non ut sibi satisfaciant,
 non ut perfecti evadant, sed ut cælesti
 sponso placeant, & obediant. Hæc est

vera, & perfecta resignatio, & confirmatio tuæ voluntatis cum divina, quam quotidie petere à Deo humiliter debes, orans ex corde, & dicens. *O sanctissima Dei voluntas semper adimplearis in me: O iustissima Dei decreta adoro vos, & vestro beneplacito consecro, & resigno totaliter voluntatem meam affectus meos, & omnia desideria mea. Tuus sum ego, Deus meus, tua est voluntas mea, tuum est quicquid volo, & cupio. Vive, & regna semper in me, & vires meas conforta, ut adimpleam quod te donante proposui.* Hæc & similia verba sæpe iterabis dulciter, & tranquillè, non ore, sed spiritu ea pronuncians, itaut quodammodo ex apice, spiritus suavissimè effluant, & distillent: nam sic erunt efficaciora, quàm si per modum orationis jaculatoriæ cum quodam impetu, & conatu proferantur.

§. XVII.

De Corona B. Virginis.

INter alias preces, quæ pro Virginis honore fundi solent, valde solemniss

ea est, & à nemine vel perditissimo omiffa, quæ per globulos, seu orbiculos precatórios filo insertos fit, & Corona, vel Rosarium nuncupatur. Rosarium centumquingenta salutationibus Angelicis constat, præmissa cuilibet decadi dominica oratione. Corona ex sexaginta tribus salutationibus Angelicis componitur, & septem orationibus dominicis. De Rosario infra, nunc de Corona agendum; quæ quia Deiparæ velut Regium diadema offertur, & tanquam sertum honoris ab ejus benignitate acceptatur, ideo Corona vocatur. Est autem hæc precatio ex sexaginta tribus Angelicis salutationibus compacta, juxta numerum annorum quibus B. Virgo in terris vixisse creditur, ut fert Doctorum probabilior sententia. In cujus recitatione sequenti forma uti poteris; teque paululum recolliges, priusquam incipias attendens quàm nobile, & omnino Angelicum officium sis obiturus, & ad quam intentionem. Præmisso signo Crucis dices. *Deus in adiutorium meum intende. Gloria Patri. Dignare me laudare te Virgo sacrata; Da mihi virtutem contra hostes tuos.* Tum in prima decade dum dicis *Pater noster*.

memor eris primæ effusionis Sanguinis Domini nostri Jesu Christi in circumcissione. Dum verò recitas decies *Ave Maria* considerabis primum statum vitæ B. Virginis, cum adhuc puella in domo paterna commorabatur. Postea dices hanc orationem. *Decies millies benedicant te, gloriosa Virgo, omnes Angeli, Archangeli, Principatus, Potestates, Dominationes, Virtutes, Throni, Cherubim ac Seraphim, cum quibus speramus aliquando te videre in calo. Amen*

In II. decade ad orationem dominicam secundam sanguinis effusionem in horto, & ad Angelicas salutationes vitam B. Virginis in templo meditaberis. Deinde sic orabis. *Viginti millies benedicant te, gloriosa Virgo, omnes Sancti Patriarche & Prophete, beati Innocentes, & omnes Sancti veteris Testamenti, cum quibus speramus aliquando te videre in calo. Amen.*

In III. decade considerabis effusionem Sanguinis in Flagellatione, vitamque Deiparæ usque ad annum Christi duodecesimum. Tum dices. *Triginti millies benedicant te, gloriosa Virgo, omnes Apostoli, & Discipuli Domini,*

Evangelista item & Martyres, cum quibus speramus aliquando te videre in celo. Amen.

In iv. decade effusionem Sanguinis in Spinea coronatione & vitam Virginis usque ad annum trigesimum Christi. Subdes. *Quadragesis millies benedicant te, gloriosa Virgo, omnes sancti Confessores, Pontifices, Doctores, Monachi, & Eremita, cum quibus speramus aliquando te videre in celo. Amen.*

In v. effusionem Sanguinis, cum Judæi Christum suis vestibus expoliarunt, & vitam B. Virginis usque ad Domini Ascensionem. Adde. *Quinquagesis millies benedicant te, gloriosa Virgo, omnes sancte mulieres, Virgines, vidue, & conjugate, cum quibus speramus aliquando te videre in celo. Amen.*

In vi. effusionem Sanguinis in crucifixione, & residuum vitæ Virginis usque ad mortem. Mox dices. *Centies millies benedicant te, gloriosa Virgo, omnes Sancti & Sanctæ Dei, cum quibus speramus aliquando te videre in celo. Amen.*

Sequitur septimum *Pater noster*, ad quod meditaberis ultimam Sanguinis effusionem in lateris aperitione. Tum di-

ces ter *Ave Maria*, commemorando mortem, Resurrectionem, & coronationem B. Virginis. In fine verò post Symbolum Apostolorum dicitur Hymnus *Ave maris stella* cum versu *Ora pro nobis sancta Dei genitrix*, & Collecta. *Defende quesumus Domine, B. Maria semper Virgine intercedente, istam ab omni adversitate familiam, & toto corde tibi prostratam ab hostium propitius tuere clementer insidiis. Per Christum. Dulce nomen Domini nostri Iesu Christi, & Beatissima Matris ejus sit benedictum in secula seculorum. Amen.*

§. XVIII.

De Rosario B. Virginis.

HOc Rosarium adinstar psalterii Davidici ex centum quinquaginta salutationibus Angelicis tanquam ex totidem suaveolentibus rosis, componitur, & hinc Rosarii nomenclaturam accepit. Dividitur in tres partes, seu quinquagenas; suntque cujusque partis quinque mysteria, dum quinque decades percurruntur, considerata. Primæ partis my-

steria dicuntur gaudiosa, & sunt ista. Annunciatio Incarnationis, atque ipsa Incarnatio Filii Dei: Visitatio Elizabet, & Johannis Baptistæ sanctificatio: Partus B. Virginis, & Nativitas Salvatoris: Oblatio pueri Jesu in templo, & Virginis Matris Purificatio; (sed huic Mystério alii substituunt Magorum adorationem) Inventio pueri Jesu duodenis in templo. Secunda pars habet mysteria dolorosa, videlicet orationem Christi in horto, ejusque capturam: ejus flagellationem: Spineam coronam: crucis bajulationem: Crucifixionem. Tertiæ partis mysteria sunt gloriosa, nimirum Resurrectio Domini: Ascensio in celos: Missio Spiritus Sancti ad Discipulos: B. Virginis in æternas sedes Assumptio: ac tandem ipsi Angelorum, & hominum Reginæ, incorruptibilis ac regię coronæ impositio. Sic recitatur.

1. Concipe Dei præsentiam, & prævia brevi reflexione ad præcellentiam dignitatis B. Virginis, & ad tuam vilitatem, ac indigentiam, innova propositum ipsam Deiparam ferventiùs colendum elice actum contritionis, ac præteritam tepiditatem detestare.

II. Certam aliquam intentionem præfige cum humili petitione gratiæ, idque paucissimis saltem suspiriis ad B. Virginem, & ad Filium ejus Salvatorem nostrum directis.

III. Præmisso signo crucis, dic An-
riphonam. *Veni Sancte Spiritus*, cum
versu *Emirte*, & collecta de Spiritu San-
cto. Sequitur *Deus in adjutorium. Glo-*
ria Patri. Dignare me laudare te. Postea
dices hymnum de B. Virgine, in prima
parte, *Quem terra, pontus, æthera*: in
secunda, *Stabat Mater dolorosa*: in
tertia, *O gloriosa Domina.* Facto autem
hoc præludio orationem Domini. Eam
semel recitabis, & decies Angelicam
Salutationem. Ante *Pater Noster* bre-
viter, & quasi in momento præconci-
pies Deum uti Patrem, & Dominum univer-
sorum ubique præsentem, qui te indi-
gnum audire dignatur; quare humiliter,
& attentè eum rogabis, ac si magnum
aliquem Principem alloquereris. Simili-
ter priusquam incipias *Ave Maria*, B.
Virginem considerabis aliquem de acti-
bus propositi mysterij agentem, quæ te
item indignum libenter audit, & cum
actuali reverentia, amore, & attentione

recitabis *Ave Maria*, ac si alloquereris magnam aliquam Reginam. Initio item cujusque decadis mysterium in ea recolendum paulisper expende, & congruentes affectus elicere stude gratitudinis, amoris, contritionis, compunctionis, zeli imitandi Christum, & B. Virginem, desiderii Patriæ celestis, congratulationis cum B. Virgine, & similium juxta Mysterii exigentiam.

I V. In decursu cujusque decadis ejus Mysterium piè cole, & absoluta decade renova affectus, & pete à Christo, atque ab ejus Matre remissionem peccatorum, & virtutes, quæ in eo mysterio magis elucet. Post ultimum verò *Ave Maria* cujusque decadis dic semel *Gloria Patri*. In fine autem Rosarii, sive integrum illud recites, sive tertium ejus partem, Litanias B. Virginis recitabis cum Antiphona *Sub tuum presidium*, & collecta *Defende vel Concede nos*: Proponesque Christo, & Matri necessitates, & misérias, quibus premeris, atque earum remedium petes, adferendo pro causâ, & titulo gaudium, dolorem, vel gloriam, quibus in propositis mysteriis fuerunt affecti. Demum concludes

his versibus, *Laus Trinitati fulgidæ;
Patri, Nato, Paraclito: Laus Virgini
Deipræ & nunc, & in perpetuum.
Amen.*

v. Post recitationem discusso obiter
successu dole, vel gratias age; & propo-
ne deinceps ferventius recitare. Tum
piissimæ Matri obsequium tuum perfici-
endum, Filioque offerendum com-
menda juxta præfixas intentiones. Por-
to hîc notandum, quod quamvis my-
steria Rosarii ad quindecim reducun-
tur, quidam tamen totam vitam Chri-
sti, & Mariæ in centum quinquagin-
ta articulos dividunt pro numero Sa-
lutationum Angelicarum, ex quibus
Rosarium constat; propositos articulos
singulis inferendo, modo supra expli-
cato: cujus exemplum apud Ludovi-
cum Blosium reperies, itemque in Pa-
radiso animæ Christianæ, & in exer-
citiis Joannis Justi Lanspergij.

§. XIX.

De Corona Domini.

HANC Coronam ad honorem Salvatoris nostri Jesu Christi, & triginta trium annorum, quibus in terris vixit, primus adinvenit B. Michael Florentinus Eremita Camaldulensis; quam Summi Pontifices Leo X. Gregorius XIII. & Sixtus V. approbarunt. Constat triginta tribus Dominicis orationibus, & quinque Angelicis Salutationibus: & sic eam recitabis.

*Deus in adjutorium. Gloria Patri,
Domine Iesu Christe, Filii Dei vivi, concede mihi, ut toto cordis affectu, pleno desiderio, & animo sitiendi possim ad te aspirare, ac in te solo respirare, totoque spiritu, & visceribus meis ad te solum, qui es beatitudo mea, anhelare. Scribe, suavissime Iesu, Sanguine tuo pretioso vulnera tua in corde meo, & concede, ut eorum memoria semper in eo impressa maneat, & omnis creatura mihi vilescat. Hanc autem coronam in piissimum cor tuum benigne suscipe; eam enim tibi offe-*

ro ad honorem, & gloriam tuam, in memoriam annorum tuorum, viteque tue, & passionis acerbissima: ut meipsum excitem ad perfectum amorem tui; mihiq; & aliis, pro quibus orare debeo, bona gratia, & gloria obtineam, te prestante, Domine Deus, qui cum Patre, & Spiritu sancto vivis, & regnas per omnia secula seculorum: Amen.

Post hanc orationem dices semel *Ave Maria*, & decies *Pater noster*: deinde secundo *Ave Maria*, & iterum decies *Pater noster*: postea tertio *Ave Maria*, & decies quoq; *Pater noster*: Tum quarto *Ave Maria*, & ter *Pater noster*: deum quinto *Ave Maria*. In prima decade meditaberis Christi actiones ab ejus nativitate usque ad annum duodecimum: in secunda à duodecimo usque ad trigesimum: in tertia à trigesimo usque ad mortem. Dum postremo ter dices *Pater noster*, considerabis ejus descensum ad inferos, Resurrectionem, & Ascensionem. Cum verò dices primum *Ave Maria*, B. Virginis primum dolorem meditaberis, quando audivit a sancto Simeone, & tuam ipsius animam pertransibit gladius. In secunda cum

Filium amisit : in tertia cum audivit eundem a Iudeis captum : in quarta cum vidit cruci affixum : in quinta cum eo caruit in triduo sepulturæ.

Oratio post Coronam. *Beignissime Domine Iesu Chiste pietatem tuam simplici devotione deponco, ut applicare mihi digneris merita tua, & beatissime Maris tue in quorum unione offro tibi hanc coronam, quam modo recitavi. Hac merita obtineant mihi remissionem peccatorum, sintque tibi in gratiarum actionem pro omnibus beneficiis, quibus me cumulare dignatus es, Pone, Domine, passionem, & mortem tuam inter iudicium tuum & animam meam, nunc & in hora mortis meæ, & mihi largiri digneris gratiam tuam, & donum perseverantiae, Ecclesie tue pacem, & concordiam, vivis veniam, & requiem defunctis. Qui vivis, & regnas Deus per omnia secula seculorum. Amen.*



§. XX.

Affectus Animæ amantis Deum.

1. **D**OMINE Deus, qui lucem habitas inaccessibilem, principium omnium, & ultimus finis, qui me creasti ex nihilo, constituisti mihi terminos vitæ hujus mortalis, quos præterire non potero, ut amem te, & serviam tibi, donec ad aliam meliorem vitam assumes me, in qua tecum per omnem æternitatem beatus sim. Domine Deus meus, ecce pronus, & supplex adoro te, & subjicio me tibi usque ad inum nihil mei; secundum infinitam, & interminabilem distantiam tui a me: tu inquam, qui solus & omnia es, à me qui ex nihilo, & nihil sum coram te. Laudo, & benedico te fontem omnium bonorum, & quia vis amari à me, & cor meum avidissimè postulas, illud tibi totum cedo, & dono, ut jam meum non sit, sed tuum cor, nihilque mei, aut sui amoris habeat, sed tantum tui: imò jam non ego amem te, sed tu ipse te ames corde meo, jam non meo, sed tuo. Ama te illo

ardentissime, Creator meus, & omne bonum meum, ama te, quia dignus es: utere illo ad omne arbitrium tuum, postposito omni arbitrio meo, quod in tuum transfero, ac tuæ prorsus voluntati trado, permitto, & resigno.

II. Sed cur tantopere cor meum desideras Deus meus? quia nimirum pro nihilo habes ore, & lingua diligi, si cor tecum non sit. Hoc est quod vis, & petis, nec quemquam admittis in partem possessionis ejus. Ideo præcipis mihi, ut convertar ad te in toto corde meo, ut toto corde te quæram, toto corde te diligam, te sequar, & obediam tibi. Dignus enim es omni amore, quia omnis bonitas & perfectio, omnisque ratio amabilitatis in te est, & tu prior dilexisti nos. Dilexisti nos indignos amore, & dignissimos odio, quia sic fuit placitum ante te. Quasi enim non haberes objectum in te, totum tuum amorem quantumvis infinitum adequans, extendisti extra te amorem tuum & dilexisti me ab æterno propter immensam bonitatem tuam. Atque utinam, Domine Deus, tantum tibi amorem rependere possem, quantum mihi impendisti;

quàm libenter te amarem amore immenso, infinito, inenarrabili! Sed miser sum, & pronus ad malum ab adolescentia mea; nec possum qualitercumque amare te, nisi tu dederis mihi, ut amem te. Da igitur quod jubes, & jube quod vis. Hoc est enim omne bonum meum deorsum descendens à te, amare te propter te solum qui dilectione dignissimus es: nec præter hoc bonum aliud bonum volo, aut cognosco.

I.II. Utinam nulla hætenus fuisset, nulla deinceps sit vitæ meæ actio, nulla corporis, & animi motio, nulla functio sensuum, & potentiarum, nulla virium exercitatio, quæ non fuerit, aut sit ad maximam tui gloriam, amorem, cultum, & oblectationem, cooperante, & offerente Filio tuo, sine quo nihil sum, nihil possum. Hoc volo, hoc desidero, hoc intendo; & incipiendo ab actione ista, quam hoc momento ago, reliquas omnes, & singulas usque ad ultimum habitum vitæ meæ, & per totam æternitatem tibi offero per Filium tuum: & si quam in particulari offerre omiserò, id quaeso ut tribuas oblivioni meæ, & incogitantia; & hoc præsens propositum respicias,

quam à malo præterito, in bono præ-
senti, ad præmium futurum.

IV. Actus hujus virtutis, per tres
differentias temporis exercebis. In præ-
senti admirando, agnoscendo, & faten-
do tuam insufficienciam, desiderando
actus perfectissimos elicere, offerendo
Deo actus elicitos, & beatæ Virgini, &
omnibus Sanctis. Quoad præteritum do-
lendo de tua socordia. Quoad futurum
proponendo hujusmodi actus omni pos-
sibili perfectione frequentare. Quia ve-
rò præcipui actus Humilitatis sunt tres:
Vilem se, & abjectum reputare: Velle
talem ab aliis haberi, & tractari: Vilis-
simum, & pessimum omnium se existi-
mare: Praxis eos exercendi secundum
tempus præsens, præteritum, & futu-
rum, hæc erit.

V. Heu quanta est abyssus fragili-
tatis, vilitatis, & nihili mei quoad esse,
posse, & operari! quanta nihili moralis
ob tot, & tanta peccata, quæ feci, fa-
cio, & fortè facturus sum; & quæ fe-
cisse, n, facerem, & facturus essem, nisi
à Deo Creatore, & Redemptore meo
singulari gratia, ac providentia præ-
servarer! Quàm meritò ergo me pro-

» fundissimè humiliare deberem ! Serat
 » phim ex intimo sensu humilitatis ve-
 » lant alis faciem coram divina Majesta-
 » te : quid ego vermiculus, pulvis, & ni-
 » hilum facere deberem, qui bibo sicut
 » aquam iniquitatem ? Excedit hoc in-
 » telligentiam meam, & parem affectum
 » non invenio. Agnosco tamen, & pro-
 » fiteor coram te, Deus meus, nihilum
 » meum, prout possum. Nihil sum sine
 » te : quicquid facio, quicquid possum,
 » tuum est ; solum nihilum malitiæ meæ
 » meum est : Tibi ergo omnis laus, ho-
 » nor, & gloria : mihi autem omnis con-
 » fusio, & ignominia, quia peccavi, &
 » adhuc gravius peccassem, si gratia tua
 » defuisset mihi. Ideo in abyssum nihili
 » mei infra omnes etiam vilissimos, &
 » pessimos, secundum id, quod ex me
 » sum, & possum, me demitto, & abji-
 » cio. Si quid boni in me est, tuum est :
 » Si quid in me non est, mera gratia tua
 » est. Sic sentio de vilitate mea, & infini-
 » ta Majestite tua : Sic in æternum sen-
 » tire desidero, intellectu, & affectu,
 » non meo duntaxat, sed omnium ele-
 » ctorum tuorum Angelorum, & homi-
 » num, omniumque possibilium crea-

turarum. Imperfectum meum, Domine
Deus meus, viderunt oculi tui; sed in
ejus supplementum offero tibi om-
nium Sanctorum, maximè B. Virginis
humillimæ Matris tuæ intensissimos
sensus, affectus, actusque internos,
& externos, atque excessus intimæ
humilitatis, quos olim elicuere, & eli-
cient, unitos actibus, & affectibus,
quos tu in terris exercuisti. Suscipe, &
offer æterno Patri, & satisfac pro me
superbissimo peccatore.

O cæcitatem, arrogantiam, & ma-
litiam meam! Quàm parum huc usque,
quàm obiter, quàm rarò inspexi abyf-
sum nihili mei: Quoties putavi me ali-
quid esse, cum nihil sim? Quoties dixi
in corde meo, dives sum, & locuple-
tatus, & nullius egeo, & nescivi, quia
miser ego sū, & miserabilis, & pauper,
& cæcus, & nudus? Quàm rarò actus
humilitatis exercui tot gratis præven-
tus, tot exemplis provocatus, tot
oblatis occasionibus invitatus? Atque
utinam te numquam offendissem tot
actibus superbix Deus meus. Doleo de
his quantum possum, eosque detestor
affectu meo, & omnium Sanctorum

„ tuorum : & in compensationem tam
 „ tepidæ compunctionis meæ offero tibi
 „ contritionem , & lachrymas omnium
 „ verè pœnitentium , qui suæ , vel alie-
 „ næ superbie maculas perfectissimè ex-
 „ piarunt.

„ Paratum cor meum Deus , paratum
 „ cor meum , ne desis tu mihi gratia tua ,
 „ qua aspirante conabor deinceps ocu-
 „ los mentis meæ crebriùs defigere cum
 „ profunda admiratione in abyssum vili-
 „ tatis meæ , & sublimitatis tuæ , quam
 „ fateor me numquam satis posse pene-
 „ trare , nec me satis posse humiliare , &
 „ despiciere , nec ab aliis condignè hu-
 „ miliari , & contemni : Frequentando
 „ tales actus internos , & externos cum
 „ actuali reflexione : Suborta præsertim
 „ occasione , seu tentatione inanis glo-
 „ riæ , contemptus aliorum , confusio-
 „ nis , correptionis , admonitionis , &
 „ ignominie , recogitando me infini-
 „ to contemptu dignissimum. Istos au-
 „ tem exiguos conatus meos offero ti-
 „ bi , eterne Pater , & offerre sem-
 „ per intendo affectu omnium San-
 „ ctorum , in unione perfectissimorum
 „ exercitiorum humilitatis , Christi
 „ Domini,

respicias, in quo semper perseverare, & quoties respiravero, id semper renovare cum perpetuo amoris in te mei augmento opto, & desidero. Utinam instar thuris, & thymiamatis totus consumar in purissimum, & acceptissimum divinæ Majestatis tuæ holocaustum, cum omni afflictione, & contemptu, & perfecta mei abdicatione in omnem voluntatem, & beneplacitum tuum, sine ulla proprii commodi admixtione. Amen.

§. XXI.

Actus & exercitia Humilitatis.

QUIA sine humilitate nemo potest placere Deo, qui superbis resistit, & humilibus dat gratiam, omni studio satagere debes, utacquiras hanc virtutem, ejusque actus frequenter exerceas. Pro hac re proderunt sequentes industriae.

I. Cum animadvertis te aliquem defectum commisisse in sermone, refectio-
ne, oratione, aut alio quolibet exercitio; mentem ad Deum elevabis, & veniam petes, projiciens errorem tuum.

in ardentissimam fornacem immensa
 charitatis suæ, ut in ea statim consuma-
 tur. Tum ex ipso defectu scalam tibi
 conficies, qua ascendens ad humilitatem,
 & fructus ejus decerpas, odium videlicet
 tui, timorem Dei, desiderium patiendi,
 & perfectè Deo serviendi. Figes autem
 mentis obtutum primò in Deo, ejusque
 infinita perfectione: deinde in te ipso,
 & summa tua miseria, ac perversitate.
 Tum ratione inter Deum, & te posita
 dices: Heu miseram, & infelicem ani-
 mam meam! Volebat Deus, cui infini-
 tam obedientiam præstare debes, ut hoc
 faceres, vel ab hac re abstineres; perfu-
 dus autem sensus contrarium suadebat:
 & tu infidelis, ac scelerata, quamvis
 cognosceres divinam circa hoc volunta-
 tem; sensui tamen, ejusque pravæ sug-
 gestionis complacere, & consentire ma-
 luisti, quam sponso tuo cœlesti. Hoc ne
 igitur obsequium Domino tuo præstas,
 vilissima omnium creaturarum? Hanc
 mutuam vicem illi reddis pro tot gratiis,
 & beneficiis ab eo acceptis? Nuncine fi-
 dem servas, qua te illi in baptismo
 obtrinxisti? Sic solvis promissiones, &
decreta adimpleres toties stabilita faciendi

semper in omnibus, & per omnia divi-
nam voluntatem? In hunc sensum plu-
ra adjunges invehens in te ipsum, & in-
novans proposita, sicque ex malo bo-
num elicies, atque post lapsum validior
resurges.

II. Cum suboriri in te sentis gloriam
ex rectè factis, aut ex donis Dei quæ in
te sunt; cogita te nec posse, nec scire
quicquam ex teipso, sed Deum omnia
in omnibus operari, te verò instar pueri
esse, qui nec se attollere, tueri, stare,
aut nutrire potest, nec ab alio hoc po-
stulare. Considera deinde multitudinem
peccatorum tuorum, ob quæ æterna
supplicia promeritus es: considera in-
quanta adhuc cadere possis, & quod
certus non sis, an ullum unquam opus
feceris Deo gratum: actiones tuas per-
curre, & nullam deprehendes, in qua
te arguere non possis; & hinc disce par-
vus esse in oculis tuis. Alphabetum e-
tiam tibi conscribe imperfectionum tua-
rum, in quas frequentius labi soles, &
illud perlege, cum vanitatum aura
blanditur. Denique virtutum perfectis-
simos gradus, & eximiam civium super-
norum sanctitatem attende, quam lon-

ge ab eis distes : Sic enim fiet, ut nihil in te invenias unde efferri queas ; sed multa potius, ob quæ confundi, & erubescere debeas, & novissimum locum tenere.

III. Stude te ipsum cognoscere, & sic ad Deum aspira.

» Quid fui Domine? quid sum? & quid
 » ero? Fui nihil, nihil sum, & ero fortè
 » nihilo pejus. Fui conceptus in origi-
 » nali peccato, sum plenus peccato actua-
 » li, & quis scit, an ero condemnatus
 » pœna gehennali? Fui miserabilis in in-
 » gressu, sum miserabilior in progressu,
 » miserrimus ero in egressu. Cum nihil
 » essem, fui sine periculo damnationis,
 » & sine tpe salutis: & jam sum in spe
 » dubia, & gravi periculo: ero aut ex
 » re sperata felix, aut ex periculi suc-
 » cessu infelicitissimu. Sic fui, ut damnari
 » non possem: Sic sum ut salvari vix
 » possim: sic ero ut in æternum damna-
 » tus, aut in æternum salvus. Quid fue-
 » rim scio, quia fui pessimus: quid sim
 » nescio, quia de gratia incertus: quid
 » ero ignoro, quia de salute dubius.
 » Quod fui, Domine, ignosce; quod
 » sum corrige; quod ero dirige: dirige in-

Don
 etoru
 cis in
 ciem
 se usq
 Matr
 milit
 tiam
 æter

V
 Epi
 ven
 sive
 quo
 plec
 sacr
 tun
 rev
 dev
 nes
 imm
 res

Domini, B. Virginis, omniumque ele-
 ctorum tuorum. Tu qui humilia respi-
 cis in cœlo, & in terra, respice in fa-
 ciem Filii tui dilectissimi humiliantis
 se usque ad mortem Crucis, humillimæ
 Matris ejus, & tot Sanctorum per hu-
 militatem tibi placentium, & da gra-
 tiam eos imitandi ad maximam tuam,
 æternamque gloriam. Amen.

§. XXII.

Exercitium somni spiritualis:

Venerabilis Antistes, & vir Apo-
 stolici spiritus Franciscus de Sales
 Episcopus Genevensis, cum adhuc ju-
 venis esset, exercitium quoddam somni,
 sive quietis spiritualis sibi præscripsit,
 quod præcipuarum virtutum actus com-
 plectitur, & est ejusmodi. Electo huic
 sacræ quieti & mystico somno, oppor-
 tuno tempore, tibi primò in memoriam
 revocabis pios motus, desideria, sensus
 devotionis, animi decreta, inspiratio-
 nes, & lumina, quæ tibi unquam à Deo
 immissa sunt: morbos item, infirmita-
 tes, & adversitates, ex quibus profecisti;

& bona proposita , quotquot olim fecisti, renovabis. 2. Quiesces in consideratione vanitatis , honorum , dignitatum , & voluptatum hujus mundi , easque rejicies , & abominaberis. 3. Quiesces in consideratione turpitudinis , & miseriæ peccati , malorum , quæ secum affert, pœnarum quibus hominem reddit obnoxium , honorum , quibus animam privat , illudque propter hæc detestaberis , & maximè quia displicet Deo. 4. Dormitabis suaviter in cogitatione excellentiæ virtutis , quæ adeo pulchra , & nobilis est, ut hominem mutet in Angelum , & Deo similem faciat : eamquam seriò amplecti propones , eligendo media ad ejus assecutionem proportionata. 5. Ponderabis rigorem divinæ justitiæ , & terribilitatem abyssi judiciorum Dei, teque ad virtutem excitabis ex attenta mortis , & sequentis judicii consideratione , sic tecum disserendo. En morior , quid proderunt mihi divitiæ , quid carnis illecebræ , quid culmen dignitatis ? Transierunt omnia sicut umbra , & jam mihi reddenda est de omnibus exactissima ratio. 6. Infinitam Dei sapientiam , & bonitatem admiraberis , qui tot tibi media,

& instrumenta ad salutem providit per Filii sui Incarnationem, Sacramentorum institutionem, B. Virginis & Sanctorum exempla, & alia multa ejusdem generis. Septimò tandem in amore solius Dei elicitis ferventissimis ejus actibus requiesces.

§. XXIII.

Exercitium in ariditate.

CUM tempore ad orationem destitutus nato ita aridus es, ut meditari, & orare non possis, aliquod ex sequentibus exercitiis assumes, in quo immoraberis, donec consueta meditationis hora elaboratur. Primò percurte breviter præcepta Dei, & Ecclesiæ, & discute quomodo singula observaveris; tum veniam pete, & propone emendationem. Eodem modo discurre per septem vitia capitalia, sensus corporis, potentias animæ, & tui status, seu officii particulares obligationes. Secundò, recita aliquam orationem vocalem attentè, immorando in singulis verbis, donec aliquis pius affectus tibi occurrat. Tertiò, vitam Christi

in certa spatia, & loca divide, & ea mente percurrere, addito in singulis erga propositum mysterium aliquo pio affectu. Loca autem poterunt esse Nazareth, ubi conceptus, Bethleem, ubi natus, Aegyptus, iterum Nazareth, desertum, Galilæa, & Judea ubi prædicavit, Cœnaculum, hortus, & cætera passionis loca, Sepulchrum, Limbus, iterum terra, & cœlum. Quartò, Spiritualis meditationis exercitium perage supra descriptum §. 14. Quintò, mente peregrinare ad S. Sepulchrum Domini, ad limina Apostolorum, ad S. Jacobum Compstellæ, ad B. Virginem Lauretanam; & in iis locis pete à Deo, & sanctis necessaria tibi ad salutem. Sextò, saluta Christi plagas modo præscripto §. sequenti. Septimò, visita carceres, Xenodochia, agonizantes, in aliquo periculo constitutos, & pro singulis ora. Octavò, exercitium somni spiritualis perage, de quo supra §. 22. Nonò, descende in centrum terræ, percurrere sinus ejus, infernum, Limbum, Purgatorium; vide quid ibi agatur, timorem concipe, & horrorem de peccatis, & statue ab eis abstinere.

§. XXIV.

Oratio ad quinque vulnera Christi.

I. **S**ALVE vulnus benedictum dexteræ manus Domini mei Jesu Christi Crucifici, pro me, & omnium hominum salute roseo stillans cruore. Protege me, Domine, dextera tua, ne quando dicat inimicus meus; prævalui adversus eū, quem tu sanguine tuo redemisti. Deducat me mirabiliter dextera tua, ut omnes cogitationes meas, & sermones mei semper rectā tendant, & dirigantur ad te, ut pote scopum, & finem meum. Da mihi gestare semper ardentem lampadem, oleo charitatis instructam, ut dignus habear, qui tecum ad cœlestes nuptias intromittar; ut cum seculum judicaturus adveneris, ad dexteram tuam constitutus audire merear cum electis tuis: Venite benedicti Patris mei, percipite Regnum vobis paratum à constitutione mundi. Amen.

II. Salve beatificum vulnus sinistræ manus Salvatoris mei Jesu Christi pretiosissimo ejus sanguine purpuratum. Manu tua forti, & brachio excelsa ad

nihilum redige, Domine, quidquid finistrum, & perversum moluntur adversum me, qui cogitant mihi mala. Comprime vires hostium, qui quærunt animam meam. Tuere me, & adesto mihi in omnibus adversitatibus, & tribulationibus meis. Dic animæ meæ, Salus tua ego sum; ut de manu inimicorum meorum liberatus, in sanctitate, & justitia serviam tibi omnibus diebus vitæ meæ. Amen.

III. Salve gratiosum vulnus dextri pedis Domini mei Jesu Christi, sanguine Agni immaculati confpersum. Perfice, Domine, pedes meos tanquam cervorum, ut indefesso cursu per viam mandatorum tuorum incedam, eaque semper exquiram, quæ placita sunt tuæ divinæ voluntati. Dirige gressus meos in virtutem, donec videam Deum Deorum in Sion. Lucerna pedibus meis sit verbum tuum, & lumen semitis meis, ut etiam proximis lucis exempla prabeam, quatenus tu Deus meus in omnibus, & ante omnia glorificeris nunc, & in æternum. Amen.

IV. Salve venerabile vulnus sinistri pedis Christi sanguine madefactum.

Èvelle, Domine, pedes meos à laqueo, quem statuerūt mihi inimici mei. Custodi animam meam à lapsu, ne fiam hostibus meis in prædam. Non veniat mihi pes superbię, sed in simplicitate cordis mei incedam coram te omni tempore. Edoce me vias tuas, ut sciam quid acceptum sit coram te, & opere compleam universa, quę præcipisti mihi. Amen.

v. Salve vulnus saluberrimum cordis Jesu Christi crudeli cuspide inflictum, è quo sanguis, & aqua copiosè emanarunt in ablutionem peccatorum nostrorum. Vulnera cor meum, Domine, amoris tui jaculo, ut te in omnibus, & super omnia colat, teque & proximum propter te ferventi semper amore prosequatur. Munda me purissimo sanguine, & aqua salutari, ut ab omni labe emundatus te Deum Salvatorem meum, quem soli mundo corde videbunt, in omni æternitate merear contemplari. Amen.

CO.

Z iiij

§. XXV.

De Communionē spirituali.

SAncti Patres usum hujus communio-
nis commendarunt, ut cum quis per-
cipere Corpus Christi sacramentaliter
non potest, saltem illud spiritualiter per-
cipiat; voto nimirum ac desiderio, & fi-
de viva, quæ per dilectionē operatur, de
qua dicit Augustinus: *Crede, & man-
ducasti*. Hæc autem communio fieri po-
test, & cum quis Missæ interest, & ex-
tra Missam, atque Ecclesiam; potestque
repeti multoties in die. Cum Missam au-
dis, sic procedes. Post orationem Do-
minicam convertes animum tuum hac in-
tentione ad Dominum, tuamque fragili-
tatem, & defectus, Deique præsentis
majestatem meditaberis. Deinde Agnus
Dei ter repetes cum Sacerdote, dolo-
rem de peccatis tuis corde contrito ex-
citabis; & pacem cum Deo, cum pro-
ximo, & cum teipso postulabis. Simili-
ter iterans cum celebrante, Domine non
sum dignus, affectu quàm potes humi-
litis intensissimo, te tanta dignatione

amabilissimi Salvatoris ad te venire parati indignissimum reputabis, ob peccatorum tuorum multitudinem, & gravitatem: ob ingratitudinis tuæ pro tot beneficiis enormitatem: ob corporis, & animæ fœditatem, & abyssalem tui nihili vilitatem. Tum Jesu Christi infinita pietate fretus, cum invitabis ad mundandum, ornandum, & in æternum possidendum cor tuum ardentissimis suspiriis. Mox affectus fidei, amoris, & aliarum virtutum exercebis, ac si sacramentaliter communicasses, & pro spirituali refectione gratias ages. Si verò extra tempus, & locum sacrificii spiritualiter communicare desideras, priorem communionem Sacramentalem in memoriam revocabis, & animo te conjunges Sacerdotibus offerentibus, ac ferventi desiderio dices? *Domine Deus meus, quando te denuò in anima mea suscipiam? Veni Deus meus & jam nunc in me spiritualiter, & refice me. Cupio esse particeps omnium sacrificiorum, quæ ubique in Ecclesia Catholica tibi offeruntur. Veni dilecte mi, in animam meam, purga eam stillicidio tui pretiosi sanguinis, raga fluentis gratia, fœcunda rore*

*miser cordia , ut fructus proferat dulces
guttur tuo. Veni spes mea , posside re-
gnum cordis mei , conforma illud cordi
tuo , ut idem tecum velit , & nolit nunc,
& in aeternum. Quidquid denique præ-
scribitur pro communione Sacramenta-
li , ad spirituales transferri , eique opti-
mè convenire potest.*

§. XXVI.

*Pia exercitatio pro his , qui Missæ
interfunt.*

CUM Sacrificium Missæ sit viva , &
vera vitæ , passionis , & mortis
Christi representatio , quotidie illi in-
te. esse oportet ; & si datur occasio ei-
dem ministrandi , nullo modo negligen-
da est , nam cæteris paribus majus est
ministrantis meritum , quam simplici-
ter assistentis. D. Thomas jam Sacerdos ,
& Doctor post quotidianam celebratio-
nem aliud sacrum audiebat , cui etiam
ut plurimum ministrabat. Qui Missam
cum potest non audit , is Deo ingra-
tus , suæ salutis immemor , & ad officia
pietatis nimium languidus esse con-

vincitur: in ea enim meritorum Christi inæstimabilis thesaurus cuius Christiano proponitur, & sacrosancta redemptionis nostræ mysteria renovantur. Si virtutes, & merita omnium Sanctorum, si omnium Martyrum tormenta, si cuncta obsequia Deo præstita præterita, præsentia, & futura simul jungantur, non tam perfectam laudem, & honorem Dei complectentur, quàm unica continet Missa à quocumque Sacerdote celebrata. Atque hinc colligere potes quàm turpe sit, & deplorandum tanti sacrificii dignitatem, & utilitatem aut non æstimare, ut par est, aut ignorare. Et revera hoc tremendum Mysterium ignorare, aut spernere videntur illi, qui corpore præsentem in templo, mente & oculis vagantur, fabulas, & nugas miscent, eique adstant tanquàm comediarum spectatores. Hi sunt, qui in loco misericordiæ divinam contra se iustitiam provocant: & nova committunt peccata, ubi vetera expiare debebant. Sed his omisus modus piè audiendi sacrum tradendus est.

Et primò quidem eundo ad Ecclesiam magnum in te excita pietatis sensum cum spirituali quadam alacritate, quæ oriatut

ex consideratione præstantissimi operis ad quod accedis. Opus enim est divinum, Deo gratissimum, & maximè utile ad propitiationem pro peccatis, ad exercendos actus præcipuarum virtutum, ad obtinendâ mentis puritatem, & unionem cum Deo, ad exhibendum sanctissimæ Trinitati cultum, honorem, gratiarum actionem modo excellentissimo, ad impetrandum tibi, & proximo quicquid ad vitam temporalem, & eternâ necessariû est.

II. In ingressu Ecclesiæ aqua benedicta te asperge elicto actu fidei, & contritionis. Tum locum elige, quantû fieri poterit, remotû à turba, & ab occasione distractionum. Deum præsentem in propria domo Majestatis suæ adora, qua majori potes reverentia. Aperi mentis oculos, & vide Angelorum multitudinem circumvolantem, & Sacerdoti assistentem cum ingenti tremore, & honore. Hos imitare, flexuq; genibus, internos externosq; sensus ita compone, ut quidquid est in Ecclesia, fiat tibi invisibile, nec aliquam sensibus impressione faciat. Æternus Sol justitiæ, qui ibi adest, mentem tuam absorbeat, & sensus perstringat tanto claritatis excessu, ut nihil aliud videre, cogitare aut percipere possis.

III. Sic compositus Sacerdotem expecta, & dum ille se preparat, dum facris se vestibus induit, excita in te fervorem devotionis, contritionem, & amorem, pete gratiam à Deo, & ora hac vel simili formula,

Oratio.

Clementissime Pater misericordiarum, & Deus totius consolatoris, qui sic mundum dilexisti, ut Filio tuo unigenito non parceres; sed eum pro nostra reparatione acerbissimæ passioni, & morti traderes, cujus gratissima oblationem quotidie in Ecclesia renovari voluisti, ut illius in nobis fructum innovares: da mihi obsecro huic tam admirando, & salutari divinæ tuæ potentiae, sapientiae, ac bonitatis mysterio sic interesse, ut cruenti illius sacrificii participationem per hujus in cruenti oblationem quam efficacissimè consequi valeam. O quot suspiriis, quam ardentibus votis ipse coxternus tibi Filius desideratus à cunctis gentibus fuit! donec tandem missus à te formam servi accepit, & nostra mortali-

» tate indutus Majestatem Deitatis, car-
» nis velamine obtexit: tibi que obediens
» factus usque ad turpissimam mortem
» crucis, nos morte sua ab æterna morte
» redemit. Hoc opus tam immensæ cha-
» ritatis in hoc Missæ sacrificio recolitur,
» cui utinam assistere possem ea devotio-
» ne, attentione, & reverentia, quam
» exigit divinæ Majestatis præsentia, tot
» Angelorum assistentium frequentia, tot
» mysteriorum quæ hîc geruntur, ma-
» gnificentia. Tu quæso, Domine, possi-
» de, ac rege cor meum gratia tua, ut
» hoc meum obsequium tibi placeat, &
» prosit animæ meæ. Doleo ex intimo
» corde meo, quod unquam offenderim
» te, qui tantopere dilexisti me. Credo
» in te viva fide, ô æterna veritas: spero
» in te firmiter, ô vera salus animæ meæ:
» Amo te ex toto corde, ô summum bo-
» num meum. Absorbeat me ardentissi-
» ma vis amoris tui, ut nihil unquam se-
» paret me à charitate Christi Salvatoris
» mei, qui ex summo amore carnem suam,
» & sanguinem mihi dedit; & sub sp-
» ciebus panis, & vini, ut perpetuò no-
» biscum esset, mirabiliter esse voluit:
» cum quo, & Spiritu Sancto vivis, &

regnas Deus per omnia secula seculo-
rum. Amen.

I V Junge, & conforma intentionem
tuam cum intentione Sacerdotis hoc
modo.

Suscipe Sancta Trinitas unus Deus
hoc Sacro-sanctum Sacrificium Cor-
poris, & Sanguinis Domini nostri Jesu
Christi, quod ego indignissimus servus
tuus divinæ Majestati tuæ per hujus Sa-
cerdotis manus offero, unâ cum omni-
bus sacrificiis tibi unquam oblatis, &
offerendis, unitum sanctissimo Sacri-
ficio ab eodem Domino nostro in ulti-
ma Cæna, & in ara crucis oblato, om-
ni possibili pietatis affectu, ex puro a-
more tuæ infinitæ bonitatis, juxta in-
tentionem ejusdem Salvatoris nostri,
& sanctæ Matris Ecclesiæ; ad maxi-
mam, æternamque gloriam tuæ divi-
næ Majestatis: in protestationem su-
premæ excellentiæ, & Dominii tui, &
nostræ subjectionis, ac dependentiæ à
te: in perpetuam commemorationem
passionis, ac mortis ejusdem Domini
nostri: in honorem, augmentumque
gloriæ B. Virginis, ac totius curiæ
triumphantis: in gratiarum actionem

»pro univerſis beneficiis Sanctiſſimæ
 »Humanitati Domini noſtri, B. Virgini
 »Matri ejus, omnibus Sanctis, & ele-
 »ctis, cunctiſque creaturis & mihi in-
 »grato, atque indigno hucusque colla-
 »tis, & conferendis in æternum: in ſa-
 »tisfactionem peccatorum meorum;
 »omniumque fidelium vivorum, & de-
 »functorum: ad impetrandum mihi, &
 »omnibus omnia ſubſidia vitæ tempora-
 »lis, & æternæ. Singulariter offero pro
 »hac gratia obtinenda, & pro his mihi
 »ſpecialiter commendatis, omnibuſque
 »pro quibus orare ſoleo, & teneor, ut
 »omnes te agnoſcant, ament, & gloriſi-
 »cent in æternum. Amen.

v. Cum Sacerdos deſcendit, ut reci-
 tet confeſſionem, percurrere breviter
 peccata tua, contritionem excita, &
 innova pro poſitum emendandi. Et cum
 aſcendit ad Altare, illud oſculaturus,
 adora omnes caritates, eoſque tibi, ac tuis,
 & toti mundo auxiliores advoca. Ad
 introitum devotè attende, eoſque in te
 accende affectus, quos verba requirunt,
 Ad *Kyrie eleiſon* quemlibet ternarium
 ad ſingulas perſonas ſanctiſſimæ Trini-
 tatis dirige cum intenſo dolore de pecca-
 tis, *Glo-*

omnibus beneplacito se conforment. ^{cc}
 Oculos quoque tuę pietatis converte ^{cc}
 ad infelices animas peccatorum nexu ^{cc}
 confrietas, obstinatas, impœnitentes, ^{cc}
 & in densis perfidię, ignorantię atque ^{cc}
 infidelitatis tenebris pereuntes: Libe- ^{cc}
 ra eas de ore Leonis, revoca ad gre- ^{cc}
 mium Ecclesię tuę, & ad osculum pa- ^{cc}
 cis admitte, ut agnoscant, & diligant ^{cc}
 te, & quem misisti Jesum Christum. ^{cc}
 Miserere denique omnium fidelium de- ^{cc}
 functorum, & rore clementię tuę ar- ^{cc}
 dores eorum tempera, eisque locum ^{cc}
 refrigerii, & pacis indulge, ut à pœnis ^{cc}
 erepti te pro me ardentissimè ament, ^{cc}
 & laudent in cælis, cui ego tam imper- ^{cc}
 fectè servio in terris. Horum omnium ^{cc}
 miserere, & mei in primis ingrati pec- ^{cc}
 catoris gratiam concedens, ut à pecca- ^{cc}
 tis emundatus ad altissimum gradum ^{cc}
 perfectionis ascendam, & nunquam ^{cc}
 amplius separer à te in secula seculo- ^{cc}
 rum. Amen. ^{cc}

IX. Ad elevationem adora intentissi-
 mo affectu Sanctissimum Sacramentum
 & dic: *Adorate, & briste Iesù, qui exal-*
tatus es à terra, ut omnia trahas ad te
ipsum. Trahe me post te funiculis charita-

*ris tua. Tuus sum, & ero in aeternum:
posside me, & totum conforma voluntati
tuæ. Tu Rex gloria Christe; & quæ se-
quuntur usque ad finem Cantici Te
Deum laudamus.*

x. Post elevationem offer Deo in ti-
nitione Sanctissimi Sacramenti exigua tua
dona cum intenso devotionis affectu, ni-
mirum firmiter propositum, nunquam
peccandi mortaliter, sed nec venialiter
quidem animo deliberato: observandi
exactissime vota tua, & statuta tuæ Re-
ligionis: sufferendi quicquid acciderit
adversus: promovendi te, & alios sem-
per in via perfectionis quantum licebit.
Post hæc ora pro illis, à quibus aliquid
passus es: Isti enim sunt veri benefacto-
res tui, qui materiam tibi meritorum
maximam præbent. Orationem Domini-
cam recita cum Sacerdote, & deinde
percurrere cum multo affectu pulcherri-
mam illam orationem: *Respice quæsumus
Domine super hanc familiam tuam &c.*
& si opus fuerit, sæpius repete.

xi. Agnus Dei ter cum celebrante
percurrere, & præpara te ad communio-
nem spirituales, quæ nunquam omit-
tenda est, quando sacramentaliter non

communicas. De ea actum est, supra.
Aspirabis autem ad Christum dicens.
Veni dilecte mi in hortum tuum ani-
mam meam, perfla eam auster celestis,
ut fluant aromata illius; purga eam stil-
licidio tui pretiosi Sanguinis; iga fluen-
tis gratiæ, secunda rore misericordiæ,
ut fructus proferat dulces gutturi tuo.
Venis spes mea, amor meus, & omnia;
posside regnum cordis mei, & confor-
ma illud cordi tuo. His præmissis
quasi sacramentaliter communicasses,
gratias age pro spiritali refectione, &
fervidi amoris in te actus excita usque ad
finem Missæ. Sacerdotis benedictionem
summa cum reverentia excipe, cum spe
uberioris à Christo accipiendæ. Evange-
lium denique S. Joannis piè audi, & gra-
tias age pro beneficio Incarnationis.

XII. Sacro peracto rursus gratias a-
ge, & pete à Domino remissionem om-
nium tuorum, & alienorum peccatorum
quoad culpam, & pœnam: excellentem
tibi, & aliis sanctitatem: continuum au-
xilium in omnibus necessitatibus tuis, &
aliorum corporalibus, & spiritalibus:
magnam gratiam adversariis, & inimicis
tuis, si qui sunt, aut erunt: & com-

menda illi in particulari aliquam necessitatem tuam, vel alienam. Demum ora pro felici exitu diei, & veniam postula quod minus attentè, & reverenter tam tremendo sacrificio interfueris.

§. XXVII.

*Fasciculus aspirationum, & aliquot
brevium Orationum.*

I. **D**omine Jesu spes mea, & unicū solatium animæ meæ, hodie propter te abrenuntio omnibus, quæ in mundo sunt; omnibus amicis, & propinquis, omnibus delitiis, & dignitatibus, omnibus divitiis, & voluptatibus, omnibus solatiis, & recreationibus, & quibuscumque caro allici, & anima inquinari potest, paratus his carere quomodocumque volueris. Te verò eligo in gubernatorem vitæ meæ & refugium meum in omnibus necessitatibus, quia non est salus extra te, nec vita sine te.

II. O amor potentiſſime, Jesu mi dilectiſſime, extrahe quæſo cor meum à me, illudque purifica, & renova, & ab omni ſorde expurgatum abſconde in vulnere

tis. *Gloria in excelsis Deo* recita cum Sacerdote, desiderās Christum Jesum amore tui in vili stabulo natum, laudare, redamare, & glorificare. Ad *Dominus vobiscum*, cum Minister respondet & cum spiritu tuo, paucis sed ardentem Deum roga, ut Ministris Ecclesiæ omnem gratiam, & dona necessaria ad officium suum ritè exequendum largiri dignetur. Post hanc Salutationem sequuntur collectæ quibus similes affectus associabis, & quod Sacerdos petit, tu quoque a Deo postulabis.

VI. Epistolam, sive lectionem, & Evangelium attentè audi cum desiderio divinam voluntatem tibi indicatam adimplendi, & affectus elice rei, quæ legitur proportionatos. Zelo exardescere Evangelicæ perfectionis, mores tuos Christi monitis, & institutis conforma, aliosque omnes verbo, & exemplo ad Christum trahere propone. Symbolum recita cum Sacerdote elicitò fidei actum circa omnes ejus articulos cum desiderio eandem propagandi.

VII. Sub offertorio, & secretis offer Sanctissimæ Trinitati vitam, passionem, & mortem Christi Salvatoris, & merita

ejus, ac omnium Sanctorum pro communibus Ecclesie necessitatibus : pro conversione infidelium, & eorum, qui sunt in peccato mortali : pro fervore justorum tepidè Deo servientium : ut multiplicentur Sancti in Ecclesia : & pro salute totius mundi. Offer etiam omnia desideria, & opera tua, & unicuique meritis Christi Salvatoris.

VIII. Ad præfationem Deo gratias age pro omnibus beneficiis communibus, & particularibus, illis præsertim, quæ non cognoscuntur ab hominibus, & quibus multi abutuntur, & pro quibus gratias non agunt quantas possent, & deberent. Denique usque ad elevationem pro omnibus deprecare hac, vel simili oratione.

Oratio.

”Uscipe, clementissime Pater, de
 ”Smanu hujus Sacerdotis hoc Sacro-
 ”santum Sacrificium in unione illius ti-
 ”bi gratissimi, quod dilectus Filius tuus
 ”tota vita, in ultima Cæna, & in cruce
 ”obtulit tibi pro me, & omnibus, pro
 ”quibus mori dignatus est. Respice in

faciem Christi tui, & per paterna infi-
nitæ misericordiæ tuæ viscera; per ejus-
dem Unigeniti tui merita; per ejus In-
carnationem, Nativitatem, Circumci-
sionem, lachrymas, labores, passio-
nem, & mortem; per incomprehen-
sibilem charitatem, qua tanta pro me fe-
cit, dixit, & passus est; per eximiam
B. Virginis Matris ejus sanctitatem,
per omnium Sanctorum tibi exhibita,
& exhibenda obsequia, miserere Eccle-
siæ tuæ Sanctæ ipsius Filii tui Sponsæ,
quam acquisivit sanguine suo; & eam
toto orbe terrarum rege, dilata, coadu-
na, sanctifica, & exalta, ut per eam,
& in ea perfectè ab omnibus glorifice-
ris. Miserere summi Pontificis om-
niumque Episcoporum, Prælatorum,
Pastorum animarum, Regum, Princi-
pum, Magistratum, & aliorum, qui
maximè possunt gloriæ tuæ, & salutis
animarum prodesse. Effice illos homi-
nès secundum cor tuum, zeloque glo-
riæ tuæ, & salutis animarum inflam-
ma, ut & ipsi corde perfecto omnes
voluntates tuas faciant; subditosque sibi
verbo, exemplo, consilio, imperio,
& auxilio ad idem inducant. Miserere.

» deinde omnium statuum Ecclesiasti-
» corum, nostræ præsertim Congregatio-
» nis; omnesque, & singulos gratiæ tuæ
» radiis illustra, & sinceræ charitatis
» igne accende, ut omni humano respec-
» tu semoto, sese invicem intimè dili-
» gant, mutuis officiis juvent, exemplis
» excitent, non quærant quæ sua sunt,
» sed ad unicam tuam gloriam, & ani-
» marum salutem promovendam unani-
» miter conspirent. Memento item, &
» miserere omnium, pro quibus singula-
» riter orare teneor, parentum, fratrum,
» sororum, consanguineorum, affinium,
» benefactorum, & amicorum meorum;
» omnium qui se mihi commendaverunt,
» quibus scandalo fui, & quos ego con-
» tristavi, offendi, & juvare neglexi;
» quosque per me indignum vis juvari,
» & in viam salutis dirigi: omnium inno-
» centum, & bona desideria habentium.
» Agonizantium, infirmorum, afflictio-
» rum, & de gravi aliqua tribulatione
» ad te clamantium; eorumque necessi-
» tatibus clementer subveni, piis deside-
» riis aspira, misericordiæ tuæ thesauros
» singulis aperi, ut à peccatis liberati
» bonis operibus abundent, tuoque in

nere apertilateris tui, ut ab eo deincep egredi nequeat. Vivam ego sine corde & tu esto cor meum, vita mea, & anima spiritus mei.

III. Sancta Trinitas unus Deus, qui me creasti ad imaginem, & similitudinem tuam reforma in me hanc tuam imaginem, ut cum anima mea è corpore separabitur, dignus inveniar præsentia tua, & consortio Sanctorum. Quia verò perditè vixi omnibus diebus vitæ meæ, & tempus mihi inutiliter elapsum est, ut illud irreparabili jactura amissum aliquo modo recuperare queam, avertō me quantum possum ab omni loco; & tempore, totisque viribus in illud nunc æternitatis recipio, in quo tu essentialiter existis. Ibi enim neque præteritum, neque futurum est; ibi omnia deperdita reperiuntur. Atque utinam omni tempore sic laudabiliter vixissem, sicut omnes electi tui vixerunt. Utinam deinceps sic vivam, ut nihil in me reperiatur, quod oculis Majestatis tuæ displiceat. Hoc votum meum est, hæc summissima voluntas. Præsta tu per gratiam tuam, ut quod inspiratione tua concepī, nulla possit tentatione mutari.

iv. **Largire mihi Domine, ut plan-**
gam peccata mea, & pro iis satisfaciam
antequam moriar. Fiant oculi mei fontes
lachrymarum, & da mihi omnium verè
pœnitentium contritionem. Adjuva me,
Clementissime Pater, indignum filium
tuum clamantem ad te, & adesto mihi in
omni periculo, & necessitate. Erue ani-
mam meam de limo profundi, & lava me
in Sanguine dilectissimi Filii tui. Inter-
cede pro me gloriosissima Virgo Maria,
& obtine mihi à Filio tuo finalem perse-
verantiam. Monstra te esse Matrem, &
fac me esse filium : Monstra te esse Do-
minam, & fac me esse servum : monstra
te esse Magistram, & fac me esse disci-
pulum.

v. Domine Jesu miserere mei, neque
abjicias me propter peccata mea : ex me
enim est culpa, & perditio, ex te gratia,
& miseratio.

vi. Da mihi Domine perfectissimam
patientiam, ut omni contemptu, & pœ-
na me dignum existimem, nam tibi soli
debetur omnis honor, nihil autem mihi
nisi ignominia.

vii. Rogo te Domine, ut de me, &
per me fiat beneplacitum tuum, meam-

que voluntatem sic unias tibi, ut nihil omnino velle possim, nisi quod tu vis.

VIII. Da mihi Domine sedium tuarum assistricem sapientiam, quæ intellectum meum illuminet, & affectum meum inflammet ad cognoscendum, & amandum te in omnibus super omnia.

IX. Domine Jesu Christe si mihi operationem dares, & promitteres te mihi daturum quæcumque peterẽ, nihil aliud quam hoc peterem, ut tua laudabilissima voluntas in me, & de me semper fiat in tempore, & in æternitate.

X. Pone Domine custodiam ori meo, & ostium circumstantiæ labiis meis, ut non delinquam in lingua mea. Da mihi hanc gratiam, ut non loquar nisi quæ necessaria sunt, & fac me purum, & incontaminatum ab omni detractiõne, ab omni verbo inutili, & otioso.

XI. Diligam te Domine virtus mea toto corde, tota mente, tota virtute; & proximam in te, & propter te. Da ut omnium salutem quæram, & promoveam; & ut omnes adversantes mihi non verbo solum, & lingua, sed opere & veritate perfectissimè diligam. Aufer à me omnem iram, & amaritudinem,

omnem indignationem, & suspicionem, ut neminem judicem, & de omnibus bene sentiam in simplicitate cordis, & in Spiritu humilitatis.

xii. Amator ardentissime dulcis Jesu inebriet me ignita vis amoris tui, ita ut omnium creaturarum obliviscar, & totus ardeam tui desiderio. Accende in me ignem ardentissimum, quem nulla creatura possit extinguere.

xiii. Exaudi me Domine, & da mihi humilitatem tibi maximè acceptam. Extingue in me omnem appetitum honoris, & glorię, ut gaudeam nesciri, contemni, opprobria pati, ac pro nihilo reputari.

xiv. Excita cor meum Domine, & illumina, ut requiram, & inveniam te. Posside cor meum, ut requiescam in te, & obliviscar omnium, quę sunt extra te. Fac me tibi indissolubili vinculo colligari, ut nihil sit quod me possit à te separare.

xv. Utinam Domine Jesu vulnera tua cordi meo semper fixa permaneant, ut dolor passionis tuę quotidie in me excitetur, & ardor tuę dilectionis in me quotidie augeatur.

xvi. Spiritus Sancte Deus miserere mei, & luce tue visitationis illumina cor meum, & tui amoris in me ignem accende. Imple, & confirma me septem donis tuis, & hoc ipsum in me operare quod olim in Apostolis, ut quicquid terrenum est in me pereat, tuique amor ferventissimus inebriet me, & in te transformet.

xvii. Utinam dulcis Jesu amore tui jugiter ardeam: utinam omnibus creaturis moriar, & tibi soli inheream. Quicquid videro, quicquid audiero, quicquid sensero me in tui cognitionem perducatur, & tuo amore accendatur. Tu solus me possideas, & sis mihi omnia in omnibus.

FINIS.

*SUMMA PRIVILEGII
Regis Christianissimi.*


LUDOVICI XIV. Galliarum
& Navarra Regis Potentissimi sin-
gulari Privilegio cautum est, ne quis
intra Regnorum suorum fines impru-
mat aut divendat Librum cui titulus
est, *Horologium Aeternum indicans
modum ritè & cum fructu obeundi Chri-
stianas exercitationes, quae singulis, cer-
risque diebus occurrunt*, Authore Emi-
nentissimo Cardinali Johanne Bona, cæ-
teraque ejusdem Doctissimi Cardinalis
Opera, intra viginti annorum spatium,
qui secus fecit confiscatione Librorum
& alia gravi pœna mulctabitur, ut patet
in eodem Privilegio dato Lutetiæ Pari-
siorum 29. Junii 1676.

Signatum, JEANNIN.

De Mandato Regis.

In publicas Bibliothecas à Parisiensium Societatis Tabu-
lulis relatum 1. die mensis Octobris 1676.

*Hæc prima Editio absoluta fuit die 31. Octob. ejusdem
anni.*



CATALOGUS

OPERVM

CARDINAL. BONA

*Impressorum apud Ludovicum Bil-
laine Parisiensem Typographum
ac Bibliopolam.*

- D**E Divina Psalmodia, 4.
De rebus Liturgicis, 4.
— Id. 8. Editio quarta parte auctior
ex auctoris autographo, cum
Elogio & Testamento ejusdem
Emin. Cardinalis.
De discretionem spirituum, 4. Romæ.
— Id. 12. Parisiis.
— *Le mesme en François*, 12.
Manuductio ad Cælum, 18.
Via compendii ad Deum, 12.
De Sacrificio Missæ, 12.
Principia & Documenta vitæ Christi-
anæ, 12.

~~—~~ *Les mesmes en François*, 12.


Horologium Asceticum , 12.

Testamentum & Elogium ejusdem.

Enxii. Card. Bona.

tem •

Biblioteka Jagiellońska



stdr0023485

Bo
lon
Rio

Bona
Horolog
Aicetic